

長 區
(公分)

19.9x14.1

國家圖書館, NATIONAL CENTRAL LIBRARY, TAIWAN, R.O.C

國立中央圖書館藏善本		
書名:	集詩集	七卷
書名:	章齋集	
作者:	宋朱松撰	一二卷 四册
版本:	明弘治癸亥(十六年)任丘龐璠刻本	

附玉潮集一卷 宋朱榘撰

10410

4 册

韋齋集十二卷宋朱松撰松字喬年別字韋齋朱子之父也政和八年同上舍出身官至吏部員外郎以言事忤秦檜出知饒州未上諫間以主管台州崇道觀滿秩再諫命下而卒朱子作行狀稱有韋齋集十二卷外集十卷外集已佚有三刻本蘇乃淳熙刻本世間絕少必有至元宏治流傳亦稀康熙庶寅商孫昌辰校錄重刊忠直之士嘗言高逸即無令子其集亦足以傳後世玉瀾集一卷弟棖建年撰本別有刻本故陳振孫書錄解題各自著錄明任卬廊播以其本於睢陽陳性之因附之於以：昌辰亦因之尤表極稱其春風一篇即事三首然終不及其兄非篤論也棖夢有玉瀾堂之游甚異有詩紀之故以名其集云

明季毛子晉重宋元刻本有佳本必倩名手影鈔後世藏書之家宗之蓋以其差謬處少耳近來佳本絕寡即翻槧者亦罕觀是書古香古色具備宜其價貴連城也為王蓮涇及金氏文瑞樓舊物觸手以新獲之喜不能已用并數語於卷端皆

道光丁酉秋仲月明如晝清風徐來尚無催租吏登門叫呼洵
人生一樂也古滄齋 麒校讀一過



國家圖書館, NATIONAL CENTRAL LIBRARY, TAIWAN, R.O.C

常齋集序

文章之工拙繫乎人時命之通塞
存乎天。天人之適相合也。為甚難。
是以古今負文章之名者。未必得
貴仕而都公卿之位者。又未必以
文章顯也。故吏部員外郎常齋先
生朱公建炎紹興間。詩聲滿天下。
一時名公鉅卿交口稱薦。詞人墨



客傳寫諷誦如不及予少時學詩
嘗以作詩之要扣公公不以輩晚
遇我而許從游間宿于閩部憲臺
從事官舍之東軒夜對榻語蟬聯
不休比晨起則積雨初霽西風淒
然公曰為予舉簡齋開門知有雨
老樹半身濕及常蘇州諸生時列
坐共愛風滿林之句且言古之詩

人貴衝口直致蓋與彭澤把菊東
籬下悠然見南山同一闕候三人
者出處窮達雖不同誦此詩則可
見其人之蕭散清遠此殆太史公
所謂難與俗人言者予時心開神
會自是始知為詩之趣別去未幾
而公下世予既為詩以哭公曰求
其遺編伏而讀之愛其詩高遠而

幽潔其文溫婉而典裁至表疏書
奏又皆中於理而切事情迺喟然
嘆曰公之於詩文可謂至矣今世
能言之士非不多也然淺則及俚
華則少實是無他徒從事於末而
不知其本之過也公爲小喜讀書
綴文冠而擢第未嘗一日捨筆硯
年二十七入聞河南二程先生之

遺論皆先賢未發之奧始捐舊習
朝夕從事於其間既久而所得益
深故發於詩文自然臻此非有意
於求其工也使其得通顯於朝廷
施諸潤色而見於事業必有大過
絕人者不幸位不媿德雖兩入東
觀三爲尚書郎卒不得以其所長
發舒又不得年而沒天人之難合

也如此可不大息也哉雖然人定亦能勝天故公之嗣子今南康太守熹能紹公之訓早踐世科而益莫志于伊洛之學安貧守道深山窮谷之中者三十餘年

明天子用寵嘉之即其家拜二千石君懇辭不獲命強起視郡事逾年而政成訟簡一旦走介二千里書

抵予曰熹先人遺文江西遂將刊行而未有序引冠篇首先友盡矣不孤之惠誠有望於門下敢以為請予覽書悚然追思東軒之集恍如隔世而緒言歷歷猶在公墓之木既拱而予蒼頽白髮摧然其亦老矣愴歲月之不留慄餘年其無幾為之感慨不寐者通夕而病憊

廢書筆力衰退文不逮意獨念自
少至老遊南康父子間為最久相
知為最深得其父子之賢為悉故
不敢以不能為辭若夫公之詩文
自足以行後而傳遠豈待區區之
鄙言顧予蚤歲承誨迨老無所成
迺得挂名集端以託不朽其愧且
幸為何如哉公名松字喬年常齋

蓋自號云

淳熙七年夏四月既望河陽傅自
得序

常齋集目錄

卷一

古詩

卷二

古詩

卷三

古詩

卷四

律詩

卷五

國家圖書館 NATIONAL CENTRAL LIBRARY, TAIWAN, R.O.C

律詩

卷六

絕句

卷七

奏議

卷八

策
策問

卷九

書

卷十

序
記
題跋

卷十一

表
疏
啓

卷十二

行狀
墓誌銘
祭文

玉欄集

詩
歌



國家圖書館, NATIONAL CENTRAL LIBRARY, TAIWAN, R.O.C.

<p>卷之二</p>	<p>十一</p>	<p></p>	<p></p>	<p></p>	<p></p>	<p></p>	<p></p>	<p></p>	<p></p>	<p></p>	<p></p>	<p></p>	<p></p>
------------	-----------	---------	---------	---------	---------	---------	---------	---------	---------	---------	---------	---------	---------

司馬溫公誠書甚高所錄之

書亦甚多

惟此本亦甚入神意尤佳書

卷之二

十一

常齋集卷之一

嘯易劉氏家物

古詩

睢陽謁雙廟

幽陵胡羯殘中原列城束手天子奔天留巨孽毒梁
宋賊壘環堞如雲屯凶波滔天不可遏塞以束薪何
足論力憑孤墉阻其怒不爾荐食無黎元堂堂許張
勇且仁指揮羸卒氣愈振上書行在論賊勢想見憤
色吞妖氛人間貧賤容力避只有一死由來均二公
就此得處所至今日月名爭新遺祠突兀岸清洛英

氣凜冽橫穹旻尚聞餘蔭福茲上天假威柄酬忠勤
布衣尚懸千古淚肉食宜鑒當年因焚香再拜三歎
息九原可作從斯人

謁普照塔

孤塔驚霄漢晴影金碧眩重來得寓目歸枕尾殘汴
緬懷何姓人哀禱傾淮甸是身如皎月有水着處現
彈指遍大千何止數鄉縣惟應應緣地聊余共流轉
顛危悔靳馬善涉悟覓扇君看悔與悟只在一轉眄
至人獨何心示此禍福變當知夙緣定莫作邪道見
哀哉衆生愚積惡稔天譴云何一朝急賴此香火薦

我來適燈夕寶蠟明遠殿還措客塵眼重睹浮壇面
朝來塔上鈴告我風色便平淮一回首岸草失葱蒨

曉過吳縣

舟行有嚴程越國常曉發雙櫓兀殘夢起坐窺落月
人家岸野水霧雨籠遠闥遙憐瑣窻人欹枕聽甌軋

陪餘杭張無隅先生飲

先生結屋在人境門巷蕭蕭作冰冷紛紛入眼不入
意坐客千言不相領叩關聞我倒屣迎重解舊榻塵
埃生向來妙處久不吐一挽天漢崑崙傾共說別來
經世事我言所向皆兒戲胷中隗磊不用澆便有清

愁說無地士林師範六十翁先生合在伯仲中願言
終賜指歸處爲公敬作曾南豐

於潛道中

山行厭學確理策扶藪危綠野三兩家一息知可期
冉冉晴林端炊煙裊晴暉其民豐且樂恐是太古遺
那知都邑間百索困鞭笞繁華今何有半作道旁羸
度芙蓉嶺

幽泉端爲誰放溜雜琴筑山深春未老泛泛浪蘂馥
娟娟菖蒲花可玩不可觸靈根盤翠崖老作蛇蚓感
蹇裳踏下流濯此塵上足何當餌香節淨洗心眼肉

餘功到方書萬卷不再讀晚歲窮名山靈苗從穿斲

信州禪月臺上

玉峯點寥廓霄漢疑可梯玉水環城陰灑灑方拍隄
曾臺擅二美吾策一時携何當蠟吾屐更欲照以犀
壁勞不相赦竟類窮途迷我生麋鹿余不羨駕輅驪
向來丘壑懷語發人所詆長安黑頭公玉勒朝金閨
山林出戲言廣已無端倪誰收遮日手歸把耕雨犁
紛紛塵土中等是舞甕鷄頗聞山水間幽子飯藿藜
行當踐此語絕境同攀躋

愁說無地士林師範六十翁先生合在伯仲中願言
終賜指歸處爲公敬作曾南豐

於潛道中

山行厭犖確理策扶歌危綠野三兩家一息知可期
冉冉晴林端炊煙裊晴暉其民豐且樂恐是太古遺
那知都邑間百索困鞭笞繁華今何有半作道旁羸

度芙蓉嶺

幽泉端爲誰放溜雜琴筑山深春未老泛泛浪蘂馥
娟娟菖蒲花可玩不可觸靈根盤翠崖老作蛇蚓蹙
褰裳踏下流濯此塵土足何當餌香節淨洗心眼肉

餘功到方書萬卷不再讀晚歲窮名山靈苗縱穿斲

菖蒲服之通神
令人聰明健記

信州禪月臺上

玉峯點寥廓霄漢疑可梯玉水環城陰灑灑方拍隄
層臺擅二美吾策一時携何當蠟吾屐更欲照以犀
塵勞不相赦竟類窮途迷我生麋鹿亦不羨駕輅驪
向來丘壑懷語發人所詆長安黑頭公玉勒朝金閨
山林出戲言廣已無端倪誰收渡日手歸把耕雨犁
紛紛塵土中等是舞甕鷄頗聞山水間幽子飯藿藜
行當踐此語絕境同攀躋

送深師住妙香寺元住雲溪

道人捨幽居誰管溪上雲此身自雲耳遑暇南北分
頗聞妙香山天花雨繽紛宴坐丈室間歷亂舊衲紋
山前路悠悠山後水汶汶應觀川途客念我奔走勤
豈無香火緣他年往相群飽食跛鐺飯稀摘幽澗芹
當令桃花臺白社掩前薰

坐睡

坐久睡屢兀手失未了書清風脫然至心醒得我娛
起看孤隙光了不移錙銖云何短夢中萬境生須臾
嗟彼市朝子百巧營其軀安知非夢役過眼滅無餘

至人有達觀那與世賢愚不須無言子同上崑崙墟

遊山光寺

寺藏兩山腹路轉百步陰登高試病脚掬冷清煩襟
敗壁龕石刻歲月不可尋唯應查公石俛仰閱古今
屋古困枝柱摧頽力難任何當咄嗟辦嗣彼鍾梵音
興衰豈關吾得酒且滿斟歸路有溪月攬之醒吾心

送建州徐生

人羈天地間誰非一浮萍泛然偶相值便有離合情
君家武夷下歸路塵眼明我生愛山者夢寐秀色橫
秋風送客去把手更心傾亦逢山中人爲我寄此聲

贈覺師

覺師儒門秀脫屣世故早那知軒冕味夙悟心已槁
唯餘章句習心境時相惱如人生於齊而卽楚鄉老
雖遭楚人咻微音或清好固無益生死亦未妨至道
家山亦何有翫麟衣間窰叢林選佛場一擲想盆倒
云何戀故居俛仰待華皓他年空手歸子語吾爲老
幸分曹溪水萬劫付一澡

休寧村落間有竒石如彈子渦所出者宜養
石菖蒲程德藻許以餽我以詩督之

君家綠溪上岸曲溪成渦渦間石無數水感相蕩磨
誰嘗掬而戲一一印指螺我欲往取之擁此菖蒲巢
石罌注新汲幽姿發清哦夫子許餉我往督書已多
願言速寄與起此泉石痾

效淵明

人生本無事况我麋鹿姿一墮世網中永與林壑辭
此行獨何事豈不爲寒饑弱歲慕古人頗覺世好卑
那知齒髮邁終然此心違春風到山澤魚鳥亦知時
吾行何日休流目瞻長岐且用陶翁言一觴聊可揮

酬馮退翁見示之什

我家大江左江水日夜東遙瞻發源處迺在西南窮

相望邈異境正北一水通故令我與子迹遠心自同
我生寡所諧強顏紅塵中倦飛矯歸翮饑吟咽寒蛩
獨欣得吾子萬慮一笑空時時出秀句醒我如風松
當知山澤臞不鄙犀角豐彈冠實伊始此生各飛蓬
卜隣固未必卽事聊從容

戲答胡汝能

我生苦中狹與世柄鑿乖平生素心人耿耿不滿懷
汝能伯始後遊世如嬰孩相逢握手語便作墳笈諧
時時笑謂我如子患未涯執古以規今求合誠難哉
涉世幸未遠子車尚可回我介足怨忌君通絕嫌猜
不見山巨源雍容居鼎台不見嵇中散絕交自可哀
賢愚心自了短韻共一吟

謁吳公路許借論衡復留一日戲作

幽獨不自得駕言款齋廬殷勤主人情投轄恐回車
轄亦不須投此去將焉如唯憂酒錢盡使我詩腸枯
會合曾幾何可復自作踈更當留一夕帳中撥異書

新秋

幽人無與娛耳冷百不聞新米熟未知但覺市酒醇
滄洲散秋色山水逾清新一醉不忍獨念我存故人

道中得雨

我行野田間吁嗟連數村千山收宿雨谿作黃梅潭
漸看風葉底一洗龜拆痕餘功被行客稍壓旱塵昏

道中

驕陽父自殺一雨蕩龜拆田夫夢亦好翻隴已幽咽
朝來喜相語一飽心已決翻翻風葉亂孑孑露芒白
去年禾欲秀積潦滿秋澤今年豈堪旱束手就溝壑
我生拙謀口藜藿甘如蜜向來真過計憂民豈吾職
赤子天可憐嗟人獨何力何須事兒戲合杏來賀客
稍欣新稻熟杜酒行可覓當同扶路翁醉歸舞南陌

陳伯辨爲張氏求醉賓軒詩

前年谿上秋風時主人酒熟烹黃雞歸來醉倒睡便
着父老喚起牛羊蹊此生一醉寧易得未辨身爲貴
人客征西將軍爾何人那用尊前驚墮幘却來閩越
再經秋聞道軒名誕已流懸知得酒推不去此客有
轄何須投今我正爲奔走役空想題詩滿高壁若逢
落魄姓回人爲問何時定相覓

書窻對月

天公自厭雨一夕開寒晴霜風淨曠野洪落有餘聲
饑鴉得林靜霽月縈窻生燮開睡眠色一洗空花橫
故人千里餘壺濁誰與傾遙知勸影盃共此通夕情

今冬有奇事三見非玉英明年谿上路誰餉雨中耕
宿野人家

夢裏滄波搖一葉覺來正受肩輿兀人家一宿晚可
投新席槁梧香更滑霜前權稭收百畝稚子新能牧
鷺鴨我生本是箇中人挾策久矣猶能說

度石棟嶺

我行欲安適東馬踰山樊谷深不可瞬危磴爭榛榛
坡坳兩山間寂歷三家村茅簷青裙婦蓬髮新烟昏
敲冷那可飲分我一掬温郎樵晚未歸客至不與言
不奉沙頭卮肯投柳下門作詩配國風行者式其藩

用退之韻賦新霽

春泥窘幽步苔上屐涼少新晴一褰衣綠葉蔽啼鳥
方塘灑宿漲古鏡窺清曉華顛忽自笑綵羽墮驚矯
瞻言雲中耕縹緲寄脊繞歸把東舉犁此念何日了
送金確然歸弋陽

昔我雲溪居送子雲溪濱重來問何時笑指谿上雲
一列四周星坐此世故紛衰顏兩非昔華髮聚可耘
我纏風樹蕪終日無一欣子乃水菽憂尚此奔走勤
對牀語未終懸知便離分霜風吹客袂別意如絲棼
子歸葛陂上去路接鄉粉歸夢尚隨子何當歎離群

至節風建州會詹士元

嗟予身百憂佳節過空憇客愁隨綫增歸思與灰動
當年從子日未覺百慮重高堂遶牀呼一擲有餘勇
那知客天涯相對寒骨聳歲月曾幾何鬢絲今種種
忍饑山藥煮附煖地爐擁深箴斷還往衰病脫拜拱
興言望鄉關雲物方鬱滃空餘相屬意盃酒久不捧

用前韻答翁子靜

客心旣岑寂節物亦空惚幽籬菊初暗深壑梅已動
古人傲尺璧顧謂寸陰重欲從夫子遊掣肘愧不勇
松高節磊砢鶴老格清聳當知山澤臞誰羨將相種

一官戲人間叢書以自擁微言聞緒餘三歎手輒拱
青天本寥廓不受雲霧滃願言瞻清明茗盃不辭捧

微雨

端居身百憂况乃貧病俱天公頗相哀雨我蔬藥區
曉晴新青勻日薄生意蘇衛生固未必一飽行可圖
故園天一涯茅荆誰爲鋤崢嶸歲云晚此念當何如

寄題叔父池亭

一壑久藏勝數椽忽開亭方塘蔭瓦影淨見魴鯉行
主人有嘉招轉柁失高城不知幾搖兀杙舟上崢嶸
尊酒酌芳渌園蔬煮柔青翩翩射鴨弓一笑翻綵翎

那知海陬姪斗粟忘歸耕餘生信萍梗歸夢識林垞
漲水有回波故鄉豈無情一醉會有日因之濯塵纓
贈謝彥翔建安人九歲異人與藥至今不食
建安有梅子真升仙處

我本世味薄寸田足自營年來荆棘盡稍有黎棗萌
但恐骨相凡未敢希長生陳留達人後未盡犀角盈
舊遊記三山幽夢徹九清余來三十年但覺膏粱腥
幽尋飯綠髓默卧誦黃庭顧我塵土中深慰夙心傾
仙人吳門卒解后煩寄聲相期朝金闕鶴馭何時征
考亭陳國器以家釀餉吾友人卓民表民表

以飲予香味色皆清絕不可名狀因爲製谷
曰武夷仙露仍賦一首

二年飲水閩中村忽見玉醴傾巒尊涓涓醍醐灌熱
惱耿耿沉瀼明朝暎旱塵久漲城市暗渴夢欲挽江
湖吞何人遠致雙鯉信知我來扣羅雀門不須邀月
已清絕尚恐熨齒當微温要從華池汲真液豈獨玄
鬢孳愁根微芒已識校轄客斌媚似返當壚魂竒功
誰續伯倫頌妙意要與淵明論胷中我自有涇渭筆
下君已傾崑崙詩成寄與約他日飲君與我空瓶盆

久旱新歲乃雨

高田土可麓下田不受犂遺蝗憂插啄况乃麥未齊
赤子天自憐溝壑忍見擠雨逐新歲來停雲忽淒淒
莫辭三日霖爲作一尺泥汪汪既沒膝灑灑仍拍隄
漸看簑笠出笑語喧畛畦我欲與寓目父老同攀躋
此身群萬生擾擾舞甕雞曾亦無幾求脫粟配羨藜
永言故隴耕老眼路淒迷好收斂版手鋤耨歸自携
春日與卓民表陳國器步出北郊

灼灼桃吐華濯濯柳垂縷芳菲挽人出春力乃如許
嗟予閉門客佳節過不數不因可人呼那得幽步舉
客如山陰勝詩作斜川語誰言一尊酒妙處合千古

歸來讀殘書耿耿霜月苦空餘流落心三歎非吾土

蔬飯

蕨拳嬰兒手筍解籜龍蛻薦羞杞菊開采斲烟雨外
嗟予飯藜藿咽塞舟泝瀨朝來二美兼一飽良已泰
克腸我誠足染指客應慨平生食肉相蕭瑟何足賴
王郎催牛炙韓老憶鯨膾俠氣信雄夸戲語亦狡獪
我師魯顏子陋巷翳蓬艾執瓢不可從一取清泉酌

戲贈吳知伯

條侯得劇孟吳楚坐可馘我知無能爲失此一敵國
偉哉竒男子俠氣橫八極書生復何者翫麟老筆墨

刺口論安危事往竟何益匹夫嘯空野驚塵一方塞
區區空有意浩蕩洗鋒鏑何如吳王孫語輒面浮赤
交游得朱亥負販鄙膠鬲腰間鉄絲箭上鏃紫塞翻
笑指蛇豕區滅此而後食諸公未備知欲薦恨無力
明日我過君烹牛呼社客當書游俠傳令子姓名白

送僧

空中世界紛河沙不知底處爲天涯乾坤百億在指
掌觸處與子同一家云何猶作去來想千里一跌毫
釐差坐令契闊費星紀嶺雲欲寄山川遐撥眉相對
此何日丈室淨掃餘天花詩豪辨舌久投閣萬竅寂
歷風無譁爲君遊戲出三昧妙處那復相聱牙往將
妙響應空谷一任飛錫凌蒼霞

招民表

清眠有味日方永襜褕妨人推不省疾草尺書招故
人一水未濟豈非命此身何啻千金直天下未可兩
臂等垂堂之戒其敢忘晚識風波失前猛天憐我輩
少如意曉起屋梁飛倒景側身鳥行溪上路遙知倚
筇喚烟解信眉相對真夢寐豈不惜此一笑傾莫談
世事令舌強快讀新詩頻首肯與君好惡真磁鐵失
足塵途若爲騁北憲風月夜吞吐持此邀君共幽屏

淨洗多生內熱塵更有僧廬千尺井

秋懷十首

一

秋風來幾日我髮白已多千林了未覺奈此一葉何
宴坐閱流光一眄寄庭柯寒蟲獨何者唧唧夜自歌

二

塵埃地上臣天闕無力補夜叉呵九關嘗膽真自苦
寄牋東南風儻得蜚廉許尚當求妙斷君氏無乃魯

三

蒹葭西窻下蕭艾病其根白露墮秋夕美惡兩不存

寂寂芳畹空離離幽僻昏物各信所遭此意誰與論

四

月林踈愈明露草淨可拭飛飛螢透照軋軋蟲自織
移燈檢書讀千載如經夕微言契夙心妙解失陳迹
文章事雕琢回視真兒劇世無楊子雲此理誰見直

五

宴坐自觀我中深抱天機從知月勝火胥失兔與蹄
大虛同一如浮雲渺何依悠然淵明心千載與我期

六

林臯一葉脫靜士最先知自我抱茲獨悠然星氣馳

乾坤一逆旅鼎鼎竟何爲
枯榮俯仰中兒輩浪自悲
青雲渺難必白髮不可辭
得飽良已泰雨畦瓜芋肥

七

了翁卧淮楚德望臨一世
憂時九迴腸醫國三折臂
四海一滔滔揚湯不止沸
斯人尙可起姚宋何足繼

八

反身聖可作自恕惡易盈
昨非往莫諫今是來足程
幽人歲晚栗樹者夷跣拜
慨然釋七歎諒知負平生

九

甘菊卧風雨枯荷暗池塘
達人聽榮悴志士費感傷

亭亭岩桂花已作宮槐
黃諒無青霞客誰與媚孤芳

十

江海有一士補袞抱經緯
帝衣日月明袖手久不試
九閩隔雲雨誰肯借一臂
絃急而調卑此歎同萬世

和謝綽中觀瀾亭

方塘灑宿漲曲澗來飛湍
光涵鬱藍天瀕洞碧玉寬
小亭塵土外瓦影浮朱欄
霜渚寫秋色烟林養漁竿
佳人秋霞衣皎皎明月冠
欲濯且無塵隱几得妙觀
海若眩河伯等在蝸角端
那知坳堂上盃水生濤瀾
雲間謝公子五字冰雪寒
展讀勝圖畫經行記林巒

九垓未暇遊據殼諒匪安一到定何日眷焉抱長歎
寄題陳國器容膝齋

淵明乃畸人遊戲於塵寰南窗歸徙倚宇宙容膝間
豈不念斗米折腰諒匪安是非無今昨飛倦會須還
國器青雲姿逸志追孔鸞曲肱數椽底尚友千載前
規模琴書室料理松菊緣心遊萬物表了覺函丈寬
念君方適越昔至誰云然要知丘壑志本出軒裳先
瑣闥麗宸居追飛不云艱回車莫待遠泉石聞此言
約金確然不至

門前北風裂我襦知君未能出僧廬忍看烟雨凍梅
膚南枝北枝香欲無可無一杯相煖熱道人酒熟不
用沽區區濡沫浪辛苦安得共似江湖魚

確然雪中見過

雨斷雪將墮天低雲可攀誰穿東郭履來款山陰關
故人金公子身窈心甚閑道機久純熟世味飽險艱
一杯不可緩輒此雙脚頑未忘膜外境忽湧曾中山
白眼槩六合誰云書生孱萬類宅天壤細觀真市闐
攫金掩醉眼倚門眩朱顏哀哉兒女態今古可笑訕
坐令一世豪偃蹇棲茅管先生談天舌久挂屋壁間
置之且默坐觀我無所還紛紛造物機顛倒轉愚姦

於我何所歉莫歎筆瓢慳

常齋集卷之一

國家圖書館, NATIONAL CENTRAL LIBRARY, TAIWAN, R.O.C.

常齋集卷之二

古詩

書僧房

陸續流泉自成句
來擁紅爐聽山雨
道人更有深深處
詰曲如珠蟻絲度
几研無塵寒欲霧
雕盤篆破孤螢吐
味如嚼蠟那禁咀
茶甘未回君莫去

題蘆鴈屏

征鴻坐何事
天遣南北飛
蕭然如旅人
無情自相依
孤鶻吹欲折
秋風不勝威
冥冥一孤鶻
空費弋者機

新安朱松齋年



寒聲落烟渚相應不我違嗟我識此情手納空歎歎
安知丹青師落筆迺庶幾畫形孰不工畫意識者稀
他時因吾句購此千金揮

題臨賦軒

蒼山圍岑寂下有一水奔閉戶卧風雨束蒿翳籬藩
寥哉祇樹人心遠忘世喧此身自遠廬長物餘此軒
鳥語幽夢斷香橫經帙翻未成借路行自要窺溝浚
遠師淵明意不愧靈徽魂月度了無迹風行偶成痕
心境兩清妙尺喙何由吞賦詩安所取碧雲未足論
何當拂朱絲寫眇絃吾言

答保安江師送米

不見道人久天涯歲二除朝來食指動忽接送米書
念師折脚鐺五合未嘗餘雖無覆餗禍尚有乞食逋
云何憐孤客日受飢火驅未曾貸監河矧肯索胡奴
誰言斗升意矯矯超萬夫嗟予事筆耕輕棄南畝鋤
恩煩方外客此計良已疎何時事粗了歸葺五畝居
生涯寄緯竹豈即非良圖不爲泉壤蚓願學江湖魚

陳德瑞饋新茶

空山冥冥雲霧窻春風好夢歌殘缸朝來果得故人
信微凸而么犀銜雙貴人爭買百瓔珞此心兒女父

已降坐觀市井起攘袂念之使我心紛龐領君此意
九鼎重雖有筆力安能扛何時來施三昧手慰我渴
夢思長江

次韻希旦喜雨

驕陽挾酷暑何啻虎而翼高田土可麓况迺耕與殖
風伯真可訟雲合吹復折那知下土民糟粕配橡實
古佛棲巖隈旱沴豈吾責應緣賢令尹閔雨丐法力
積陰暝山谷流潤淒几格朝來賀客散置酒浣愁疾
古詩成雲外險句動潛蟄旋看蓑笠出競喜溝澮溢
誰言令與佛念我一何悲嗟我困蒿藜最覺民可恤

何當問牛喘免使訴白失九關虎豹守懷此欲安適
誰哉此心同吾飽將何日

古風二首寄江明道

紫蘭初茁芽深壑終自秀航鱗蕭艾中不采則誰畚
兒曹逐紛華壯士保窮陋應知此調同萬世無先後
又

俗士白人眼從誰明此心不欲故人見訶我車徹深
蕭然江上廬客卧詩書林得句不相寄誰賞氣駸駸

建安道中

吾生意行初不謀泛泛何啻波中鷗携家來作閩海

夢三年客食天南陬我先人廬在何許大江之左道
阻脩奉新家有手足愛隻身歸掃先梧楸旋當來此
營斗粟南北顛倒無時休此心轉與世事左自作磨
蠅將誰尤安知不滿達者笑窮達一戲如觀優咄哉
吾語亦已墮且與造物同浮遊

書事呈元聲如愚起華三兄

隱吏朱墨暇飽眠北窗風時呼方外客逃暑尊酒中
寂寞杜拾遺四壁口不供坐取盤飧疑哀哉豈天窮
何如平生友磁鐵間不容每懷千里駕今作五斗逢
吏行散晷鴛楸局收轡龍共話十年舊事往如飛蓬

浮榮真一戲何者吾嘗通應須河漢語淨洗芬華曾
僕夫適在門客贈尊亦空更爲後日約及此芙蓉紅

寄題起華書軒

貞觀盛德後餘慶不與失德固隔海家欲縱燕山芳
教子嗣先訓開軒畫中堂地偏市朝遠几淨書簡香
先生陳太丘針粟百憂忘孝子真羯胡不聞觸屏僵
一變憂俠窟遂成鄙魯鄉下車里門外他年看諸郎
坐上紆素髮說說立冠裳我詩自可絃請以侑壺觴

梅花

山深春未動沙淺水欲冰玉梅於此時靚粧畧無朋

露葉欲的燦月枝挂鬢鬢儼如江漢女可愛不可陵
他年江南路曉粧犯嚴凝尋香烟雨中橫斜挿茱萸
却數今幾日癡如秋後蠅北嶺枝欲空誰與扶一登
聊分窺水影依我照字燈坐使惜花夢臨風脚騰騰
昔如夢中蝶今學桑下僧了知菩提長念起吾何曾
十一月十九日與仲猷大年綽中美中飲於
南臺

空山欲雪雲冥冥玉梅半開吾眼青此身垂欲走塵
土聊復舉酒看嶢嶢折腰向人不知耻故園可鋤在
千里金昆石友一開眉珍重道人相料理楚江東岸

先人廬竹君安否父無書歸歟何時應白首我食吾
言如此酒

春社齋禁連雨不止賦呈夢得

歲豐農猶飢歲惡何可說哀哉半菽氓罪歲同一舌
年時旱塵漲臘盡不見雪青皇忽雨我萬頃麥苗活
令尹民父母肅整思手挈祈年穰齋居有酒不忍設
那知桃李徑狼籍香泥滑芳意一如此坐恐及鷓鴣
郊原佇開晴出勞南畝儘秋成已在眼一醉宇宙豁
更呼前裙人勸此側帽客和公斜川詩磨石鏡歲月
吹韻夢得見示長篇

雉馴不因媒鳩暖自呼婦詩成桃李陰知是霹靂手
簿書我亦厭丘壑渠自有却憐支離疏飽食得薪想
俗夫嘗世味甘苦半噦嘔知公超然處心跡兩無垢
愁陰老芳物盡烏故相誘浪蕊費收拾柔條可結揉
豈無我輩人一醉開笑口那知市門底客倦枕兩肘
眼高可人稀命蹇年運偶平生願執鞭見謂予小友
細觀愷悌心宜在帝左右却來塵埃中寂寞對五柳
鷺音藏鵠羽正待荆雞剖學政容窺譜問字當載酒
虛名翻誤夢恐坐箕與斗言詩終不稱永愧賦瓊玖
夕雨短句呈莫得

身閑書有味吏傲俗不親小窻據物表掃盡心眼塵
令尹垂珠玉敲門喚行春作意向芳物吾車曾未巾
愁陰入病骨鳩婦聲亦嗔冥冥三日雨桃李迹已陳
空餘深枝間一一青子新穠芳殿春晚猶堪慰佳辰
醪醖曉妝靚芍藥醉臉勻日萼簪嫋嫋風卮倒鄰鄰
言當呼短舞抵掌回雙顰年來得相從稍覺安沈淪
豈不掛俗事察公極清真眼中醉鄉路風味良獨醇
流光不容玩尺璧何足珍漓俗益可厭願言勤問津

牡丹醪醖各一首呈周宰

珍藪塵朝露無人羞欲敬春風醉香骨綽約不自持誰

憐曲肱人一笑遺穠姿不言意可了君醉當勿疑
妝淡洗逾靚肌香薰不成皎然月露姿一笑午景晴聊
移夢蝶牀相對戶不高誰令風雨暴睡起春縱橫

次韻夢得淺紅芍藥長句

十日愁陰病不出卧看春歸無計惜詩翁遣送淮海
春衰眼熨開雲霧拆胭脂注臉勻未遍肉紅借酒生
真色了知造物着意深傾倒春工不餘力年來不顧
溱洧女載酒非公復安適且將妙句寫餘妍欲立佳
名付精識一春頗困歌酒汗回首紛華三太息願言
乞與洗心方歸對爐香誦周易

宿禪寂院

夢中一葉搖江湖因睡不覺身藍輿眼明佛屋麗丹
碧瓦鳩鵲鳳凌空虛波氏日者困苛索半作頰尾相
濡魚鵝鵝數畧兩不置肯念竭澤明年無道人誰與
辦此事斤琢千指開渠頰疑如幻三昧力上方手攬
歸吾虛了知古本法輪轉咄嗟檀施爭奔輸不辭割
愛一念善誰謂歲惡窮民愚書生袖手對溝壑力不
能援心煩紆事無大小成者少談說治亂何區區調
單絃急誠齟齬鑿圓枘方尤闊踈古今罪歲同一口
撫掌一笑皆愚儒

詩約范直夫遊萬葉寺觀瀑泉

萬侯隱下吏風尚本丘園身投攬全市囊書以自藩
炯然如孤月不受黃流渾要知句律工競病何足論
我生群未俗涇渭非一源同心無楚越傾蓋如弟昆
人生各有役不暇捧一尊風蒲掛南浦念欲東南奔
對牀定何夕青燈照晤言懸知知詩處千尺銀河翻

次韻夢得見示之什

居楚求齊音美惡不同土喧逐俗物華群復有佳處
時從玉璧人商畧窮萬古詩如栗牛戲誤得摩頂許
望道渺逾遠久生真新萬忍持尺璧陰空作秋蟲語

微言儻傾倒河漢濯肺腑向來說詩口自此行可杜

送甌寧魏生赴武舉

生後與金虜戰有功戰沒於耶

建安少年請纓客橫槊賦詩兩無敵辭家去作入彀
英氣拂天狼夜無迹廟堂尺箠鞭羗胡智名勇功付
壯夫引弓沒羽世自有敢聞上策當何如

陳仲仁止止堂

以我有限景逐彼無涯知失足踐畏途投身試危機
舟車日奔覆定無丘與夷萬古踐此轍嗟我與誰歸
仲仁古靜者懷璧照褐衣名途嘗一戲回首羞前非
心如得坎水不受狂風吹功名憂不免當復定所之

請觀本無作今復止者誰築堂市門側著書園不窺
蓬藿深一丈圖書周四圍時有好事人載酒問所疑
攫金奮敏手倚市誇妍姿回光時自照何者非吾師

送志宏西上

九州眼一槩餘子真瑣瑣嶽立培塿中喜此高峻峨
如公我輩人取友亦到我揮毫賦垂天風雨卷蓬顆
相期八表遊未覺夙心左解龜醉江閣酒面山月墮
起瞻帝鄉雲感歎不成坐何須飛霞佩自辦凌風舸
瀛州渺溟渤萬里一掀簸緘詩寄天涯秉燭對新火
那知市門仙斗祿事么麼空餘腸九迴上疏何日果

有懷舍弟逢年時歸婺源以詩督之

木落天未霜君歸定何時相思如驚鵲中宵未安枝
夢中見阿連鏘然詠新詩寤驚衰葉翻謂是步屨移
攬衣下中庭風露浩森瀰遙知客衣薄歸來一何遲
平生短檠燈相對忽解頤萬古一舒卷佳處良在茲
是中及物心上與稷契期援古以自例自笑無乃癡
夜叉叱九闕側足不敢窺坐令一寸心目抱二柄疑
遲君商畧此蛩得兒輩嗤况乃綠髮親倚門鬢欲絲
豨膏非鳳喙車轄無可脂再拜壽百分斑衣舞參差
秋芳未云歇采采黃金蕤萬鍾不足樂古人豈吾欺

九月十七日夜度蔡道嶺宿弥勒院

月出度松嶺露香非羽衣肅肅夜氣清蒼蒼烟徑微
川光浴秋容華影挂夕輝冰輪碾空闊飛轍無因依
擬掬星渚波心觸天孫機倥佯何時見沆瀣聊獨揮
未應青霞志即與素願違稍休塵外軫憇此巖下扉
清吟寫萬籟妙想絕百非不須河漢言盡解紛華圍
飛仙亦戲劇玄學乃庶幾鰲山切丹極歲晚行將歸

遊鄭圃

城郭不去眼而得林壑娛低回撫壯心欲吐無與俱
鏗然一枝筇細磴爭椎魚挽衣徑與飲不省誰爲吾

女貧苦難妍

女貧苦難妍士貧苦難高了知論此者不識一世豪
此身百斛難流俗欲手探寧當捨其中局促計所遭
頗疑有若人骯髒便道高者傑一丘壑光景不可韜
斯人不我忘空復踰垣逃軒裳亦云華唾去如腥臊
哀哉夸毗子擾擾冠猿猴恬無濟世心悶默死滔滔
竭來事斗祿俛仰身桔槔一官戲人間幾何非饕餮
誰言眷此憤擲去輕秋毫區區欲驕士一哭嗟兒曹

谿南梅花

嶢嶢石逕鳴枯筇意行詰曲無西東心知幽壑梅已

動一枝寄我曾未蒙暗香橫路忽驚顧冰蕊的皜蠻
烟中有如佳人久去眼邂逅相得情何窮疏畦壓霜
翠羽亂已覺雪片棲手茸嗟吾幸此來已晚攀條嚼
蕊聊從容玉仙遊戲下塵世絕艷一洗朱鉛空不知
閨苑在何許叱回風馭無忽忽溪寒沙淨迷俯仰坐
待山月來朦朧豈無尊酒相煖熱錦裘起舞如驚鴻
仇池老仙羽化久妙曲三疊餘仙風歸時醉倒不知
成一作和明日來此誰能同

再和求首座

道人昔曳羗廬筇五老負雪溢江東犯寒貪覓玉梅

句雖有衲被何曾蒙歸來苦雨熟梅子卷械深卧蠻
烟中詩傳絕境忽入手置我鄉國情何窮十年不踏
江上路漠漠海氣昏貂首異鄉歲晚慰流落一笑賴
此冰雪容嶠南絕唱誰敢和騎鯨人去塵寰空崑墟
下視堪笑閔雕琢肝腎愁忽忽那知幽子雲雨上風
斤玉斧修腫朧讀詩今我一回首杳若目送孤飛鴻
何時晤語折鐺側坐聽萬籟號天風拈花特地兩顏
解他時與子真參同

奉酬令德寄示長句

閑官屋舍如幽棲寒苦餘業償益藿忽聞鵲聲作破

竹尺書入手誰所齎交游勝絕似公少矯矯鸞孔依
蒿藜青冥側足在咫尺誰使狡獪捐其梯秋風溪上
共樽酒擺落羈束忘矜畦紅裳起舞意未足缺月銜
嶺星河低只今跌宕走塵土清夢往復無山谿新詩
驚怪爛盈幅筆力拘怒蟠虹霓遙知繫磚小窻底得
喪已著一理齊此生同困造物戲未覺與世誰雲泥
雖無絕唱追白雪賴有妙契如靈犀一笑從公豈無
日挽袖相屬空玻璃不須俗物敗真賞但覓佳處同
攀躋

答林康民見和梅花詩

寒崦人家碧谿尾一樹江梅卧清泚仙姿不受凡眼
汗風歛天香障烟棗向來休沐偶無事誰從我遊二
三手彎碣曲逕一携手凍雀驚飛亂英委班荆勸客
小延佇酌酒賦詩相料理多情入骨憐風味依倚橫
斜嚼冰蕊至今清夢掛殘月強作短歌傳素齒韻高
常恨句難稱賴有君詩清且美天涯歲晚感鄉物歸
歟何時路千里枕樓一笛雪漫空回首江臯淚如洗

上丁餘膳置酒招綽中德繫德懋逢年

我生無幾求畢願老葭茨誰令事斗祿飯糲羹不糝
書生亦可憐微物有先感朝來食指動膳肉豐咀啖

恭惟魯司寇道大長坎壈空餘祠千載不救陳蔡慘
水言百世師願學吾豈敢當飢不忘歌既飽復何憾
安能如王孫長物貯願領急呼講肆人一醉捨鉛槧
相携桃李徑歷亂蹴紅毯言強三尺喙氣溢一身膽
平生超然處獨嗜逾昌歎詩成持似君莫遣兒輩覽
用綽中韻送正位正臣欲歸隱而無資故廣
其意以告識者云爾

華裾錦領烏紗憤氣蓋當年五陵俠骨中隗磊不可
平拂衣歸來抱長鋏軒然寄傲楸枰間長恨坐隱非
雲山相逢笑我春微粟我歸未可君何難世人錢作

牛吼音誰能立談壽千金空令擁鼻誦招隱知君心
在仙峯陰故山自欲無歸期作詩但擬淵明詞却愁
他日林下信千里寄我唯當歸

秋懷六首

庭柯一葉失風挾涼氣歸湛湛陂水青芙蓉脫紅衣
非無岑寂士句法妙玄暉獨懷履霜戒德人貴知微

二

真儒六經學文字聊解紛長孺棄諸侯漢庭相公孫
兒口乳未乾妄作黑白分誰能領斯會事往風中雲

三

導江自岷山源淺觴可濫下集大小川千丈水府暗
策策井桐源回回窻月淡後生抱竒志黃墨勤點勘

四

市朝富危機匹夫死憑何何如狎鷗子烟雨同一波
行藏各有趣不在相詆訶我師陋巷人千古冠四科

五

穿堵超玉繩影倒夜窻寂火雲一洗空月露清欲滴
幽人負痾卧起坐三歎息歸同對牀弟晤語永佳夕

六

揜窻耿不寐道人亦無怵故山新稻香粥魚響枯桐
夢中信了了推枕聞西風少遲穉金壯歸轡與子同

逢年與德粲同之溫陵謁大智禪師醫作四

小詩送之

丈室揜槐夏與君同卧痾平生莫逆人裹飯誰見過
躡躡起鑑井萬古寂不波觀心要知是造物如吾何

又

六年別故山松竹故無恙此身已天涯飄走復何向
清源老醫師矻樓出投杖勿辭一徃勤挹彼上池漲

又

石梁跨壑山永與方壺久憑君持一盃往酹濟川手
遙知相携處溟渤浸箕斗作詩問大釣猶有斯人否

又

山河我四大物我同一體誰為苦疾癢搔按不容擬
多生抱此念耿耿未云已那知知魚樂更有濠梁子
與陳彥時會華嚴道人偶書

屋頭烟雲屯屋下波濤喧團欒坐已久起扣丹霞門
客至苦舌強日擊翻無言元龍湖海士懷哉夙契敦
清坐鼎足峙妙語流潺湲君遊葦巖海貝葉手自翻
此心於身世鳥度空無痕笑我流浪中久披業識吞

讀書談古今綺語生禍根望道渺未見况迺躡其藩
職卑困掣肘見溺不得援未知造物心頗復哀黎元
近窺顏稷意未敢遽揜關躬耕亦細事會要五畝園
釋羈牛在牧駕鼓馬伏轅居然見優劣不比魚熊蹯
持問跣趺人一笑霜眉掀相携妙峯頂暝色窺遠村
解衣畧輩行班坐寒芳蓀欲歸意未已幽徑相與捫
蒼崖出玉醴不受瘴毒温願言同酌此我語庶不謾

書拚欄院壁

側身西來度千山列仙仙去空孱顏斗升自役應笑
我何苦語曲嬉塵寰歸耕無田仕難合疑此二柄首

鼠間摩挲崖石三歎息我心安得如汝頑

次志宏韻督成壽置酒

歸耕食吾言回首愧江水方爭楊子席誰置穆生醴
鄧侯傾蓋舊小寢蕤桃李走書納啗我涎迸齧唇齒
朝來獨何事怒色劇染指雖微射鴻遊顧有捩手鬼
平生談天口得酒便鋒起年來病不觴但要謳貼耳
真成畫蛇足足就酒空矣樊川吐怨句想見紫雲美
何時咄嗟辦一醉吾亦擬樽香聽群兒口實爭笑鄙
內弟程十四復亨歸省用綽中作二章送之
舅家今三世筆耕未遂秋後生抱竒志肯為塵盤留

先盧江遠城歸路柳暗洲勉哉倘有立離闕何足憂

文

讀書學經綸及壯吾已晚譬如抱宿春未適萬里遠
留君商畧此歸袖不可挽流光莫控搏力學副深願



國家圖書館, NATIONAL CENTRAL LIBRARY, TAIWAN, R.O.C.



常齋集卷之三

古詩

三月十日遊報國院小軒頗幽勝為名曰雙清仍書此詩

千峯收宿雨坐見空翠滴携筇出城隅試此腰脚力
竹陰穿窈窕僧戶扣岑寂小軒清樾底磐礴聊自適
闐然見幽禽百轉深枝隙即此與晤歌絕勝眼前客
幽懷曾冰結眞鼎不可釋忽如散春風回首無處覓
天遊失六鑿真觀了千息乾坤鼎鼎中指馬坐可一

新安朱松喬年

不知雙清老何者為心迹持問跣趺人首肯復面壁
山烟明欲合歸舸兀深碧此心除溪月回回誰復識

次韻謝綽中遊報國寺詩

掩關味詩書青簡亦已槁相携出東城及此風日好
僧簷覆谿淥共取一尊倒春此松桂陰不接車馬道
慇懃玩流光齒髮行且老諸公奠九鼎帝室欣再造
優遊客我輩放浪事幽討念君東山姿文字富天藻
風期在經綸彈冠苦不早寧知如子雲白首太玄草
丁未春懷舍弟時在京師

狂虜送死河南北王事遙憐弟行役胡命須臾魚在

鼎官軍低回鷲將擊渴聞天語十行礼尤覺家書萬
金直何時同乘江上聲萬里農桑吾願畢

五言雜興七首

側席憂宗周負痾頭岑岑又傳衢梁盜弄兵保山林
渴聞平虜詔蟄戶跋雷音欲舞恨袖短諸君獨何心

黃香卧講肆日蕪五畝園兒誦聲九籬未厭咽耳喧
古來避世士或隱車馬門云何北窻底默默對幽篔

聖門出高岱領畧千兵岑父矣暖姝子蠹魚槁書林
曾參一唯後曠古沈此音願君同鑽仰滿我初地心

四

丹白春事了灌木忽暗園卷書護岑寂幽鳥時一喧
起携無事酒往扣常關門豈無素心人之子不可諼

五

讀書評世故自許了無猜忽然撫機會往往鑿柄乖
時難既可歎道大未易涯歸來卧看屋吾意亦悠哉

六

湛湛天宇清宛宛穹蒼白投深得僧憲千嶂倚蒼壁

開卷與晤言炷香伴筆寂獨將萬里心收斂入尋尺

七

身輕客已去睡美體新浴南風吹好句歷歷韻松竹
雖云天耳聽擬以幽夢續不辨舉似人恨汝心眼肉

遊西峯院留別友人

兀兀掩關坐后土冒泥塗繁陰忽披猖懷哉歎離居
眷我二三子共此一日娛欣然忘華陋意行非始圖
圍竹粉黏帶弄泉雲遶裾共睹羊山祺不釣溫水魚
野色一以瞑歸舟相與拏豈無軟脚酒新熟不用沽
急景棄尺璧中原瞻立埽丈夫患不免低回竟何如

安能逐兕輩飛翔爭腐餘但憂着鞭子滯留嘲賈胡
飲梅花下贈客

憶撓梅花與君別終年夢掛南臺月天涯谿上一尊
酒依舊風卮舞香雪高情絕艷兩無言玉笛冰灘自
幽咽却憐造物太多事更要和鼎調人舌浮生蹤跡
風花裏鼠壤珠宮孰優劣且當醉倒此花前猶勝相
思寄愁絕

次韻和吳駿卿

學道日已媮平時心同嬾同懷能幾人
曉得吳王孫抱甕載真翰由來清廟質不賦白石爛

笑我塵土中坐受微惡絆新詩中音會天律度絃管
未能載酒問但作焚現歎况聞翻貝葉一悟了真幻
文章迺兒劇安用黑白判何時商畧此得酒不待勸
求道人自尤溪來三山出示同徐侯遊龍門
洞長篇因次其韻濟之時以檄走諸隘

阿將陸沈父亦復太癡絕未成安一枝况乃辦三穴
唯餘愛山意如水必東折首鼠今幾年顧影愧瓊瑛
那知龍門客塵底抱關闌虛簷日偃仰蒼壁對橫堞
柱藤危磴響濯足細泉潔束薪取竒觀滴乳當嘉設
摩挲石蜿蜒信矣耆舊說歟疑卷風雨凜若踐冰雪

遠追神清遊復作武陵別能詩有老休聯句媿前哲
相逢快吟哦疊々霏鋸屑三山今入羊瀛海僅可啜
崎嶇走林谷王事煩此傑擬結汗漫期更待揜搶滅
吳駿卿寄示和黃元廣詩多及古人為已之
學輒復次韻資一大笑兼簡元廣

四物覓安心駕言無停驅忽然休歇去本自一物無
那於前後際而有新故吾知津恨未達敢以偷自愚

又

君居泥自蔽隣客旅兩足詩成各超然不復念瓶粟
應憐市門客俯仰對流俗出言不嫵媚人瞋大於屋

文

我生非瓠瓜於世豈無情望道渺未見諒知負平生
將求控控獲奈何鹵莽耕饑壤聽造物吾願乃秋成

次韻鄧天啓遊南園

秋犬吠夷門誰能拊其背懷安壯士羞竊食替操耒
無由一當虜鬱々嚼齒碎故人何自來適與芳時對
笑我塵土中勃窣守闌闌城南出携手遠取韓孟配
心期汗漫遊目極汰寥內舞雩追點也峴首畧湛輩
豫愁君興闌復遣我心憤歸來疑夢斷清境皎不昧
哦君斜川詩汲井沃枯肺願言薦清廟勿賦風雨晦

徐侯以詩送山藥次韻

山中白玉延貴壓梁宋價筠藍出輪困了不煩造化
因傳競病句中的若神射頗念坐穩人鞍馬久不跨
谿橋梅欲動玉雪短枝亞何當全嚼蕊一醉山月下

次韻酬求道人

聽君話匡廬風月妙無價鑪峯忽在前俛仰疑幻化
新詩未出袖光怪炯如射懸知得力處臯可不足跨
家山為誰留鑿粥香糲亞我亦懷秋江波清鴻鴈下
求道人示詩粲然有江湖間道人風味蓋嘗
得句法於東溪可今以其韻作詩送之時將

如瑞峯期朝夕還吉祥云

癩可溢江濱覓句負光價君為東溪客伏鵠資妙化
想見箭鋒機相拄不停射伽陀入三昧湯史欲凌跨
常齋語清夜挂月松偃亞他年約相逢禪榻慎勿下
贈永和西堂道人宣和癸卯十有二月中休
日

蒼山抱岑寂文室掩虛白道人塵機斷宇宙一西壁
是心如焦穀浩劫永枯寂一句從誰聞投老承此力
相逢不相問未省誰主客咄去真俗人胡為來役役
彥時過永和見和拙句輒復次韻以發一笑

老諗不下牀，宵次紛黑白。彌明亦強項，得句斲負壁。
相逢復何事，一笑萬慮寂。新詩追舊韻，俯仰見筆力。
何時折鐺傍鼎坐，無主客區區。竟何補斗粟，真自役

甲辰七月二日宿永和寺用舊詩韻

湛湛天宇清，宛宛穹脊白。投深得僧窻，千嶂倚蒼壁。
開卷與晤言，炷香伴岑寂。了無魔嬈夢，皎皎知道力。
鳴珂綠槐影，想見下朝客。笑我守兵門，心形等相役。

寄陳陷元

我生少所可，靡靡世一律。如君素心人，指不三四屈。
爰與宵人遊，歸卧常自失。效尤起媮心，阿意增美疾。

低回強酬酢，高論形敢出。緬懷叅同子，蚤入伊洛室。
聞道旣先我，論詩又竒崛。縱橫談天口，卓犖扛鼎筆。
勝我何足云，論交敢自必。桓公肯見規，寡過行有日。
書來約過從，一笑彼蕭瑟。新涼宜燈火，永夜勘書帙。
豈無一尊酒，少促軟語膝。更呼小叢歌，未怕官長詰。
跛予占騎氣，千嶺秋田鬱。着鞭及清境，灑灑月華溢。

次韻張漕茶山喜雨

天公積憤何曾雪，遑恤茶工貪攬擷。無聊桃李困暎
暗，白鷺紅飛亂擷誰。䟽天漢下穹窿，苦厭風霾昏喘
嶮。行臺使者掃雲手，灑酒叢祠拜靈龜。歸來一雨動

三日溝壑遺民起垂絕豈唯槍旗各呈露更喜筍蕨
爭芽茁明朝擊鼓萬指集雲澄携麓穿曲折紅塵一
騎天容開顧渚蒙山坐銷歇帝觴嘗罷思苦口公如
子牟心魏關金鑿諫舌夜生塵回首山中記同啜

沙谿口望梨山

衆山如連環平野忽呀口孤峯插深雲氣壓萬培塿
區區何足傑落落終自負我行清谿曲鶴立倚筇屐
拂衣竟何時塵土坐自垢長梯弄玉井竒字窺岫嘯
心知不能去照水顏甲厚永懷山中人獨立誰與友
神交解此意長嘯震林阜

寄仁王求首座

片帆西借東風力回着三山春一色何人孤嘯月中
聞知是無塵岩上客三山武夷之宗支千岩萬壑帝
所規天憐傲吏賜我履恨不與子相諧嬉問法年來
定成市藤蔓遙知胃衣袂手攀荔子約同嘗絕勝林
間啄殘柿

汪彥允見和約遊東山作荔枝次韻

天工傾倒不餘力唯有荔枝香味色君家桃李要爭
妍腸斷髮絲禪榻客書生甕蘆天所支煮茗誇妓非
良規腹飢眼寒君不忍着詩喚作東山嬉冰盤絳實

光照市歸來香滿巫陽袂明日人傳玉蕊仙絕勝空
賦青龍柿

止戈堂

高堂巖巖面勢尊洞見萬井開重門元戎務簡玉帳
靜緩帶酌客娛朝昏憶初餞隸起篁竹一嘯千里來
黥髡將軍攬鏡媚巾幗何異搏虎驅狐豚只今休父
八州牧身佩重寄憂元元驚塵錯莫羽書密雖有美
酒誰同樽沈機且復長轡御瀝懇何啻血面論樓船
一夕飛度海漢家上將來天闔狂童束手赴烈火瑯
戈不污妖血痕坐譙飲至凱歌入船粟往哺遺民存

五其包裏高閣束止戈新榜真成言便當頻與方外
吏從倚風月星河翻幾年牡籥飛不守河濟逆氣腥
乾坤知公快挽天河手坐視黠虜方遊覓權輿閩越
聊小試寧復久此淹遐藩農桑萬里望公等願見四
海無營屯

侏儒

侏儒飽官粟適市行勃率但知隨衆笑了不見優拙
暮歸遭客問閤默羞齧舌心知續鳧悲慎莫充造物

中秋賞月

去年中秋雨野蘆淒薄寒驚塵暗一方客枕那得安

起呼對牀弟攬衣步踟躕握手仰太息宇宙何時寬
今年中秋月並海窺濤瀾坐看鬱藍天忽湧白玉盤
眷言雙峯客倚閭念衣單亦復取樽酒承顏有餘歡
天涯等牢落世路方艱難且遵秉燭語毋為泣河歎
停盃玩飛轍河漢靜不湍癡兒亦不眠苦覓蛙兔看
洲出暗潮落髮衰香霧溥佳句付惠連何時解歸鞍
記草木雜詩七首

月桂花

窻前小桂叢著花無曠月月行晦朔周一再開復歇
初如醉肌紅忽作絳裙色誰人相料理耿耿自開落

有如貧家女信美乏風格春風木芍藥穠艷傾一國
芳根維無恙歲晚但枯枿

萱草

水菽怡慈頰萬鍾亦土宜時從班衣兒蕤萱北堂下
穠華夫豈少愛此入風雅紛敷翠羽叢絳英爛如赭
諸孫遠銀鹿采摘動盈把誰言壺中春在此眉壽掌

紫竹

新移紫玉幹羅列才十餘枝葉一何病意色慘不舒
早久土膏燥抱甕愁僕夫雖無樵蘇厄苦欠雨露濡
我來侶魚蝦滄溟在階除月窻瀉水墨天風韻虛徐

誰言居無友此君良不踈三年為主人籜孫定紛如
他時報安否誰寄青泥書

茉莉

海上作重九菊揉青蕊香近墟買茱萸枯顆出藥囊
兒曹記土風歉事祈禳老夫未免俗聊尔答風光
災祥理不僭此柄孰主張譌言眩末俗吾欲案長房

吉貝

炎海霜雪少畏寒直過憂駢褐阻關河吉貝亦可裘
投種望着花期以三春秋茸茸鷲毳淨一一野繭抽
南北走百價白氎光欲流似聞邊烽急綠江列貔貅

裁襦襯鐵衣愛此温且柔天乎未厭亂利厚人益媮
誰知海濱客獨歎無人誄

芭蕉

地鹵不敏樹珍植何由暢斲根移芭蕉美蔭跂可望
芳心日卷書翠葉忽張王偏工鳴秋雨踈密眇難狀
霜風一以厲狼籍坐惆悵誰言縑縷中秋子得佳餉
細囊貯瑞露厚味天所貺懷哉腊毒言節口畏生瘡

菖蒲

東山在眉宇未到心鬱紆流泉撞哀玉清冽生菖蒲
聞有嬋娟子棄家來結廬窈窕雲霧窻參差冰玉膚

絕粒餼香節仙姿清且腴邇來隱身去冷落愁矐儒
靈方無由乞石斗移根鬚相看意已消何必見子都

海上

落日弄雲海閣風欲手攀秀色不可解西山如連環
緬懷避世人結屋棲孱顏眎世一蝸角笑憫觸與蠻
我生笑癡仙遂恬升斗慳尚餘詩書債倖此朱墨閑
纓冠出救聞安得長閑關仙人形識此妄自憑愚頑

送祝仲容歸新安

歷亂百憂心漂零一涯天讀禮不盈尺眼萎坐自憐
君來訪安否春風柳吹綿篝燈語平生愒恍夜不眠

那知歲月度但怪冰雪堅感君懷親意使我淚貫泉
高堂急榮養躬耕恨無田筆端日五色氣壓諸生前
聖門要鑽仰至味研簡編經綸出緒餘文字忘蹄筌
他年閒擊竹妙契琴無絃此時一瓣香竟為何人然
江湖多北風懷哉歸袖翩刮目看奮飛此道更着鞭

次韻彥繼用前輩韻三首

餽歲

歲晚追土風獨甕誰與佐人心感流光臺餽屏奇貨
雞豚取牢柵門戶隨小大去鄉二十年憶此但愁卧
兒癡元未識但索梨釘坐何時鷗識村莫作馭轉磨

不須志四方教子求寡過歸哉及強健老去煩劑和

別歲

舊歲已趣駕為我不少遲凡心畏增年而歲豈容追
丈夫有蠖屈牢落天南涯收功英妙年豪傑彼一時
寧當如秦越坐視瘠與肥隣翁意誠厚酌酒寬愁悲
慇懃何時忘祝我致好辭撫世非吾事諸公正扶衰

守歲

庭燎夜未央旌旗煥龍蛇九門一放鎖萬馬誰能遮
亂離憶舊事安眠夢無何目眩燈燭光坐厭兒女譁
念此亦土風雖癡不容搨更為盧白戲紛爭起橫斜

故歲不足計新歲莫蹉跎努力誦書史從人笑翁誇

奉同胡德輝八月十四日夜玩月次韻

我夢故山月蘿影垂秋光誰言九衢曉莽莽吹塵黃
群公直道山晤語清夜央飛轍轉空闊積暑蘇蒼涼
哦詩中天律流光惜堂堂雞肥社酒熟吾亦懷吾鄉

又

亭亭月初高河漢坐可褰病餘久制酒灑氣兩爭先
振衣萬里風歸袖何時翩懷哉故山友共此今夕圓
離離雲飛鴻何意影沈川觀心要知是出處直悠然

巖桂花

開門驚積葉秋氣日以厲獨芳搖落中粲粲巖下桂
幽芳不自憐怊悵紛滿地未忍蹋殘英何以娛晚歲

中秋夜雨

秋雲定何心忍翳今夕月尚嫌微點綴况廼都漫滅
他日任氛霾數日望清澈倦投衲子窻竹雨聽騷屑
對牀不成夢有酒那能設螢飛矜意氣蟲語轉幽咽
心知層陰表皎皎玉輪潔何當凌倒景徒倚玩飛轍

夜坐

棲遲客異縣名氏蔽丹丘希世非夙尚素餐愧前修
日耗大倉陳一飽寬百憂眷焉撫平生信亦無幾求

蒙籠小牕底圖史漫不收篝燈揩病眼昏花亂虬蟬
愚儒未忘世撫事非所謀不如遂捐書卒歲以優游
懷膠睨崑墟濁浪排高秋知難有明訓吾其老鋤耰

秋懷二首

鏗然一葉脫中夜歎以驚及茲遂搖落風露漭難平
晚晚愁自滋淹留塞何營騰騰任天運庶幾得吾生

又

中郎章句儒失身徇邦仇一歎不自知邂逅死孤囚
凜凜南昌仙斗食身百憂渺然元始後滅跡不可求

園基

授老一寸心獨立無攀緣兀兀不自聊悄悄誰與宣
時有素心人一枰奉周旋得雋非至數三捷亦偶然
危思寄方罫積威下虛弦驕矜不須史奔北已可憐
志士珍短景顧謂壁可捐聖門未及藩遠道要着鞭
緬想運甓翁操具授長川自強聖所臧懷哉撫帚編

談命

岑寂契心賞棲遲幸身閑却掃味道腴未厭藜藿慳
久絕子公書羞訪季主關肯為空際塵起此胷中山
曆翁推始生邂逅盃酒間自今半運中且作尺蠖跼
蕭蕭兩鬢髮已白不復斑功名日以踈落落難強顏

譬如坐穩人正苦步作艱夸毗付餘子彼哉謝追攀

吳江曲

吳江女兒白如玉花底紗窻傍谿綠玉簫春暖貼朱
脣故作陽春斷腸曲扁舟掠水去如飛不見嫣然一
笑時回首江城只孤塔向來一念復因誰

梨

一霜木葉紛紛妥園夫獻梨紅頰楮亦知曾次本清
涼且欲與君克釘坐

常齋集卷之三

國家圖書館, NATIONAL CENTRAL LIBRARY, TAIWAN, R.O.C.

希齋集卷之四

律詩

解汲舟

上國經年客春流一棹波已醒離帳酒猶記客亭歌
水枕殘歸夢霜衾擁獨哦蓬窻橫落月作意傍人多

淮南道中微雪

密密雲陰合斜斜雪態妍似欺春力淺故傍客愁邊
宿鳥投村暝寒梅抱蕊鮮無人命尊酒清絕裊茶烟

送沈昌時赴寧海令兼叙別二首

新安朱松喬年



俯仰塵埃二十年天涯初此試鳴絃正緣五斗羞陶
令莫歎三江阻鄭虔饒吏誅求何日壓羸民凋瘵豈
容鞭故人便使來當路終恐勞公自挽船
平潮平處落歸帆已覺離情兩不堪轉手便成千日
別悲歌聊倚一盃酣波翻別壑聞車水青遍柔桑趁
浴蚕歸路春深風日美伴誰操筆賦幽探

西湖泛舟

望湖樓下照衰顏羞見塵埃兩鬢斑風艇縱看山轉
側烟堤儘逐水回還喚人歸去城鐘急觸處相親嶺
月彎不用新詩摹絕境定知長到夢魂間

和舜明晚雨

一雨平甌坵層臺轉小涼吟羞東野窘醉想謫仙狂
濕翠生苔徑餘清襲茂裳王郎不相顧掃地靜焚香

贈言命張生

倂仰塵埃的白羞稍看寒餓復誰憂小兒造物巧相
戲窮鬼逐人殊未休我所不知煩子算世如無取更
何求服箱挹酒真么麼那用區區問斗牛

東陽社日泛舟觀競渡

誰喚思家客來為蕩槩嬉鬢華羞照水雨意解催詩
疊鼓飛文鷁香鬢出知誰醉歸真夢覺猶憶漣裙時

熊積道桂軒

覓種老蟾窟培根芹水傍書燈移素影詩筆帶餘香
家計傳常業孫枝繼却芳山川供秀潤蘭玉競輝光
那把攀雲手空持種樹方嗟無月脇句惡語汗君染

宿延慶寺

浮榮過眼旋銷忘惟有谿山意味長身健不嫌穿紫
確塵空那復戲滄浪林鍾喚客烟葺寺風葉鳴秋竹
蔭廊一似雲谿醉眠處只應軟語欠支郎

贈僧

知有叢林特地過幅巾迎笑出巖阿杖藜同覓牛羊

路濯足來分鷗鷺波豈不倦遊貪斗粟坐令歸思動
漁叢他年會有相逢日稍食吾言聽子呵

三峯長老送紙被

笑我布衾故分君楮幅温尚嫌肱當枕端稱蓆為門
敗篋薪錢盡幽窻雪意昏寤驚雙脚暖猶恐錦鯨存

盆中梅花

兀兀天涯客依依雪谷花莫辭遮病眼相伴送年華
勸我三盃醕熏心一念邪幽香戀吟筆半墮墨池窪

月下

幽獨不自得出門誰適從涓涓我不即踽踽世寧容

吾道固應尔何人此意同唯餘穿戶月照我一尊空
留別卓民表

末俗紛紛事不情天涯懷抱向誰傾漂流空度三秋
日邂逅來逢四海兄剪燭西窗驚睡夢對牀夜雨話
平生滔滔世路方同驚何日相期問耦耕

寒食

粥冷春錫凍泥開臘酒斟故鄉空淚滿華髮正愁侵
山暝雨還往烟孤村更深誰知江海客浩蕩濟時心
延福寺觀酴醾
幽棲一壑無來轍睡起忽驚春已深踏青不趁溱洧

女曳杖來尋蒼苔林長條挽處雲籠袖幽佩歸時月
滿襟武谿回首醉眠醺香力一熏愁到今

醉醺極盛

武谿昔寓學之地有

寄吳及之

世事今人舌本強瀟瀟何處是吾鄉未成微服隱吳
市且可携筇訪草堂欲買雞豚接近社少陪風月坐
胡牀共將絕唱追韓孟一飲還須釀百觴

答卓民表送茶

攪雲飛雪一番新誰念幽人尚食陳髮髻三生玉川
子破除千餅建谿春喚回窈窕清都夢洗盡蓬蓬渴

肺塵便欲乘風度，芹水却悲狡獪得君嘆。

和人遊仙峯庵三首

千巖萬壑翠縈回，一洗衰翁病眼開。落日多情留別嶺，秋空無地着浮埃。雲閑出岫初無意，松老參天豈願林。我是散仙君記取，更鞭鸞鳳少徘徊。

誰麾俗駕挽，今回珍重山翁小。徑開去覓雲峯，攀碧落下看沙劫。壞飛埃掬寒露，井銷塵想擷翠筠。籃富藥材彷彿三生曾到此，樓鐘重聽一徘徊。

脚底千峯翠浪奔，雲端掛此一豪身。山河了了窮千界，物我紛紛共一塵。浪趁下方追日步，恨非本色住

庵人他年八極浮遊遍，來讀新詩迹未陳。

寄金確然

金子卧空谷，何人賦白駒。僧斟三味酒，客薦一囊書。歸夢寒應短，詩腸飢自呼。強穿東郭履，來煮雪畦蔬。

次韻菊坡

露浥秋英濕曉陰，小坡新斲竹幽尋。似欺蘭畹方披羽，聊對風卮旋屑金。采采遶籬吟欲就，垂垂壓帽醉難任。使君致主唐虞了，三徑無忘此日心。

蘆檻

手斲修蘆着檻栽，使君公退幾徘徊。想當風雨翻叢

急疑卷江湖入座未辦松窻眠綠浦且將屐齒印
蒼苔種成桃李人間滿應念孤根首屢回

春晚五言寄夢得

美景足可惜殘春尤不堪晚英餘燕蹴熟顆墜鷓鴣含
歲月蓬雙鬢生涯粟一甌唯思對公瑾把酒話江南

再答諸公

芳節坐晚晚客懷無一堪柳眠猶自困花笑為誰含
風揭拾遺屋塵生執戟甌聯詩賴諸友妙句壓城南
董邦則求茶軒詩次韻

一軒新築敞柴荆北苑塵飛客思清更買樵青娛晚

景便應盧老是前生千門北闕夢不到一卷玉杯心
自明冷看田侯堂上客醉中談笑起相烹

送仲猷北歸二首

一丘宵次有餘師空此淹留歲月遲黃墨工夫憐我
倦簞瓢風味要君知新詩落筆驚翻水俗學回頭笑
畫脂伊洛參同得力句還家欲舉定從誰

欲尋當日故山盟身世今如海一萍歸路上心真了
了愁根入鬢已星星挽衣共醜東西酒折柳送行長
短亭念我知君回首處萱叢萑葉一時青

寄吳致一

相逢一笑兩忘懷，夢遠親庭首重回。世事難磨三尺
喙，離愁都付一分盃。秋生林薄歲時晚，水落江湖鴻
鴈來。賸作新詩頻寄我，天涯時對兩眉開。

四月十五日上元道中

亂山身逐簡書來，梅子黃時雨未開。一葉橫斜風葉
度，千難顛顛雪城催。危穢種種那容避，俗駕駸駸底
未回。聊復浮遊隨造物，故園回首思悠悠哉。

送黃彥武西上

門揜蓬蒿氣浩然，西風筆勢更翩翩。未忘大學蘊益
味，時說定林文字禪。蒼葦風光傾上國，槐花心緒記

當年里門歸日，車應下置酒，遲君沈水邊。

林文挽詩

沈谿耆舊半丘墟，猶有期頤隱市區。未展武侯牀下
拜，已傳顏子夢中呼。門人會業三年室，弔客誰留一
米芻。歸卧九原應不恨，何蕃聲譽滿京都。

有懷黃元聲時聞在建上詩中所記建上舊

遊也

積雨山城久卧痾，起看橫港漲晴波。空餘九尺鬚眉
好，奈此一樽風月何。懷抱故人長在念，經行佳境想
重過。東谿回首醉眠處，爲問紅葉何許多。

書室述懷奉寄民表兄是日得民表書

丈室無塵葉几橫吏休鳧鶩散無聲舞風竹影傲傲
轉紫夢鑪香嫋嫋清已笑榮枯盧白戲不須物我觸
蠻爭故人剪燭西窻約知復何時話此生

答人留別之什

家在大江東復東去君一舍碧流通那知臨水登山
處同寄飛蓬斷梗中愁絕盃中千里月夢紫海上
一帆風只今且作須臾意更典雲裘醉小裘

七月四日宿丹谿道中

日出露芒重涼生風葉翻秋杭已照眼社酒欲香村

牛下草萊濕人歸園屋昏箇中吾不淺擾擾與誰論

求道人自尤溪來還冷齋有詩次其韻

五年沈水照衰顏谿上今誰獨往還身插亂峯隨一
錫夢回蕭寺遶千間西風潮落拏音慧斜日尊空醉
袖班更覺難追詩力健大弘久廢若爲彎

送劉道醇歸烏石

一塵避地本依劉聞得更書始欲愁舊德鑄碑在人
口歸裝載石壓溪舟寄書莫忘清泥信把酒誰同黃
菊秋新閣詩增風月價自應神物護銀鈎

胸中一壑故超然耿耿羞爭倚市妍萬事一尊陶令

酒群兒滿世粗生鞭欲投烏石農桑社尚有靈山香
火緣持節重來慰父老溪頭相送各携錢

題白鹿庵壁

鹿門龐老携客隱耳冷十年難與俱
螻蟻夢中求曩事芭蕉林裏見今吾
遊絲弄影分陰轉喬木摩空萬壑趨
香妙心清無一事不知何處是華胥

滔滔一世強留連頭上從渠歲月遷
老子養生寧解事小兒有口慣談天
醉來莫負持螯手老矣終尋種玉田
若怪微吟漏消息九江誰識市門仙

與求道人同之福唐

縛屋雙峯雲一塢拋來伴我事幽尋
風花蹤跡趣雖各香火因緣情自深
浮峽未興圓澤歎乘桴還有伸由心
三山他日記耆舊鑿齒彌天無古今

次韻李堯端見嘲食蕨

真人官府未黃緣且向龍山作散仙
春入曉痕催采蕨雨翻泥隴憶歸田
蔬腸我若枵蟬腹詩格君如擊鷲拳
筋下萬錢謀更鄙諸公飽死太官羶

次韻堯端試茶

龍文新夸薦緗羅園吏分嘗苦未多
自淪雲腴甌露并坐知雪粒采陽坡
撐腸君要澆黃卷愛酒渠方捲

白波我亦箇中殊不淺斷無蹤跡到無何

送友生

剝啄門前久未嗔定知我輩不羈人午憲喚起夢魂
好一語便知風味真身嬰世網坐營口心識醉鄉慵
問津忽先秋燕背人去四角何由生客輪

贈范直夫

將軍競病詩成處南浦春歸蘭玉叢漸減心情身老
大父乖談笑路西東鄉關落日蒼茫外樽酒寒花寂
歷中且與寓公同放曠浩歌相屬倚秋風

招友生

雨收天氣欲清明猶有餘寒在粥餠馬隊客勤貪晝
永鱸堂人病想身輕讀書有味齏鹽好對境無情夢
寐清欲話此懷須我輩一來蠟屐伴春行

辛亥中秋不見月

今夕九秋半心期負隔年勞生灰劫裏微雨客遊邊
旅泊正無酒陰雲遑怨天何時草堂月相對籍糟眠
次韻羅源謝成章作不烹鳴雞詩

彼美司晨族膠膠職効鳴爲憐君子操寧乏小人羨
恩重棲時穩心危失旦驚未甘烏轉夜聊學鴈全生
結客觀酣鬪要君事割烹那知競辰子力學務時成

次徐韻還江公詩卷

大條祠官閑日月絕知聖處着功深榮枯舉世爭盧
白枉直何人較尺尋身比香山差得計詩看正始有
遺音應容下客遊東閣要話朱游夙昔心

次韻汪彥允見寄

北苑乖期恨昔年異鄉牢落夢江天約遊汗漫傳新
句許出嬋娟有舊緣種種鬢絲何計換搖搖心旆不
勝懸歸耕要伴君難老相與咎鸞作散仙

與吳昌國同遊靈水院二首

筭舟更散了無事與客意行初不謀飽看雲濤舞空

闊欣逢泉石媚深幽西漢未試補天手上界那知鞭
鳳遊剪燭他年憶真賞莫嗟身世尚沉浮

來往風流記兩翁天涯今作九秋蓬坐驚秀色懸眉
宇便覺仙峯入手中傲世真成漆園吏輸君不負北
窓風書生浪發新亭歎自笑尊前氣吐虹

贈吳昌國二首

若越與誰語得君寬我愁頗驚三日別更為一樽留
食霍有餘味泣河非所謀相看撫身世容與愧蒼鷗

又

憶我少年日遊君大父閒諸孫嗟契闊雙鬢各爛斑

未覺歸愚晚俱嘗適俗艱絕知歸思急更覓玉梅攀
孔生示二詩答一篇

歲晚尊前一笑譁憐君孤憤老天涯諸豪雖識臨邛
客陋族難當闕里家會有孟光求共隱不應牧犢但
長嗟青衫華髮春風裏擇婿猶堪駐寶車

寄江少明

龍卷風雲一髮蟠不妨聊作侍祠官高情未許群兒
覺萬事何須正眼看明道從公春信近談天容我酒
盃寬乘桴亦有平生意回首紛紛行路難

次韻劉仲高境外舅家梅花

柯山月下嬋娟影前受劉郎餘故情詩成回首戀三
百戎亦惜花癡半生情況寒水善機長蟲蝕真詮章

句清西研

不承配極威靈

對越春秋命秋香
不承配極威靈
春半句清江為洗滌

次韻鄭德與歸舟中感懷

兩牛鳴地隔寒流病起相望客裝秋閑道嘆船歸別
浦坐懷聯策倚滄洲騷人空復驚搖落胡賈何須數

滯留會擁豪衝入河渭看君黃色上眉頭

李似表取告歸晉陵

酌酒摻歸袂繁陰殊未收心知非遠別自不柰離愁
蓬渚勸懷慙雲臺歸借籌邈來閭闔路萬馬避前騶
致政宣教魏公挽詩二首

已自應無憾人猶歎不遭簪纓門已大湖海氣方豪
舊國牛磯外新阡馬鬣高流芳傳教子步武接夔皋

又

交蓋歲云晚向人懷自領爭棋消永晝酌茗話平生
轉手便陳迹撫書增故情無由從執紼空想葬簫聲

劉氏挽詩

餘慶鍾蘭秀初占合鳳飛那知風不止遽作露先晞
鬢鬢楚方徹齊眉事已非竟車春陌上空背夕陽歸
次劉彥仲傅茂先韻

強躡府塵從傅子立談江閣識劍郎一尊此地見眉
宇十載相思成鬢霜秋燈煜煜照情話夜浪翻翻吹
客床投名徑入農圃社老矣不夢天門翔

建安道中

攀嶠復攀嶠秋山殊未晴流年半羈旅此地幾經行
雪嶺今慵照茅簷欲謾營大鈞渾莫問流坎任餘生

送蘭廷彥之衡州

墻東新徑去年開
二老扶筇便往來
數面何曾三日
別離懷都寄十分杯
客亭繫馬梅爭落
官舍裁書鴈欲回
東執樞機有知己
未須卜築向蒿萊

商羊


異鳥來齊國仍依殿陛翔
從容詢魯相物色是商羊
欲雨追童語懷山驗水祥
民寧因備豫政美謝祈禳
止異爰居久鳴無怪讙
長願言蘇旱虐主上似宣王
次張演翁林云惠韻
朱門小駐使君車
二七風流入畫圖
但有觥籌供笑

語從教歲月上
髯鬚請成華燭留殘蠟
客醉高歌叩缺壺
更起爭棊誇得雋
不應局蹙守邊隅

公相起犁鋤

帝室尊公相
潭潭大府居
從容調鼎鉉
奮發自犁鋤
獨亮皎賢業
班聯冠廣除
艱難同耦日
慷慨輟耕初
厚幣未萃野
幽人出冀墟
渴賢才及席
何計老田廬





國家圖書館, NATIONAL CENTRAL LIBRARY, TAIWAN, R.O.C.

國家圖書館

卷四

帝齋集卷之五

絕句

新安朱松喬年

太康道中二首

得春榆柳遍平郊猶見藏鷗影未交動地風來一披
拂青黃淺淺抹林稍
一色春勻萬樹紅坐愁吹作雪漫空誰知榆莢楊花
意只擬春殘卷地風

燈夕時在泗上五首

燈花作意照歸人短棹扁舟寂寞濱帝力如春蘇萬



物遙知太一不威神
雲窻月檻仰乘輿
爵看看車出繡襦
九陌人人歌帝力
不須微服過康衢
鸞駕翩翩馭晚風
積蘇宮闕夜濛濛
明朝遺覓鐵如意
應在涼州酒肆中
我欲安心未有方
至人遺跡已茫茫
自非窄堵波中老
誰直先生一瓣香
我觀世界只見嬉
一戲相從更莫辯
綺語未忘餘習在
明朝與和紫姑詩

松江三首

塵緣挽我去漁磯
回首滄洲此願違
偶寄一舟江上去
只無箬笠與蓑衣
表裏江湖眼界新
解誇竒觀屬詩人
要須一醕三江
水淨洗多生舌本
塵晴江渺渺跨江
干春漲平湖萬頃
寒欲挽銀潢供硯
滴坐如震澤在毫
端

翠碧

長橋畫柱照清淪
俯見游鯈不可緝
山影半溪叢篠密
誰知翠碧解藏身

賦王伯溫家醪醑

翩翩風馭駕花神更遣醪醖殿晚春壓架穠香千尺
雪喚回中酒惜花人

王彥行送櫻桃

香英狼籍了無餘償我殘春一斛珠猶帶微酸餉佳
客為嫌啼鳥啄紅膚

芍藥二首

紅顏素臉出春殘梟又傳又態自完聞道揚州冠天
下何年跨鶴往吟看

舞困春風睡思深東君更與纏腰金頰羞醉耐花應
笑那有當年幕客心事見續筆談

月巖去上鏡十里山有側穴腹背皆洞如月
鑿透巉巖不記春山腰千古掛冰輪誰知摩破三峯
手聊出嬋娟戲路人

蟬

陰陰葉底午蟬嘶滿腹春風寄一枝下有行人正愁
絕不知幽咽自緣飢

寄湛師

一月分身入萬池道人何處不相隨卧聽絕壑傳風
籟歷歷新詩世不知

答汪明道見示畫雪梅詩

詩人未見雪梅畫只識前村橫水枝百巧摹香摹不出此詩風味畧相宜

夾路天寧謁僧不遇

支公去不鎖禪扉熟境應留夢裏歸我却寄眠公榻上此心渾似片雲飛

野步

悲歌厭聽久無襦倦客翻嫌出有車杖策岸中山下路百錢聊欲飲樵夫

報恩寺

道人足跡掃塵寰坐看筇枝上蘚斑羨得籜龍千尺

就却教行水遶空山

鈇山僧齋假山

擘開華嶽三峯秀疊就層峯數石寒等是世間兒戲事道人莫作兩般看

石門寺四首

橘刺藤稍胃客衣直緣微祿得奔馳懸知投老歸田味只似登山困睡時

行穿蒼麓瞰平岡踏破青鞋到上方城市紛紛足機穽却從山路得康莊

林棲相喚出幽谷我亦欲起天未明枕中泱泱響山

溜一似荒城長短更

真功那復歎蒸沙靜笑飢腸日夜譁老褐不須供茗粥朝餐吾已辦丹霞

竹齋

誰云山僧貧而有千椽玉幽眠豈無處愛此晴窓綠將宿松溪羅漢舟小不果渡廼宿資壽二首

霜餘野水尚能深隔見僧簷出短林一葦欲航心未穩故穿危徑取墻陰
敗絮如蓑不可連書燈相對聳吟肩明朝定有茅簷日借我烏犍曝背眠

將還政和

歸去來兮歲欲窮此身天地一賓鴻明朝等是天涯客家在大江東復東

以研墨送盧師子

明窻子石灑松腴萬卷盧郎正要渠何似黃梅碓下客夜翻半偈情人書

燈夕在試院用去年韻

隔墻歌吹聒悲涼信馬狂心墮渺茫報答風光吾老矣小窻讀易靜焚香

春晚二首

梅子生仁柳絮催春風塵跡只蒼苔繁華一夢年年
事長是初鷺為喚回
客路歸來芳節闌杖藜隨處小盤桓危紅數點藏深
綠須作春風爛熳看

南谿道中

千峯踏遍一筇隨草軟沙平步却宜細徑忽攀飛鳥
外故知腰脚未應衰

送周時用自別業還永嘉

陌上花殘客未歸故鄉自合去遲遲紅香洲渚收歸
槳却勝池塘草綠時

午憩龍山上方

稅鞅雲扉屨響廊困眠拾得小窻涼逢人莫說夢魂
好厭見客塵吹上方

觀張上達家惠崇蘆鴈圖二首

先生衰眼失孤鴻久着甕天塵霧中誰卷秋空開四
壁丹青三昧道人崇

道人一錫攀飛鳥頗悉南來北去情畫出江南遵渚
態尚餘風味叫群聲

示謝彥翔

滿川秀色野陰踈知有儒仙隔水廬借我玉函河上

語只看尺許定何如

後身梅福與誰論正有幽人夙契敦更欲上書陳世
事却來微服守吳門

示金確然

牢落天涯身百憂故人千里肯相投知君強記當年
事莫說家山恐淚流

遊妙峯庵二首

朝暖南岡一杖藜忽投深壑得禪栖共言伐翳通樵
徑後日重來路恐迷

手開茅棘養疎慵不着塵中車馬蹤只許幽人來別

嶺卧聽石磴響枯筇

招謝居安

暗中摸索故難忘客舍相逢話最長更有異書分我
讀只無名酒與君觴

梅花

霜谿咽絕照冰姿誰見無人弄影時香逐曉風穿暗
戶夢隨落月掛寒枝

社日遊南臺

作社無人嘆拾遺不妨步屨趁兒嬉一壺春色千峯
頂回首他年憶此時

雨二絕句

城城初鳴竹涓涓稍滴蒼忽然幽夢斷更覺曉寒添

又

纖纖花入麥漫漫雨黃梅泥徑無人度風簾為燕開

招卓民表來自雲寺

剝啄渾無去客嗔丁寧招喚只懷人南風殿角涼如水來洗眼前朱墨塵

宿石龍寺二絕句

風傳萬籟有喧寂月入千波無淺深應信此身非我有
有愁問誰伴夜盡吟

觸處為家底是歸浮生南北未忘機道人身似南枝
鵲更盡秋宵一再飛

惠句送粟既歸其直作兩偈

山僧分粟配蒿藜百億須彌一鉢携但得十方羅漢
飽不辭身作老金剛

惠休老去護論詩圓澤西遊未有期但解留連元亮
酒不須料理王川飢

寄人

西山相對臥寒齋耿耿思君不滿懷比似拈雲來寄
我何如君自作雲來

書護國上方

又知喧寂兩空華
分別應緣一念邪
為問脫靴吟芍
藥何如煮茗對梅花

元聲許茶絕句督之

鳳山一震春
春回想見香芽幾焙開
未辦倩君持券
買故應須我著詩催

謝人寄茶

寄我新詩錦繡端
解包更得鳳山團
分無心賞陪顛
陸只有家風似嬾殘

與勻道人蔬飯作兩絕句

道人一計了平生
肯笑寒儒不糝羹
若識先生晚食
肉萬錢何處着羶腥
牛羊觸藩筍成竹
鷄鶩成群飽倒藤
一飯羅摩未為
孽要知我是在家僧

勻道人之玉山戲作兩小詩送之

小雨斂塵芒屨輕
玉峯一點笠邊明
向來自盡鳥飛
處一錫今隨隻影行

道眼無塵萬景隨
滄江秋色入新詩
歸時人問江南
好只道君行到自知

宿鷺湖寺和同行勻道人

人間狡兔開三窟天上夜叉守九關欲伴衲僧林下
住會須石似此心頑

題廓見亭

危欄縹緲跨鴻濛城郭溪山一覽空何處更容君着
眼大千渾在六窻中

梅花

春歸幽谷轉微和已覺粘枝玉蕊多天女淨香焚月
下相逢依約到無何

書釗家園壁

梅花夢向笛中殘子着深枝一一酸腸斷來遲雙燕

子暗香消歇粉泥乾

心空無地着塵沙對鏡何曾一念差戲取大千歸丈
室未妨衣襪亂天花

南浦五小詩迎勞二弟

鱗生雨後東西倦雪落竹間南北枝將母方勤弟行
役春風應滿錦囊詩

苟祿勞生不為身強顏來此筭征人莫將朝市輕分
別等是低回一闕塵

堂前春日媚玳盤釋子相群舞袖斑斗酒壽親逢一
笑不知身在市門間

青山北界大江東了了鄉關在眼中歸得一塵吾願
足此生初不問窮通

健碧倚天無數峯眼前渾似故人逢問來識面知何
處應在頤齋詩卷中

和幾叟秋日南浦十絕句簡子莊寄幾叟

心親千里不辭遙咫尺衡門接市橋萬卷舌端真歷
歷一丘胸次更囂囂

平生學道着功深世事繁人負此心賴有關西門下
士洛川流派得重尋

屹屹龜山障末流藩藩一望渺無由宵中萬里平生

事肯躡尋常只麼休

西翁相對語更闌想見風生席石間詩就南枝三轉
鵲樽前秋月半啣山

殘書勸展水沉燒那有堂前學子嘲卧讀蕭陳秋夕
句不知烟暝鳥爭巢

凜凜臞仙千載人當年許卜一枝隣天高鬼惡堂堂
去誰識渠儂不壞身

不見陳公歲又除七峯深處食無魚終煩指似龜山
路會使人疑得異書

一筇楚尾見春風遙想詩成顧盼中心逐孤雲天外

去恍疑身在大江東

沙界豪端久自知筆鋒一戲更何疑江南春色花千里幻入幽人半幅詩

風雨交交耿夜燈天涯兄弟對牀聽莫嫌詩作江南語一夢家山眼亦青

答子莊見和

老去溫柔失舊鄉北牕一枕午風長夢回未覺羲皇下句好全勝殿閣涼

答國鎮見迂之什

平津欄檻倚高秋一掬寒波醉眼流莫話風流雲散

事九河翻淚若為收

淵明把菊對清秋醉裏詩豪萬象流畫出多情愁絕處七峯明滅斷雲收

次韻答夢得送荆公墨刻

相馬評書世未知要從風骨識權奇半山妙墨翻風雨尚有典刑今復誰

與許簿同遊南山二首

步携婉婉上巉巖北望雲山紫翠攬了了大江東岸路欲攀風馭脫羈銜

秋空如水莫留塵脚底千峯翠浪奔未暇與君遊八

表且當索酒賦鷓鴣

遊報國院用驛間韻示同遊二首

招提一葉弄新晴却信朝簷鶴有靈猶有幽花堪繫
纜為言輕手惜飄零

老僧弥勒久同龕應笑遊人世味甘小數何曾工九
九深禪聊欲問三三

谿橋納涼晚歸小景

誰共谿邊沈澹杯驚魚不睡棹歌來風生蘋末無多
子更待冰輪作伴回

水精念珠頌

百八么珠水玉寒客囊無復一錢看只應袖裏靈山
無數如來轉指端

卧疾初起示逢年兼簡綽中德粲五首

觀身已作水溶溶投瓦云何覺病攻造物小兒真一
戲未妨居士却談空

病餘都作鶴聯拳誰識臞儒是列仙如我角犀將底

用簾黃相對却超然

三君皆卧疾
數日羸甚

清風白雨灑炎荒林下聽時恰對牀一洗微病何足
道請觀柯處不清涼

蚤歲功名不自量近從顏禹識行藏萬錢本是憂時

餌除却罽瓢莫謾嘗


溪風月浩無邊病起吟觴恣未便欲作二豪知未
辨恐君愛我沐猴禪

以月團為十二郎生日之壽戲為數小詩

鳳山團餅月腫朦老桂橫枝出舊叢小友他年春入
手始知蟾窟本來空

夢覺牀頭無復酒語終甌底但餘麋已堪北海呼為
友猶恐西真喚作兒
駸駸驚子筆生風開卷猶須一尺窮年長那知蠶鼠
等眼明已見角犀豐

生朝樂事記當年湯餅何須半臂錢吾等自知樽有
酒汝翁莫歎坐無檀



國家圖書館, NATIONAL CENTRAL LIBRARY, TAIWAN, R.O.C.

韋齋集卷之六

絕句

宿靈感院二首

現身猶有宰官緣
且作吳門恣辱仙
欲以詩書為佛事
利生一念幾生前

淨掃雲房借客眠
折鐺煮粥勸加餐
道人更有超然處
掃落霜林擘鳥殘

遊商峯贈長老

欲問春歸只意行
亂紅吹盡綠冥冥
道人那管芳菲

新安朱松喬年

國家圖書館 NATIONAL CENTRAL LIBRARY, TAIWAN, R.O.C.



過沙却成灰睡未醒

小偈呈元聲求博山鑪

鑪峯落日紫烟孤江上扁舟失夢餘乞我博山修淨
供要知觸處是匡廬

徐彥猷寄示詩數章皆隱約世外語詩律深
妙豈勝歎仰輒次韻和呈彥猷素富學未壯
而棄場屋故詩中極道江湖放浪之樂以動
蕩其心志而卒反之以古人出處之義當有
隱君子弄舟烟雨之外倚其聲而歌之亦可
以一笑也

幽人世路無轍迹抱此耿耿將安歸機心一寸焦穀
稿丹頰不為十鍾肥

頰憐物次抱經繡半縷不上山龍衣誰知烟雨暗青
笠得意雲水春霏微

詩遍長江世已稀滄州未覺此心違平生却笑陶彭
澤今昔紛紛強是非

江湖魏闕已一視孰與藁笠無危機遙知避世客相
對落日一談能解圍

談笑百篇無俗韻榮枯半世掩衡扉古人祿隱或金
馬那用故山甘蕨薇

送求道人永福謁同參二首

枯木巖頭鷓鴣行十年離別話偏長歸時裏裏日溪
橋應作雪峯蒼藟香

挂藤峯頂一長嘯贈子西行風半帆想見月生潮上
處新詩歷歷在千巖

絕句

一笑相從欠我曹日疲浮禮只徒勞紛紛閱世真難
記莫是先生眼太高

懷劉園作

一與劉園別春風到海隅墻陰草爭綠留得屐痕無

和求道人

海角西風撼客牀熟衣已試九秋涼同根兄弟又南
北他日燈前話更長

韓大年歸

衲子詩工骨轉寒折鐺全勝斗升慳恐君愛我長沙
舞且復開中袖手看

風波舉世正同舟聊戲乘桴從我由開戶有時非得
已馮河無補却堪羞

徐侯寄示古風為別作三絕句性資一笑

曾中戈甲一敵國筆下篇章萬戶侯龍門隱吏絕人
處百事隨緣莫莫休

未田莫問湖海士得志付與閭閻兒黃花滿把一尊
酒欲話此意非君誰
久憶瓊糜薦一盃玉延猶費著詩雅筠簟不送今年
供應待毗耶遣化來

某與徐侯有卜居村落之約每誦杜子美白
沙翠竹江村路相送柴門月色新之句必相
勸亟歸同饗此樂侯今已遷居浮流僕亦尋
屋一區冀必得之庶幾遂踐舊約之言乎因
作二詩以廣乎美之意庚戌六月廿八日

午鳩呼夢覺徐徐細讀牀頭種樹書自教兒童事農

圃更尋何處欲歸愚

莫嘆天涯流落身只今同是耦耕人江村無物相迎
送一味柴門月色新

次韻團練君侯新居二詩

江村結屋老垂垂詩乞檀栽手自移他日南樓看鷗
集莫忘烟雨狎鷗時

一錢未辦買雲山突兀何時屋萬間歲晚投簪來卜
築柴門分占碧孱顏

題蛟巒小庵二絕

浮塵不到客眉開乞食幽人晚未回相對西山全體

現逢人莫道只空來
鑿破蒼崖俯碧流石碣竹筏艤行舟已邀明月來同
宿可數層欄寸寸秋

次雪峯二小詩韻

麗日疎烟破小春雙峯秀色一番新要銜天上金雞
粟莫問人間白眼人
同參卷被卧雲根倒屣相迎月下門大耳識君遊戲
處不應覓酒向前村

宣和乙巳題野人陳氏之館

長安調鼎黑頭公一
旦覆餗腰領紅飭稻羨蔬三萬

日爭如且作多田翁

書永和寺壁

曾中一壑本超然投跡塵埃只可憐斗粟累人腰自
折不緣身在督郵前
來解征衣日未斜小軒泉竹兩清華道人法力真無
礙解遣龍孫吐浪花

示僧

清溪淨寫碧嶂岫雨後相携石路乾認取此山嶠絕
影他年何處鉢中看

九日送僧歸龍山

九日相携積翠中勝遊兼有道林同枯顛一任君披
拂寄語龍山落帽風

牛尾狸二首

壓槽玉面天涯見琢雪庖霜照眼明投筋羞顏如甲
厚南山白額正橫行

物生甚美世所忌吹息雪中成禍胎湯帆卵盃頻下
筋江南歸夢打圍來

牡丹花二首

餘芳卷地還春去誰送洛花供眼青沉香亭北真一
夢今見宗支亦典刑

鶴林閭苑兩蕭瑟付與大千沙劫灰尺五城南花幾
淚詩成看鏡覺摧頽

種竹報恩院示僧二首

兩翁來往亦風流還擁紅爐說舊遊夜半南枝三轉
鵲相看更覺此生浮

遶屋風篁夢寐清住山活計幾時成雲根試手聊親
斲安否他年數寄聲

洗兒二首

行年已合識頭顱舊學屠龍意轉疎有子湊丁助征
戍肯令辛苦更冠儒

舉子三朝壽一壺百年歌好笑掀鬚厭兵已識天公
意不忍回頭更指渠

五言小詩三首

一雨綠南浦波明柳蔭門遙知滿裾處為我一攀翻

又

散策橋南路春容最好時夢回花滿眼猶恐是辛夷

又

牛歸坡草煖船繫岸花零白墮尊同卧黃昏月照醒

梅花三首

怕見繁枝不忍攀風危綠浪雪爛斑多情一醉年年

事須及踈英的皦間

江梅凌厲千花上一笑春風我有詩白鷓老仙三疊

曲何人得法是橫枝

孤山居士玉梅句醉客強呼桃杏詩刻畫無益晚西

子法當試我古藤枝

芍藥二首

露壓珍叢粉自勻日歌薦萼態殊真未成跨鶴腰金

去先醉揚州十里春

已分春光冉冉過奇葩好在奈愁何誰令玉頰紅成

點如意痕深琥珀多

意不用磨刀斫眼紅
道人鉏斧得從誰無復當年隻影隨
笑我不求千戶郡坐知成佛更難期
避世山中秣樹亭綠陰遠舍忽青青
拋書自笑爬沙手要挽天河洗甲兵

立春日雷

陌上冬乾泣老農天留甘雨付春工
阿香急試雷霆手莫放人間有卧龍

次韻江謝送花倡酬三首

幽樹團團謝傅家凌寒方澤共驚嗟
要知折寄殷勤

意鷓鴣那能病物華
娟娟花竹淨名家閑世夸毗浪怨嗟
願挈衆生辭熱惱知君父學妙蓮華
乘桴何計去浮家學舞空餘短袖嗟
自笑繽紛蘭佩老欲將心迹問重華

寄吳大卿二首

謝公擁鼻憂不免笑問乞燔東郭顏
問訊袖中醫國手不應長與一節閑

江村小築興不淺奈有靈山香火緣
經世心知焦穀穎歸耕猶恐度公前

吳山道中三首

滿拂春光一番雨，鬧花如海麥搖波。靜觀物化知如幻，奈此撩人風物何。

春工試手雨初晴，遙見萋萋曲埭青。間道東陂新漲好，來將衰髮照星星。

仙人不奈笑憑愚，來讀萬籤東老書。勸作南窓傍脩竹，時來借榻卧虛除。

三峯康道人墨梅三首

一枝春曉破霜烟，影寫清陂最可憐。枿被犯寒歸吮墨，也知無地着朱鈿。

冰盤青子渴爭嘗，怪有橫枝着意芳。等是豪端幻三昧，更煩覓句為摹香。

緜囊墨本入宣和林下，霜晨手自呵。不學霜臺要全樹，動人春色一枝多。康畫嘗後進又為朱勳畫全樹帳極精

溪上

攀緣雲水試青鞋，待得輕陰漠漠開。興在海山孤絕處，溪邊更復幾回來。辛亥歲避寇寓長溪龜靈寺壬子春聞建寇未平將携家之福

州度雞嶼洋寓桐江因有此句

送輝雲際二首

三日雨行來，欵關篝燈相語。雪羃山低，田俗裏未能

免只有對君非強顏

認取芝峯鉢中影要君歸去首重回相思手折寄千里想有南枝迎臘開

九日

點點吳霜入鬢毛長安落葉又秋高世間俯仰終難強歸與兒曹且漱醪

夜坐

九秋風露浩難平伍子祠南鶴唳清坐聽兒曹談往事世間更覺恣忘情

蓼花

長年心事只悠悠衰髮難禁歲月流紅蓼垂垂烟雨裏不應搖落始知秋

桃花

核裏黃泥灑石崖今年繁蕊便爭開遊人要識春多處但覓紅雲逐水來

漁父用兒甥韻

綠蓑青箬一身輕卧看行雲舟自橫米賤魚肥美無度不知東海正掀鯨

送山老住三峯寺

未辦同穿犖确行西風揮手最關情只應勃窣喧卑

裏認得峯頭嘯月聲

鉢中忽見三峯影便覺市廛塵洗人寄語階前石池
水老夫衰髮已盈巾

戲代作送住郎

同攀梅蕊便分携回鴈峯前試綠衣學就浯溪崖上
字鴈回莫遣信音稀

寄范伯達

名籍丹丘號散人何時香火共朝真只應經世平生
意未合歸愚便問津

試筆

老來詩思如焦穀自憫霜毫未故鄉乞與楊家棗心
樣要將製管試諸郎

篁竹筍

梅雨冥冥稻已齊連雲篁竹暗壘竊短萌解箨登臚
俎錯落黃金駮裊蹄

冬日桃李華

北風日日卷塵沙桃李凌寒豈自葩莫作春光流轉
想要知枯枿是狂華

題范才元湘江喚舟圖用李居仁韻

天涯投老鬢驚秋夢想長江碧玉流忽對畫圖措病

眼失聲便欲喚歸舟

題趙守中江行初雪圖

江閣雲垂滿袖風急須下馬一尊同正應無奈催詩
雪句在渠儂擁鼻中

常齋集卷之六

帝齋集卷之七

新安朱松喬年

奏議

上 皇帝疏一首

臣愚不肖蒙恩備數館閣退無職事可以効區區思慮之勞進不得預於外廷論議之末退循尸素俯仰跼蹐竊聞 神宗皇帝嘗語直史館蘇軾凡在館閣皆當為國家深思天下所以安危治亂之故竊惟熙寧之初朝廷清明海內無事而神祖憂勤戒懼深詔承學之臣垂精延訪總攬群策孜孜如此伏况



陛下踐艱難之運讐敵僭竊之患日至於邊鄙臣於此時待罪中秘書不自薄陋效其涓埃亦臣所以事陛下惓惓之義不能自己幸陛下裁赦日者邊臣失律偏裨劫其士卒以畔此誠邊鄙之大釁讐敵僭竊之人日夜禱祠以求而不可得者弓勁馬肥必且帥我蠱賊以來蕩搖我邊疆理勢之必然不待智者而後知也為國計者方當上下相與罄竭思慮厚集兵力彌縫其闕庶幾可以遏其奔衝徼極觀釁制虜之命今乃竊聞執事之臣私憂過計懼扈從之單寡盡攝盱眙合肥之戍聚之國都夫宗廟至重今行在空

虛誰何之衛有所不備誠執事者所宜深憂而亟圖之臣輒論撤戍之不可者三而卒効其愚以獻惟陛下裁擇其中自古國於東南者必西據襄沔東倚淮泗以為扞蔽吳魏之際孫權屢悉其國兵身自將之以攻魏之新城後世或以謂權雖國於東南未嘗一日忘求逞於中原臣有以知其不然者曹操於此時擁百萬之衆挾天子而令諸侯權豈不知操之未可與爭鋒而吞噬之意哆然而不少衰者蓋我有淮肥之障然後東南可以安居而無事是以陳氏南唐之末世淮壩盡失而後國隨之昔人必爭之地今皆

幸為我有若繕城隍聚禾粟選將總兵以戍之雖敵人悉其腥羶自送以來亦不能取而無故捐之以資寇他日雖欲復取其可得乎此不可之一也兩軍相持尺寸之地必爭故曰畫地而守之先退者敗劉項相抗於成皋漢兵時有顛沛然高祖終不肯左次而少却蓋我為敵所乘將求措足之地而不可得故官渡之役袁紹之支軍既覆狼狽北走是以曹公能不數年而取其國今兩城之戍既徹以南雖曰量留士馬然兵力輕微不足以捍敵若虜帥長驅以來量分偏師綴之城下馬馳卒奔不信宿而至江北衆心一

搖雖有甲士十萬尚安所施建康無城守之備四方勤王之師未至必不坐而受圍未知車駕將安所稅此不可之二也淮南累年以來設置官吏使之翦除荆棘建立官府以招徠安集流冗之民今流民歸業與四方之來自占而受田者在所有之亦唯恃有王師屯營之衛是以肯盡力穡事而獲享其土利養生送死之餘亦足以供有司之賦役此上下相資公私同利古今不易之道也今聞朝廷歛兵自守將無所恃以為安若葺撤屋屠牛捐棄生業南走以求生則少壯相率渡淮而北陛下之有司他日雖欲喻以

恩意使復其舊其誰肯信之蜀先主曰濟大事必以
人為本今人歸吾吾何忍棄去今歛兵自衛捐地不
守與棄民何異臣實為陛下重惜此舉此不可之
三也此三不可者願陛下少留聖思明詔大臣早
思所以區處之宜天下幸甚臣謂肥泗之疆不可撤
備者非謂京師不必宿衛也盱眙合肥各屯以精甲
三萬亦可以固吾圍矣吳錫見守廬州又益以楊沂
中之衆合肥兵力亦不輕矣今既召張俊扈蹕但料
擇精壯三萬選將使守盱眙其餘使俊悉將以來建
康外則邊鄙無憂關健牢密內則宿衛精強聲望隆

赫今冬正使虜偽相撻必可以無事何則我有二戍
之重使大羊之衆傾國送死以來其敢輕越吾重兵
以深入為寇乎若其冒昧衝突前有長江之阻二戍
之兵更出抄其饜伺便擊之可使走馬不得逐若不
敢輕進頓兵堅城之下野無所掠餉道艱阻久將墊
隘不能自拔吾有精甲在內而又外據長江之險觀
敵釁而繳其利謀國之策可以萬全詩曰雖有絲麻
無棄菅蒯雖有姬姜無棄焦萃惟陛下留神裁幸
昧死再拜

論時事劄子

臣聞人主以一身託於四方之土而百辟卿士為之奔走率職而無敢後者豈非恃君臣之大義有以防範固結於其間莊子曰天下有大戒二臣之事君義也無所逃於天地之間如人食息呼吸於元氣之中一息之不屬理必至於斃苟無以防範固結於其間則為人上者不能一日保其天下國家斯民之生死社稷之安危實於是乎在古先哲王既以建德敦化尊尚名節以勵風俗明人倫必先求魁磊骨鯁沈正不回之士寘之朝廷平居無事正色立朝則姦萌逆

節銷伏於冥冥之中朝有緩急則奮不顧身以抗大難亦足以禦危辱陵暴之侮是以神器尊嚴基祚強固由此道也仰惟陛下憂勞側席率勵衆志以圖中興其事未易以悉數若夫士溺於俗學而君臣之大義不明於天下學士大夫缺於忘身徇國之節豈非今日之患甚急而至大者歟東漢自建武永平之治崇獎德義知所後先一時風俗以名節相高雖以曹操之姦雄窺覷漢室終身有所畏忌而不敢肆然則忘身徇國之士又曷可少哉區區管見竊謂陛下宜深考建武永平所以善俗獎士之方明示

好惡於百辟卿士中博求魁磊骨鯁有沈正不回之操者布之內外非獨以收尊主庇民之功亦足以風示四方興起廉隅東漢之盛何以加此取進止

二

臣聞人主操慶賞刑威之柄以御天下之智力如運諸掌蓋所以處之者必切中於理然後有以深服其心是以無為而不成善乎裴度之言曰今淮西盪定河北底寧承宗斂手割地宣武輿疾討賊豈朝廷之力能制其命哉直以處置得宜能服其心耳儻使人懷耿耿不滿之意以非上之所建立則雖事之至易

而無難者亦何由而成仰惟陛下總攬群策圖濟艱難于茲八年謂宜求所以深服天下者莫若垂精延訪盡臣下之謀夫大昕之朝裁決萬機侍立逡巡之間雖有嘉謀至計未必皆能罄竭以自効於上唐制天子閒見大臣輒開延英坐論縱容數移晷刻仁宗皇帝慶曆中召大臣於天章閣賜坐給札使條具其所欲施行者是以人人得竭其所懷而反復議論之間足以周知情實曲中事機以至識慮之淺深亦足以察知其才智之所極是以天下之事小大畢舉而便文自營窳言無實者不得容於其間百弊悉

除天下久安由此故也竊謂今日宜修舉延英慶曆
故事時以閒燕博延群臣必皆削去瑣細無補闊踈
難行之言而求所以安危治亂之故卓然可施於實
用者摠攬參訂次第施行政令之出上不厭服莫敢
腹非而竊議雖強大驚桀不可指麾者皆將屏息退
聽俟志趨事之不暇而無敢旅拒天下之事將無足
為者取進止

三

臣聞天下之治亂非有常也方海內無事上恬下熙
而人主無惻怛求治之意則必因循苟簡而溺入於

亂傾側擾攘之日君臣相與側身焦思率勵衆志勤
勞庶慎天下亦未嘗不治臣竊觀 陛下以聰明睿
智大有為之資踐艱難之運累年於此汰斥冗瑣而
興其俊良與圖恢復戡定之勲以大庇元元於無窮
宜其功化宣昭讐敵歛衽顧內則不能無以生民窮
困為憂外則不能無虞於僭竊意者 陛下殆當抗
聖志於高明而汲汲講求宗廟社稷所以經遠持久
之計使海內久安而車攻復古之詩作不足以為難
也臣嘗謂自昔中興之君漢光武可以為法而晉元
帝唐肅宗可以為戒元帝東渡以羈旅為國日不暇

給而賞刑失中強臣跋扈晉室終以不振肅宗雖復
兩都急於罷兵不遑遠慮終唐之世不能取河北蓋
皆志趣卑近苟且徼幸一時之功趣過目前而不及
於經遠持久之謀是以功烈止於如此光武旣清大
慙四方僭亂以次削平方講藝論道於戎馬之間選
建德誼之士序之群臣之右非特紀綱維持足以垂
裕來世風俗之美庶幾三代之盛臣不勝區區願効
涓埃之誠竊謂 陛下聖志先定而垂精詢訪以輔
睿聖日躋之學申明紀律以張皇國威敦獎節義以
厚美風俗以民心為基本則務安靜而勿搖以忠良
為腹心則使竭節而勿貳臣有以知讐敵僭竊之不
足以為憂而保宗廟社稷無疆之休以追配漢建武
中興之盛將必由此臣忘其踈賤冒進狂瞽惟
陛下裁赦而擇其中取進止

四

臣聞善謀天下者必先立天下之大勢大勢旣定雖
疆場之虞一日百變而不足以為憂苟惟不然雖廢
政毛舉萬目畢張而無補於得失之數漢有南北軍
及期門羽林諸校之兵悉聚京師而騎士材官散處
郡國緩急出羽檄以召之所以處天下輕重之勢其

審如此竊觀今日王師之在行在者東憑淮泗中控
襄沔西保隴蜀屯列要害聲援相及 陛下六飛憑
江指授諸將天威所加士氣百倍天下形勢之所在
既畧定矣臣聞周廬缺屯衛之師則扈從單寡非所
以嚴宗廟帥府乏士馬之饒則聲勢微弱不足以衛
王室竊謂 陛下宜少垂聖思明詔大臣倣西漢之
微意按顯德之故事蒐東四方材力健武之士以補
宿衛之缺爪牙設張而宗廟尊嚴亦足以潛銷四方
之變遴選智畧威望之臣以帥諸路使之蒐閱文武
汰簡將士進可以扞蔽京師敵王所慊退可以生制

匹夫號譁之亂然則宇社之安雖太山而四維之不
足以為喻惟 陛下留神赦其狂瞽取進止

五

臣竊惟 陛下纂編于茲累年側身修行如周宣王
推誠御物如漢光武斯民脫塗炭鋒鏑之患日夜企
竦以望休息四方賢材馳驚而起孰不願効尺寸之
長以助 陛下大有為於今日者雖朝廷規為之志
未始少衰然事無大小每病於不立而不能悉如聖
志之所欲 陛下欲攘夷狄則逆胡管蔡盜據都邑
而未有撤誓之安欲銷盜賊則江嶺之寇鈇暴累歲

國家利社稷合天下之正義而毋卹匹夫徇私之怨則雖驚桀之虜將斂衽而退聽然後天下之事惟陛下之所欲為周宣漢光之烈臣待罪史氏執筆以俟取進止

六

臣聞將以謀人之國而求有所逞於讐敵自古有天下國家處於離合之際其謀議之得失今可覆視者非一人也為待時之說者病其玩日愒歲而至於媮喜進取之謀者病其行險妄動而及於敗二者不能相通而常處其一偏是以成功不可見而偏受其弊

臣嘗為之說曰莫若自治以觀釁苟吾所以自治者未至也敵雖有可乘之釁而我不可以動我能自治矣敵無釁而妄動幸而勝則疲民以逞而根本搖不幸而敗則債軍於外而社稷危可不慎哉詩云迨天之未陰雨徹彼桑土綢繆牖戶今此下民或敢侮予孔子曰能治其國家誰敢侮之孟子曰及國家閒暇明其政刑雖大國必畏之矣惟能日夜厲精率勵衆志是以未嘗不待時也而不至於媮范蠡曰強索者不祥夫吳君王之吳也王若蚤圖之其事又將未可知也又曰從時者猶救火追亡人也蹶而趨之唯恐

弗及惟其審知彼已必順天道是以未嘗必進取也
而不及於敗詩人范蠡之言通為一而無所廢謀人
之國而其逞於讐敵其有不得志者乎臣仰惟國家
艱難以來虜偽相挺邊不得徹警徃年江上之捷日
者偽劉之廢中原之釁可謂大矣而吾終未肯求有
所逞豈非以行險妄動為不可以不戒而於吾所以
自治其國家者將益求其至歟今日之勢雖未至於
危機交急亦可謂迫矣謂宜斷自聖志思聖人愛日
之義憂勞庶政無須臾之怠凡事之故常非天下所
以安危者悉歸之有司輔相大臣相與一心戮力經

營思慮明禮義正綱紀除弊政振偷俗撫循凋弊之
民淬礪士大夫而責之以職業凡皆以求吾所以自
治者然後謹察四方之變接隙而起安受其燼以致
天地之殛雖有智者亦不知為敵謀矣以 陛下聖
學之高明固已灼知古今興衰得失之數臣不勝惓
惓効其涓埃惟 陛下裁赦取進止

七

臣竊惟 陛下踐艱難之運自始初政清明以至於
今憂勤恭儉日慎一日而兵革未息亭障多警欲信
威四夷則戎律未舉欲寬卹民力則兵食方急欲澄

省冗官則軍賞猥多是以 陛下雖有大有為之志而至於發政造事以為天下經遠持久之計者皆未遑暇間者天啓戎心畫地數千里悉歸於我雖異時之變未可以預知意者天其以禮悔禍使 陛下間於憂虞而大有為之志將有所伸此萬世一時也然天下之事每以難立為患若嚮一夫獨見之言而畧衆口異同之論則政令之發其效未睹而人皆能出其私智以非上所建立是以上下未及饗其利而害先見雖欲持之以堅忍不變之心其勢有所不能竊謂謀始大銳而憚於博盡異同之見事之難立無足

怪者方漢盛時有大征伐必下公卿將軍中二千石博士議郎雜議人人得效其見聞以研究是非利害之極致然後天子稱制以決之是以上無愆今事無遺策衆志厭服而功暴當世謂宜自今 陛下將欲發政造事既與大臣謀謨於上又使卿士大夫罄竭思慮畢陳於下然後摠攬群策而裁處其中將舉天下之事惟 陛下之所欲為庶幾立經遠持久之計以幸天下取進止

八

臣竊聞多事以來獻言于朝以學校為請者不一然

吳中非定都之所又有調度不足之患天下孰不知
陛下未始忘此顧有所未遑爾臣不勝過計私憂聞
之孟子曰學則三代共之皆所以明人倫也人倫明
於上小民親於下自頃國家多故士大夫處於成敗
之間大抵皆有自恕苟生之心而關於伏節死難之
義風節陵夷俗化衰替則國從之是以斯民尊君親
上之意亦有所不至而其為亂也輕人倫之不明為
禍蓋亦博矣然則設為庠序育天下之材而摩厲之
以德義崇獎其志行之有耻者以明示好惡使父子
君臣之倫大明於天下亦今日之所不宜後也取進

止

九

唐設武舉而得郭子儀周世宗詔藩鎮擇取材武之
士悉送京師縱有負犯不問所從來遂以兵強天下
竊惟陛下方撫攬群策率勵衆志以濟艱難而虜
偽相挺師兵在行謂宜開設武舉蒐拔將材須洞曉
韜鈴而可責實用長於緩御而士卒樂從出入行陳
而志氣不懾者隨材賦任必有可觀又明詔州郡諸
軍百姓中有武健驍捷者悉送行在所汰簡練習以
補禁衛之缺四方之奇材武力悉聚京師則本疆末

弱可以消匹夫山林之變侍衛雄盛則爪牙備設國
威自振惟 陛下留神裁幸

參堂劄子

某竊聞周顯德中唐人使劉仁贍守壽春以世宗之
英武窮兵力於城下僅乃克之夫以周師之強畏壽
春之議其後莫敢越淮而南窺者誠地有所必爭也
世宗旣克壽春惡其地險非中原之利徙州於下蔡
今國家駐蹕東南觀變俟時以圖恢復區區管見仁
贍所守實為要地謂宜增濬城隍戍以重兵擇將使
守之倘壽春卓然有可恃之備則自淮以南務農積

粟蒐闔武備以為北伐之根本恢復之功指日可冀
豈特限逆虜之深入而已哉

上宰相論淮西事

竊聞合肥之兵擁脅主帥萃城郭而野次以勢料之
當出三策先遣間人通耗偽豫挾其妻子席卷北去
一也敵人猜阻入北不受徘徊山澤以待招撫二也
曠日持久芻糧之絕橫流四出掠奪四鄙或突據城
邑以爭一旦之命三也竊觀自古南北之時翻城提
兵叛入于敵國者不可勝數惟能以長計制其後故
雖邊鄙震動而不能為根本之患以其觀之使其席

卷而北僭竊之寇能收其桀黠以來蕩搖我邊疆當
簡拔將帥厚集兵力以待之而已將卒老幼無慮數
萬雖徒手張拳猶可慮而况執銳而被堅乎若入北
不受當有悔過而自新者宜遣近臣之忠信長厚通
達大體者往諭恩指示以寬大雖有長惡不悛不能
自反者亦當較計利害以來歸命其尤可憂者或四
出鈔暴突據城邑將外連姦隣以間吾釁則其為患
也持久而未艾然諸將之名位相軋無所稟命士卒
之心反仄未安逆順相半謂宜密諭諸帥厚其禮命
以開其向化多設反間以潰其腹心也據要害以制

其侵軼堅營清野以絕其資餉然則雖復陸梁旬月
之間其勢終亦安能有所至不勝惓惓獻其千慮之
一惟廟堂圖之

上趙丞相劄

某紹興四年備數館閣閣相公初預大政聞諸道
路相公論當世之士可以與於斯文者聞及無聞之
名氏仁人君子方其道德佐人主大有為竊自隱度
未有可以補助下風者艱難甫尔亦懼未暇器人於
文字之間是以躊躇躑躅終不敢有獻於左右茲蒙
推擇待罪東觀効其編摩以奉令承教於史氏之末

特蒙借之詞色許悉其不腆之文以備觀省方今四海之士抱尺寸之長孰不願為當世之材以自著見其名氏者顧某何人得此於門下可謂榮幸某自兒童知喜文藝年及冠去場屋未嘗一日而捨筆研也流落僻左中原賢士大夫之所不至徒景慕古人而無師友之益落筆纏纏自喜心知去道益遠未始以為是也行年二十七八聞河南二程先生之餘論皆聖賢未發之奧始捐舊習後除其心以從事於致知誠意之學雖未能窺其藩籬然自是所為文視十年前無十之三四甲寅之秋身罹大難荼毒流離自

分必死而又盡室飢寒之憂朝不謀夕事之可以分其思慮者未易以一言盡也於是視十年之前無十之一二蓋今箱篋之間偶免於覆瓿者皆少作可愧無用之詞去夏蒙朝廷收召寄家建州之浦城乏賃僕之費僅能襍被以來書史不能携一字而況少作可愧無用之詞乎相公稍寬旬月之譴已走僕喻妻帑使撥拾草葉以來當繕寫以塵燕几儻矜其陷溺於蹇淺叢刻之日又悔而學道未有聞也而收教之相公樂育人才之意字於天下豪傑之士將有聞風而興起者矣

代人劄子

臣聞自昔阻長江之險而國於東南者皆非得已也東漢之衰曹操旣以安輯兗豫日出其兵以征伐四方孫氏捨江介之岩阻將安所據依以爭利於中原也故曹操之兵號為無敵於天下蓋嘗身悉其武銳方洋淮泗之上阻濡須而不得進然吳人未始一日而自安蹈瑕履釁以爭利於新城合肥之間者殆無寧歲彼其一時君臣相與謀其國可謂審矣蓋淮泗者江左之屏蔽也吾方國於東南而外無屏蔽之足恃顧欲畫江以待敵比陳唐之所以不能國也晉建

元以來大抵祖吳氏之餘謀其間得失之數所以安危存亡者亦可以鑒矣陛下撫中興之運于茲累年六飛憑江指授將士方且安集江淮以張恢復之勢臣於此時誠被選擇奉使准右竊惟今日立國之大計必有成算非踈賤所能知然兩淮累年賊馬蹂躪之餘城邑單外而儲峙空虛莫得仰憑威靈少假歲月使臣得竭其區區以奉承朝廷之命令庶幾於江淮屏蔽之固有補萬分之一取進止

詩齋集卷之七



國家圖書館, NATIONAL CENTRAL LIBRARY, TAIWAN, R.O.C.

常齋集卷之八

策

試館職策一道

對天下有常勢非人之所能為也自古恢復大業之君雖其憑藉積累之基有厚有薄祖宗德澤之在民者有淺有深然皆徒手掃地無尺寸可挾之資而卒能有所立惟能因天下之勢審擇至計而固執之以求合夫當世之變而皆不足以為難也是以姦人矯誣竊弄神器國命移奪大統中微而不足以為難干

新安朱松喬年



戈之釁起於骨肉裔夷投隙蕩搖中夏而不足以為
難五大在邊尾大中乾強藩阻兵提戈內指而不足
以為難此漢晉有唐中興之君所以趣時合變而各
有所立考其行事而質確其成功雖未易與創業之
君同條而語亦各因其一時之勢如此而不可誣也
昔之君子蓋嘗有以少康為賢於漢高帝而評創業
中興之難者矣世徒見夫草昧之初四方之姦豪圍
視而起必有挾智勇絕人之資者與之驅馳角逐於
矢石于戈之間崎嶇百戰次第削平而後定于一則
曰此創業之難也承奕世之弊先王之澤微矣粹然

有非常之變發於智慮之所不及乃欲徐起而振其
弊疏剔荒穢支柱傾搖以求趨於安全順治之地則
曰此中興之難也蓋嘗論之謀國有得失而成功無
難易方經營纂集之初其勢如洪河巨川橫流於中
原突蕩衝擊分裂四出自常人觀之雖欲拱手終日
以求遏其勢之萬一而不可得智者因其勢而利道
之積之於其所當止投之於其所欲趨孰不靡然以
聽吾之所為者曾何難易之足云哉方新莽之盜漢
也漢之遺臣屈首屏息以聽命之不暇一時英豪不
勝其憤投袂而起舉恢復之師者曾未及有為而奔

走折北一敗塗地光武與南陽故人因下江之衆屠
尋邑百萬之師於昆陽之下遂夷大憝不失舊物而
漢中興方群胡之亂華也劉元海起晉陽石勒起上
黨符姚慕容次第爭奮元帝東渡摠其雋乂以為耳
目股肱心膂內則王導周顛立經陳紀以安輯邦家
外則賀循顧榮喻德宣譽以鎮服同異卒以襟憑江
漢垂裕來世而晉中興天寶幽陵之變河南北淪沒
二京不守肅宗起靈武以羽檄召勤王之師李光弼
郭子儀以朔方之兵徇三河以收趙魏張巡許遠合
豪傑之力嬰睢陽以蔽江淮卒以芟夷安史汛掃九

廟而唐中興是三君者雖功烈之崇卑不同其本末
始終可考如此是宜明問以謂所遇之時所因之勢
有所不同不可以一既論也迹夫生民以來天下之
變備矣積功累仁尊國長文莫如周而宣王號中興
本末終始見於詩之二雅然核左氏之語則南國有
敗績之師驗范曄之論則克戎淹歷歲之文蓋雖未
能純於文武之序而豈後世遭變之君所能及哉誦
雲漢之詩其辭憂迫勤懇則有以見其側身修行惻
然有應天感民之實百姓所以愛戴歸往而不忍忘
也誦南征北伐之詩其詞切直而奮厲則有以見其

將卒協心卒乘輯睦此蠻荆殲虜所以莫敢不震動
疊息而華夏乂安也誦侯誰在矣張仲孝友之章則
有以見在人主之左右者咸懷忠良以善王心而無
沮撓事機妨功害能之行也誦言甫作頌穆如清風
之章則有以見謀謨帷幄之臣莫不相與協和精白
以圖事功而無權利相軋日疾護其之行也以至民
不安其居大夫為之還定安集勅勞于野而不怨則
見於詩之鴻鴈君臣相與愛日待旦以樂事勸功而
無玩歲愒日之意則是於詩之庭燎此其所以承厲
王之烈而文武之業永隆於地赫然中興播於詠歌

其所以致之之道焯然其不可誣蓋如此也君夫擇
其善而繼其違察其始以要其終蓋有不絕於文武
之序者後之君子將酌古以施今不可以不論也是
以不知以佚道使民而使瓜牙之士不得養其父母
而有轉予于血之歎有如祈父之所刺不知建德以
保民病其離散料于大原有如仲山甫之所讖以至
怠于十畝之籍不知務農以敦本而撻駘及之然則
淹日待久而功烈不終無怪乎如左氏范曄之所記
歷觀古者中興之君臣將以大有為也必相與憂勤
惕厲戮力一心撫事機之會日計其進而歲計其成

將欲圖是功也則必有是事事立矣而功隨之未有
泰然無事而聽其自為者也譬如築室自始基以至
於成譬如稼穡自始耕以至於穫理之必至不愆于
素築室而草創則必有震風凌雨之憂耕稼而鹵莽
則必有凶年飢歲之患如周宣王其合於先王之道
也足以致中興其不純於文武之序也亦足以致克
戎之不易後之承前緒而當危亂之後者可以不鑒
哉恭惟 國家祖功宗德涵育區夏僅二百年方將
系隆復振於夷狄侵陵之餘收遺民於鋒鏑煨燼之
中與之竭力以圖恢復明問乃謂欲因今之勢而圖

回之何劇何易孰後孰先搜拔賢能之方設施政事
之統必有卓至之論悉之究之以備采擇嘗謂自古
天下國家興亡有至計而國勢之強弱兵力之盛衰
土地之開蹙不與焉一曰順民心二曰任賢才三曰
正綱紀非以國勢兵力土地之三者為無與於興亡
之數蓋非興亡之所繫故也衛之孱微而季子知其
後亡楚之敗亡而逢滑知其必復則國勢之強弱非
所論也吳克齊師而子胥有天祿亟至之憂越棲會
稽而范蠡決定傾與人之計則兵力盛衰非所論也
天寶之功拓地至廣而無救潼關之敗奉天之守無

地寄足而終推長安之寇則土地之關蹙非所論也
然則天下國家興亡之至計蓋有在矣孟子曰三代
之得天下得其民也得其民者得其心也大哉斯民
之心乎自古興王所藉以為立國之基本而無敢輕
犯焉者也是故思祖宗之所以得其心者而摹述其
志鑒往事之所以失其心者而毋踐其轍以至發政
揆事制令出法必皆求合於所謂至愚而神者是以
可以使之蹈白刃赴湯火而不可與為亂夫誰與之
敵所謂順民心者此也天下未嘗無賢才也失所以
任之之道則漢唐之季舉天下之賢才而錮廢翦棄

之王室亦衰得所以任之之道則百里之國而強鄰
暴國莫敢肆不義於其君是以兼聽博采而務其並
進委任責實而要其成功然後舉天下之事唯吾之
所欲為無不如意所謂任賢才者此也自天子至於
庶人等級相承以建邦家蓋有綱紀以維持聯屬於
其間是以長久而不亂若夫風憲之威振而朝廷清
明邪枉之門塞而朋黨銷伏嚴刺舉之責使姦凶者
不得以病民申紀律之威使驕惰者不得以冗食夫
何患天下之不治寇讐之不滅哉所謂正綱紀者此
也歷考前世興復之君謀國膺變之方雖不可毛舉

其要不出於此三者是以我有卓然可恃之備然後
察其四方之變徐起而應之扶衰而錯之盛補壞而
復於全其必由此矣傳曰君子愛日語有之時難得
而易失惟上之人實圖之謹對

策問八首

天下未嘗無非常之變也然有國有家者或因變以
成功豈非在其君臣相得之際哉小白遭無知之變
而管仲相齊以霸諸侯勾踐脫會稽之難而范蠡佐
越以滅吳昭王承之會之亂而樂毅佐燕以報齊是

皆傾擾困蹙之餘自他人觀之疑若僥然不可以終
日而三君子之為其謀也僅若寓物鄰家而明白
取之無不如志觀其謀國應變之方雖不可以毛舉
然莫不有一定之計君臣相與固守而力行之蓋夷
吾之霸齊是制國寓軍之法而已蠡之圖吳是驕敵
以待變而已毅之報齊是求諸侯之援而已夫謀其
國與謀人之國苟無屹然不變之計而依違俛仰以
僥倖於倉卒之間亦見其踈也國家承平垂二百年
比緣姦人擅朝腐夫弄兵馴致戎夷內侮之禍寔有
宋臣子萬世必報之讐恭惟 聖天子憂勞側席日

廷外拜之議其深謀至慮不得而知也敢問諸君亦
有一定之計當固守力行而不變如古人之為其君
謀者乎夫考古以施今非謂其已陳之迹意其圖回
內外本末緩急之序當有可言者有司願與聞焉

二

天下有大戒二無所逃於天地之間父子主恩君臣
主義如人呼吸食息於元氣之中不可以須臾離也
自古志士仁人非苟自輕其生以立區區之私義而
已蓋深畏夫君臣之義廢則為人上者不能一日保
其天下國家斯人之禍可勝言邪靖康之變殉利賣

國交臂以事賊者非生職不還之流皆朝坐燕與謀
帷幄而柄廟堂者也今君臣方相與經營以圖中興
之業其桀未易以一言盡乃若學士大夫闕於伏節
死難之義豈非今日之患甚急而至大者歟敢問何
施而可以救此唐至德復兩京薛臣汙偽者三司條
罪差為六等重者誅死識者不以為過而或謂長賊
姦堅逆節以為用法太深之咎是非之說安在請試
言之

三

李晟之軍于渭橋也韓滉鎮浙西漕米萬斛往餽之

晟師實賴以成大功當是時天子在興元兩河之間
逆藩悍將往往與賊相首尾舟行所經數千里莫敢
睥睨僅若從枕席上過而無翕合之失其規畫調護
之方豈無有可考者邪屬者陝西五路之兵數以捷
告復遣上相之重開幕府以經畧淮肥天其或者祥
宋以中興之業行當撫定三河克復舊都王師百萬
必仰東南之饋如滂之規為有可考者亦子大夫所
宜素講也

四

古者兵出而在行則有前茅慮無之警整而就列則

有隅落鉤連之固止而在壘則有候遮扞衛之嚴要
以使敵人莫能得吾間然後三軍不可敗而將軍安
故兵法曰三軍以戒為固以怠為敗今夫自漢以來
號知兵後世祖述其說以為為不可及者莫若韓信曹
操信方堅壁修武漢王脫成臯之圍自稱使者晨馳
入信壁而奪之軍既滅楚陔下則又襲奪其軍於定
陶操方圍鄴袁尚使李孚入鄴城出入歷重圍而操
之軍中不知也蓋嘗疑其方連百萬之衆謂宜候望
精明樞機周密無可乘之隙而乃使人歷其几席之
側而莫之寤此與棘門霸上之軍何以異有如肘腋

之間姦人伏乃竊發則將何以待之不知後世猶以
為深於兵法者其故何也無乃雖有是事而不害為
知兵歟諸君宜極論其所以然者

五

自古君子必為執御之學而國馬之富足以為駢服
之備是以戰未有不用車者固有易之以徒而徼勝
一時者矣而非其正也後世遂易之以騎其以騎易
車者亦有知其所始者乎左氏雖喜言陳法其載一
時卒乘偏兩之制備矣而未始及騎然太公告武王
十勝九敗之詳其說在六韜之戰騎武王之時有其

法而絕不見於春秋之世此又何說哉或曰六韜非
周書也戰國知兵之士祖其餘論而推廣之設為問
對以極兵家之變今觀其書知畧橫出雜以奇詭有
認認然憂天下之諸侯合而軋已之意聖人之用心
其必不然矣然遂斷然以為戰國之書則又何以質
之故因以推原騎戰之始與夫絕不見用於春秋之
世及六韜之可疑者而訪之二三子

六

古之君子所以大過人者方日不暇給必為經遠持
久之計是以雖目前之功不可見而常享歲計之効

漢光武講議論道於投戈息馬之間晉中宗建武之
元披荆棘以立朝廷垂立太學使貴遊之胄肄業焉
菁菁者莪之序曰君子能長育人材則天下喜樂之
矣孟子曰學則三代共之所以明人倫也方時多事
四方賢智固已馳騁而四起然後來之英未有陶冶
成就之方以為異日之儲將何以善後君臣之大倫
不明於天下士大夫不以為生為耻而闕於伏節死
難之義則有大物者誰與其保其天下國家然則育
人材以廣多士之儲明人倫以起義烈之風學校其
可緩耶國家駐蹕東南以圖興復而於崇立庠序獨

未遑暇今欲建官定員延四海之孝秀而摩厲之以
德義其亦可乎或曰方戎夏交梓邊不得撤警箕歛
以供軍猶懼不贍而何暇及此是以願與諸君評之

七

書曰后非民間使民非后罔事夫君民之相求非相
為賜也斯民釋其厭惡而求其所依歸審固其心力
以聽上之政令而不敢辭者以上之人能為之去
其穢而為之主也王者亦恃斯民歸我之心以為立
國之基是以社稷久長而國家安此三代之所同也
戰國之世棄德音而不務衛鞅之佐秦顧獨美田廬

而久復除以傾三晉之民劫之以勢徂之以利要以使之非耕戰則無以要利於其上生齒日衆而國富強故能四世有勝以一天下雖非王者之盛節蓋未有不以民為本者上方志恢中原而天邑有盜據之虜日稔其惡凡今自拔左衽之中携持而來歸者皆祖宗積世涵育之遺黎裔胄也吾所以勞來安集之豈徒鎮撫其惓惓之意而已攘夷狄而復境土將必基於此今欲搜其雋良黜其鬼瑣收恤其鰥寡介特之無告者使之安其居樂其業而無羈旅流落之歎此亦學者之所宜素講也敢問何施而可以臻此

八

戰國之世齊愍以技擊疆魏惠以武卒奮秦昭以銳士勝荀卿曰此皆干賞蹈利之兵未有安制矜節之理也雖秦之銳士不足以當威文之節制嗟夫有國家者雖未能去兵而無古人節制之法糜爛其民以爭社稷一旦之命是豈仁人之用心也哉諸葛亮以區區新造之蜀歲出其師以窺魏之關中軍出之日天下震動而國人不憂論者以謂雖威文節制之師無以過夫以魏兵之強未能加秦之銳士而亮終不能少騁以得其志此又何說哉唐旣一天下異時在

弦之雄憑陵邊疆患苦中國者偏師深入亟斂手而
就禽兵威之所加鞭笞百蠻莫不如意中世盜起幽
陵兩河橫潰蓋有屹然提孤軍以當乘勢彙疾之鋒
無敢犯躡其師徒者比斂兵而據險賊雖垂涎以睨
京師逡巡而不敢進一時之將蓋展幾有得於古人
節制之意皆有遺法著在方冊諸君其推明荀氏立
言之指攷此數公部分教勒之法有合於古人而條
析其勝負得失之所以然者為有司索言之

常齋集卷之八

常齋集卷之八



常齋集卷之九

書

代人上郡守書

竊以明天子閔仁遠民思有以鎮綏之輟閣下於臺
端之重付以一州視事未幾塗炭之遺民人人自以
為將被惠澤困於會暴之吏抱抑屈而不得申者人
人自以為有所赴愬州縣之吏潔操行抱才譖者皆
奮迅凜被人人自以為將受知於下執事某於此時
實備下吏竊嘗自念士之仕於州縣者雖其志不足

新安朱松喬

書



以及遠然上之則欲扶持柔良折伏姦暴獄訟必毋失其平施舍必毋失其中稱朝廷所以委使之意以求知於上下之猶欲整簿書急期會期於無過以免訶譴詰責之辱又不及是而愈下則刑戮斥逐加之而不以為過今政和建之下邑也剽盜之後民無蓋藏且闕公門訟訴之牒不能十數常賦之輸比他邑或不能十五無豪宗大姓陵轢細民以廢亂政化地斗入東南與溫福為境又非孔道共億厨傳之費以某之庸踈處于此竊自隱度以為奉令承教或可以無過聽於下風今者迺聞閣下有意督過之深恐進

見之際迫於威嚴區區之意造次不能以自達輒以尺書控愬於下執事某少失先人與老母相倚為命今行年逾七十矣今夏暑方甚府中遣吏持檄敦迫赴官冒大暑扶持上道到官未幾得寒暑之疾妨於飲食寢興須人至今未平也方得疾之初山邑無醫藥回皇怵迫莫知所以為計適聞大旆入境念當具圖籍抱符鑰跪起屬吏之末庶幾咨稟條教聽受約束仰稱閣下具宣明天子德澤之意欲前不能進退維谷者累日夫親疾之所以亂其方寸者如此則獄訟施舍簿書期會之間容有精力之所不周照察之

所不及雖加以刑戮斥逐其孰以為不宜乃若某
之情則猶有可言者韓延壽為東郡太守嘗出臨上
車騎吏有後至救功曹議其罰門卒建言曰今日明
府命駕未出騎吏父至府門不敢入吏趨出省父而
見罰得毋虧大化乎閣下方崇獎名教以整頓人物
必將有處於此以閣下望實之重督責之精明如此
而某平昔之志亦粗欲求知於世不至自棄於沒沒
無聞之地而慕爾之品非有難集而不可為者儻假
之以旬月之期以閣下之靈老者飲食起居漸復於
舊敢不勵精畢力疆外無所避若猶吏治弛廢過惡

暴列將投後自刻以聽命于有司閣下雖加以虧
寬免之惠亦不敢承也

荅莊德榮秀才書

某頓首昨辱中馬其寵顧區區未能款扣所聞辱惠
書禮盛志謙雖不敢當然近世大學之道蕪廢士無
貴賤徇世相師千百一範莫知孰使陶之者不自量
其愚不肖竊有憐之之意頃來尤溪甫兩月雖獲遍
拜邑中之士而未詳也索居深念惟小人之歸是憂
乃有識明志高傑然自投於流俗如吾友者其為欣
幸未易具道夫仕而志學如農夫快一朝之飽而釋

終身之耕殫於溝中可立而俟然則仕而志學猶飽而念耕亦不足道也抑聞之先生長者禮記多曾諸儒之雜說獨中庸出於孔氏家學大學一篇乃入道之門其道以為欲明明德於天下者在致知格物以正心誠意而已其說與今世士大夫之學大不相近蓋此學之廢久矣自周衰楊墨雖得罪於聖人然乃學仁義而失之者至申韓儀秦之說勝而士始決裂聖人之藩牆以阿流俗之所好至漢文景之盛未衰也以至于今蓋嘗有以斯文為己任者起而倡之然世方嬰於俗學以自強屹乎其不可攻也某方急於

祿養未能徃究其所學是以或聞吾友之言凜然敬歎若居夷而聞雅雖未詳其節奏之工然卓然於吳歛楚謠之中而不可亂也書曰知之非艱行之為難夫問塗而之盲則知亦豈易哉以吾友之明苟以德為車而志氣御之則朝發軔乎仁義之塗而夕將入大學之門以躡中庸之庭也如某之驚憂且追後乘而莫及其何以相吾子在勉之而已若舍此而問塗則今之學士大夫皆知津矣未即款晤自愛之望

上唐潛書

某嘗不自揆以所學乎古者妄論天下之勢以謂一

介之士歛然自修於環堵之中其勢力輕重不足較
於世也明甚至其風聲氣俗則有天下盛衰理亂之
所繫者蓋嘗竊怪先王之時其士君子皆敦厚朴實
溫然而自重富貴利祿若不足以介其意而後之君
子髣髴其餘風者何其少也其一時號為名卿才大
夫者名雖滿於天下而道不足以善當世之俗勢雖
臨於一時而德不足以懷來世之風上下相持以入
於弊而風聲氣俗不可復振無足怪者三代而上其
詳不可盡知然詩書所傳猶可想見士之退處於陋
巷者時君世主招以子車駟以幣帛有非其物者欲

見且不得而况可屈乎故上之求其下也不敢輕非
獨一日之勢有加乎士者不敢輕蓋雖天子不敢輕
也故士之自待也不敢不重詭遇而貪得者出不容
於朝歸不齒於鄉故下之望乎上者不敢以已之所
不至者徼幸於一時而皆止於至足之分蓋在上者
尊德樂義之誠不如是其至不足與有為而士之自
立於世者不如是不可責以有為也後世不然上之
則有科舉誘之於前使之決道義之藩以阿世俗之
所好下之則有薦舉推之於後使之因廉恥之隅以
徇私意之所欲其間固不能無卓然自信異於孟子

所謂凡民者然積習日久百世一範而猶責其有為
於世其亦踈哉嗟夫此豈獨士之罪也嘗讀成湯禱
桑林之詞有曰士失職者知士固有職必求所以克
之蓋其從事於六藝之文而歷觀古今治亂興亡之
變隱之吾心而不遠質之聖人而不戾達之當世而
不悖此士所學乎先王之道者也是道也得之心得
之身發之言推而被之天下無二焉士惟有得於是
也抗顏不讓自任以天下之重而君子不以為誇待
之不以其禮則翩然去之而君子不以為傲與天子
周旋以圖回四海而君子不以為泰抱關擊柝寸祿

是營而君子不以為汙士之職如是其重而不知學
先王之道以克之命曰失職之民故愚以謂士之風
聲氣俗有與天下之勢相關者在於士之自重與否
而其失職而可罪者又將推之而責之在位之君子
恭惟執事以絕人之賢方進為於聖世天子付使者
印使來閩中以言乎民則入城生齒之衆執事兒子
撫而龍蛇驅者以億計以言乎吏則領挈衡稱輕重
升黜在於一言者以百計以言乎權則天子所寄以
耳目而事無巨細人無賢不肖皆得以言於上則亦
在位之君子也以某觀之不知其他閩中之吏苟賤

為甚自蹈汙蟻少所愧恥上官一不得意則呵叱慢罵辟易不敢仰視雖其間有修潔才謂之吏得免於此者蓋寡則亦無恠乎士之不知所以自重也恭惟執事執古之道而行今之世固與夫今之所謂君子者異故以某之愚且賤而敢進其猖狂之說以謂風俗之美惡係於有位之君子而使夫士之自重者得少擬其志不至於失職而可罪則執事其任之某江南草茅一介爾既冠與有名於吏部來閩中今七年矣不肖之名字蓋未嘗掛當路之齒豈敢妄自比於士之自重者蓋自度其疎頑無所用於世雖有好古

之志而於先王之道未有聞也挾不足之資以求之於人實懼獲罪而不敢比來尉尤溪為邑僻左雖辱在庇臨莫緣奔走於下風望顏色而受約束心以事荒蕪業蕪廢是以滋不敢有意於當路之君子然竊嘗講聞執事之美有嘉祐慶曆間公卿之餘風其責僚吏必以公事未嘗以其私忘部使者之尊以禮知名之士此其可以情告而理扣也故敢推廣其所聞於古者風俗之所關而以其責歸之執事若某者其亦失職而可罪之士也顧何足以與於此蓋嘗聞其說云尔其或市骨求駿式蛙求勇之意願自隗始將

見風俗之變人人知自好以求附於餘光而勢足以
加士者不得僕隸視其下其稱於天下之勢蓋不小
矣則執事之建立所以善天下而竦後世者為如何
邪謹復料理十數年來古律詩若干篇繕寫以為獻
此古人以為賢於博奕而已者若夫不自揆而論治
道言世事者欲求教而未敢也夫以下邑之尉卑且
賤世所不數平日未嘗為起居之問一旦以書冒言
上下相待之勢而不以為嫌蓋方以古君子之所建
立有望於執事而不以流俗之胥者自疑是亦古之
道也禮僭言高愧慄惟命

上趙漕書

某少賤貧進不能操千百之金貿易取賞以長雄一
鄉退不能求百畝之田於長山大谷之中躬耕以為
養反顧其家四壁蕭然溝壑之憂近在朝夕途窮勢
迫計無所出乃始挾書操筆學為世俗所謂舉子場
屋之文者其言決裂繁碎支離曼衍而不宿於道無
用而可笑不待詳說可知也既冠試禮部始得脫去
當是時年少豪銳之氣方俯一世而眦萬物向非有
禮義法律羈束於其後先必且追隨一時之俠揮金
使酒馳騁而嘯呼以自快其意而後已惟其不得騁

故歛其使氣以玩世者而一寓於詩蓋嘗以為學詩者必探賸六經以浚其源歷觀古今以益其波玩物化之無極以窮其變窺古今之步趨以律其度雖知其然而病未能也竊嘗歎夫自詩人以來莫盛於唐讀其詩者皆粲然可喜而考其平生鮮有軌於大道而厭足人意者其甚者曾與閭閻兒童之見無以異此風也至唐之季年而尤劇使人鄙厭其文惟恐持去之不速夫詩自二南以降三百餘篇先儒以為二南周公所述用之鄉人邦國以風動一世其餘出於一時公卿大夫與夫閭巷匹夫匹婦之所作其辭抑

揚反復蹈厲頓挫極道其憂思佚樂之致而卒歸之於正聖人以是為先王之餘澤猶可見其髣髴足以聳動天下後世故刪而存之至今列於六經焯乎如日月春秋之世列國君臣相與宴享朝聘以修先君之好徃徃賦古人詩以自見其意觀時稱情必當其物不然有君賦之而臣不拜其謹且嚴如此而晉鄭垂隴之會鄭之諸卿皆賦詩以屬趙孟而叔向因以知其存亡興衰之先後其言之驗若合符然蓋心者禍福之機也心取是詩而口賦之雖吉凶未見於前而神者先受之矣至漢蘇李渾然天成去古未遠魏

晉以降迨及江左雖已不復古人制作之本意然清
新富麗亦各名家而皆蕭然有拔俗之韻至今讀之
使人有世表意唐李杜出而古今詩人皆廢自是而
後賤儒小生膏吻鼓舌決章裂句青黃相配組繡錯
出窮年沒齒求以名家惴惴然恐天下之有軋已以
取名者至其甚者恃才以犯上罵坐以貽譴擯斥顛
沛足跡相及此何為者邪嘗聞之夫子曰詩三百一
言以蔽之曰思無邪嗟夫聖人之意其可思而知也
夫王者正心誠意於一堂之上而四海之遠以教則
化以綏則來以討則服與夫僖公牧于魯野而其馮

晉有可用之姿蓋本一道而詩三百之意聖人取一
言以盡之乃在於此後之學者不深惟古人述作之
旨而欲以區區者自名曰詩誠可憫笑某也何足以
議此徒以少日嗜好之篤學之而不至也深惟學將
求婉於古人不本是求而唯末之齊亦見其勞而無
功矣恭惟執事高文奧學標準一世其主盟吾道推
轂後進盖有先世之遺風方持使者節控引一路微
勞末枝日效於前以希獎掖而某以菽水之意竊祿
僻邑未嘗得拜伏於下風得於傳聞不肖名氏似嘗
掛齒牙之餘論得無有稱道少日率爾之作以欺執

事者乎篆刻可悔方竊自毒雖知唐詩人之區區者
為可笑而求以庶幾夫聖人之意此非執事將安所
質之竊觀執事大筆餘波溢為章句句法峻潔而思
致有餘此正如韓愈雖以為餘事而瑰竒高妙固已
超軼一時矣非深得夫聖人所取於詩之意與夫古
今述作之大旨其孰能至此某願聞一二焉故輒料
理十數年所學為古律詩五七言若干篇繕寫塵獻
譬諸博奕或可以奉公退之一笑昔宋廣平之沈下
僚也蘇味道為綉衣直指使者一日見廣平梅花賦
驟稱於朝始為聞人且廣平宏毅開濟之姿雖其未

達宜已表世而傑出豈其屑屑於一賦以求知於人
而味道於此亦復捨其大而稱其細豈非蘊諸中者
必逢時而遭變而後見強聒而自鬻者君子之所賤
而文字之美可一見而決以為階乎廣平則某豈敢
議然執事望臨一時四方之士希一言以軒輊於世
則其區區自獻而有望於門下者亦士之常分而君
子之所恕也文凡諭僭今之君子或有所不容若夫
古人上下相求之義非執事誰望邪賤職自縻未由
面請願誨惴慄俟命

上李丞相書

其聞今世游談論說之士未嘗不以人材不足為患
其獨以謂今世之所患者非乏材也君臣之大義不
明于天下而學士大夫闕於徇國死難之節豈非今
日之患甚急而至大者歟蓋父子主恩君臣主義是
謂天下之大戒無所逃於天地之間譬如有生之類
食息呼吸於元氣之中一息之不屬理必至於死先
王設為禮樂政刑所以維持膠固者甚備而夫子孟
軻之徒道既不行於天下退而與其徒講說論著丁
寧深切至矣遺澤餘風被於末世時有一節之士力
為奇詭絕特之行鼎鑊在前刀鋸在後攝衣而從之

之不啻若牀第之安亂臣賊子斂手變色莫敢肆不
義於其君豈特苟輕其生以立區區之私義而已哉
蓋深畏夫君臣之義廢則為人上者不能一日保其
天下國家生民之禍豈復有烈於此者乎夫惟今日
之勢將御天下之智力以除寇讐而安國家必務明
君臣之義以厲天下使天下響應景從奮不顧死以
徇王室則必有大臣焉以唱之建安之初胄公奉天
子都許披荆棘而立朝廷海內之士爭出所長以叶
成謀主豈復有漢室也哉於斯時也諸葛孔明推藏
猷畝之間視士之輻輳於魏者不啻若臭腐腥羶之

在前方掩鼻疾趨而過之惟恐其晚已而見汙焉一朝得豫州決策立談兼取暗弱倡大義於天下祀漢配天而大敵震動廣明之亂僖宗入蜀大盜據宮闕生民糜爛四海蕩覆藩鎮勤王之師愕怡相顧皆意唐室不復振逡巡而左次者相望也王鐸為諸道都統檄書所至霆擊風馳壯士增氣王處存李克用之徒決死力戰惟恐居後遂夷大盜克復京師今夫生民以來尊君戴土之心與生俱生未有知其所以然者不幸淪於久衰之俗劫於積威之餘既久而其氣索然以憊則雖有可用之材布滿於天下而不能有

所濟有一人焉命世之傑者鼓動而風厲之則天下之中材皆可以立事故孔明王鐸皆當王室之衰而各能有所成就世徒見其功烈之盛謀謨之偉而莫知大本之所在在於倡君臣之義以立士大夫殉國死難之節而已有宋之盛萬里一姓垂二百年一時人材尺寸短長皆得自効而賢知妄庸雜處於其間皆可以安坐談笑而取富貴其於士大夫可謂無負矣頃者京師之變虜人輕去巢穴犯吾國都其勢至逆也四方按兵相視莫肯攘袂爭先以決一旦之命而塗地之餘徇死貪生交臂以事寇讐者非失職不

遲之徒皆朝坐燕與謀帷幄而柄廟堂者也夫義不明而風節淪喪自開闢以來亦有甚於此者歟則夫明君臣之義以厲天下必有命世之傑焉以倡之非僕射吾誰望邪恭惟僕射相公始為史官方朝拜以言為諱指陳闕失姦諛震動遂得罪以去又歸而為侍從當宗廟社稷危疑旣沓之際不動聲氣親決大策既已展幾於再造王室矣至靖康建炎之初群邪並進爭為誤國之計以售其姦獨僕射所建白皆天下國家所以安危之大計至今焯然在人耳目非徒其言不用又放棄而瀕於死且身雖流落而益尊食

祠官之祿優游江海而望益重身去朝廷無殺生賞罰之柄而天下之善類有戮力王室之志者皆以為歸自非深明先王所以維持膠固天下之道與夫子孟軻之所丁寧深切者其孰能至於斯歟某江南匹夫爾跌宕塵埃少所合於世今也樂道僕射之德業風義以風曉當世矻矻而不知止以求齒於賓客之末抑將考質舊聞而求策其所未至若夫慨今援古飾說獻諛以希一日之睚豈獨某所不為亦豈僕射所望於天下之士也哉

上胡察院書

其江東書生也素無他技能又去為州縣之吏益碌碌不見齒於流俗獨嘗究觀載籍以來天下國家興亡治亂之變與夫一時君子所以應時合變先後本末之序甚備思得考質是非以上下其議論而山海崎嶇之間王公貴人之所不至太守部刺史去朝廷遠尊嚴亢絕氣息弗然不復可近又家素貧俯仰水菽之養朝不謀夕勢不得一日釋去以從先生長者遊然考之詳則其自信也篤自信篤則其合於世也益難此其所以婆娑山林甘忍窮寂雖久而不敢悔也今者乃聞天子仁閔塗炭之遺民而使察院撫諭

一方色仁氣溫不間微賤專為朝廷訪求得失蒐拔人材以稱廟堂急治之意雖使事有指而區區過計之憂竊願有獻於執事某聞古之為天下國家者雖其積累之厚薄有逆有順有短有長而其意指規模未嘗不為子孫萬世之計蓋未有俯仰依違苟度旦夕曾不為終歲之備而可以為國者衛文公之封於楚丘勾踐之脫於會稽蕩覆之餘君臣徒手掃地赤立惟其大計已定故上下相與堅忍卑辱痛自抑損而不敢少變焉是以皆能有所成就而垂裕後世苟惟不然譬如千金之家不知堅據田園廬室之便以

滋其材力而強善暴客並起而乘之則又捨而之他
是雖有陶朱猗頓之財亦終以窮困而莫知所稅今
君臣相與經營中興之業其槩未可以一二數也然
獨不知今日之意但欲襟憑江漢控引荆吳以保東
南而已乎抑當克復神州汛掃陵關據中原而撫三
河也某聞之不取關中中原不可復也不取荆淮東
南不可保也夫三秦之固勢擅天下自古得之以興
者不可悉數而唐最近請言唐事天寶之末安祿山
舉幽陵之師以踐河南唐既亡矣肅宗治兵朔方指
擊諸將席卷兩京遂定三河朱泚之逆唐又亡矣德

宗駐兵漢中引荆吳之征賊卒滅泚而復京師廣明
之亂唐又亡矣 僖宗西幸成都方鎮倡義之師軟
血爭先而大盜竟平夫惟漢中之勝甘負巴蜀左控
關隴西連氐羗兵動用饒形利勢便進可以據上流
之阻退可以待四方之變故唐更三亡不失舊物
聞今張宣撫陝西之師數以捷告若以六師之重通
道荆襄循漢沔以赴興元結連拓跋控引五路因宣
撫之師東嚮以收中原一年而定關陝二年而復大
梁不四五年而天下定矣正使逆虜之餘息猶可以
陸梁彼憂吾之謀其後也其能深入為東南之患乎

若夫出於下策而但欲保有東南此雖聖君賢相之所不為而亦不可以無說夫長江之阻西距西陵東至京口僅二千里聚兵而守則可撓之地多而其隙易乘緣津而列兵則力有所不足故孫權之保建業東攻新城西攻襄漢以抗曹公而永嘉之後下及梁陳用武之盛者至以江漢之舟艦西入河渭蓋東攻新城西攻襄漢者所以保建業而必爭中原者亦僅足以守東南而已今不進次建康治兵訓武北爭荆淮收遺民於煨燼鋒鏑之餘與之戮力以圖興復而但慮處一方費日月於道途退既無所據進又不能

有尺寸之利未知漂洒者竟何如邪雖然以元子劉裕之威北震關洛而不能有所立唐更覆亡至於再三而宗社不隕天下之形勢亦可以觀矣執事將以使事歸報兩相國或訪所聞則願以告焉

上李參政書

某聞古之君子將售其所長以求合於時者造作言詞以要當世其說曰王公大人必借譽於貧賤之士以成其名貧賤之士必借勢於王公大人以發其身眉陽蘇子立論以矯之曰此韓子之夸詞也漢高不喜儒不害為明主衛霍未嘗薦士不害為名公卿今

吾自以為王公大人不可以一日而無吾也彼將退而考其實則亦無乃未至於斯歟嗟夫世之君子各建一偏之言後學風靡而不復考評至當之歸貴賤之勢日以乖睽固拒而不復合天下國家之治終有愧於古者有由也夫某嘗為之說曰士無所求於王公大人士而有求於王公大人者天下之賤丈夫而非吾所謂士王公大人雖無所待於天下之士而其勢乃當汲汲以求天下之士夫士方隱約於鄉黨身修於家而國人化之上稽先王下論歷世卷之足以善一身舒之足以善天下世雖不吾以而環堵簞瓢

之適雖南面王樂何以加之子思孟軻之徒至使君擁笈操幣因執事以求見而不可得何至僕遯以借區區之勢為哉下至衰世士不復講明道義之要而惟勢利之徇乃無以異於賈僧之交手為市隱之以三代之法是謂失職之民而何足謂之士至於先達之君子自外為一郡等而上之至於為天子之宰位愈隆則責愈重責愈重則求助益廣蓋挾一夫之智力以御無窮之變而求善其後雖聖智不能是以物色詢訪唯恐一士之不吾與網羅披剔置之胷中而天下之事無足辨者秦穆公曰如有一介臣斷斷兮

無他技其心休休然其如有容人之有技者已有之
人之彥聖其心好之不啻如自其口出寔能容之以
能保我子孫黎民亦職有利哉孔子刪書以為法於
後世而不遺區區之秦良以是哉夫以士之無求而
必責先達之君子以有求於士其說疑若相悖而不
相為用然其說之行也使天下有樂道忘勢之士然
後能助其上以有為上有好善尊德之誠心然後能
御天下之智力以立事天下國家其庶幾乎其江南
鄙夫也家無伏臘之給而有俯仰之養食初命之祿
十有五年而無天寸之進流俗馳騫之士相與比而

姍笑之誠自度其疵賤之資無所用於世未嘗敢有
意於當世之君子屏居讀書於聖賢之事業粗見首
尾雖未敢自謂有所樂乎此蓋亦庶幾於不苟然者
竊聞頃者當路之君子厭薄士類以事之紛多進大
猶有叔孫先生之遺風其急功利尚拳勇又與王楊
蘇史無以異聽於下風不勝區區畎畝之憂恭惟叅
政大資當四海文物之富以德業之盛躡天下之俊
又周旋兩禁多士風靡艱難之初進陪國論勳在鼎
彝文在典冊才高天下而禮益恭望臨一世而志益
謙負至足之勢而無矜伐廣大之色海內之士景仰

歸依奔走誦說惟恐居後豈非以能容彥聖有技之士使子孫黎民有保焉者望於明公乎今方食侍祠之祿道遙泉山之下雖碌碌一介亦躬與之為禮而其適有冗賤之役寄食於海上獲與諸生握衣賓客之末儻收而教之使得游道德之場以增益其所未至亦云幸矣意者明公大忠壯烈當復進為於世豈能忘情於天下之士顧愚不肖何足以與於此抑聞之孟子曰孔子不得中行而與之思得狂狷之士狂者進取狷者有所不為也夫狂狷聖人之所不廢明公亦有意乎干冒皇恐其頓首再拜

上謝叅政書

某少而苦貧束髮入鄉校從鄉先生游學為世俗所謂科舉之文者藐然兒童尔又方汲汲進取校得失於豪釐間然獨喜誦古人文章每竊取其書玩之矻矻而不知厭鄉先生呵而楚之不為改也於是時固已厭薄其學以為無所用於世而無足盡心也既冠試禮部始得謝去場屋中更憂患端居無事復取六經諸史與夫近世宗公大儒之文反覆研覈盡廢人事夜以繼日者餘十年其於古今文章關鍵之闔闢淵源之滄瀆波瀾之變態固已得其一二矣間嘗自

念士之於學要以求為聖人而後止推所以善其身者以治天下國家此豈口耳筆墨之蹊徑所能至哉考之以先王之法觀之以大道之序則前日之悅可耳目如金石絲竹黼黻青黃者無乃未足以進於此歟昔者竊聞之學未有無師者也學而無師雖不無一至之得責之以遠道則泥質之以大方則惑用以趣時合變則膠戾而無所合是妄意臆決之說雖復億精疲思而道日遠矣然生晚地寒無東西南北之資聞先生長者之風而不及瞻望下風者固多孟子曰誦其詩讀其書不知其人可乎是以論其世也是

尚友也嗚呼此非獨友說亦師說也竊聞往者三川之間程氏兄弟推本子思孟軻以中庸為宗而司馬文正公考正經史深於治道皆卓然有功於聖人之門蓋嘗誦讀其詩書考質於師友而聞其畧矣夫達天德之精純而知聖人之所以聖誠意正心於奧突之間而天下國家所由治推明堯舜三代之盛修己以安百姓篤恭而天下平者始於夫婦而其極也察乎天地此程氏之學也尊德教賤功利獎名節端委廟堂則忠信恭儉足以刑主德於四方而朝廷尊燕處于家則孝友廉讓足以化其國人其酌古以準今

則治亂存亡之効如食粟之必飽食董之必斃此司
馬氏之學也程之門人其高第稱謝氏不及見也新
鄭晁公嘗受學於司馬之門往以事遊鄭拜晁公于
溱洧之上時方冥菴不能有所質問而今皆逝矣古
語有之曰想望丹青不如式瞻儀刑諷誦詩書不若
親承風旨恭惟叅政大資伊傅王佐之學宗本六經
網羅百氏陶毓精粹以善其身發揮德業以善天下
固以質之聖賢而無愧矣視學於程氏者實為近屬
而晁外舅也周旋二公之間其師友淵源妄意臆決
之說豈能窺測其萬一哉日者自天子之丞弼奉身

而退優游江海之上言皆六藝之英而動有禮義之
節所謂承風旨而瞻儀刑者此正後學所當汲汲以
為依歸而不可後也而某方迫於祿養有辜摧之役
於海上雖不獲躬笈簞奉几杖以朝夕承馨效於左
右輒因謁者摠衣賓客之後因道平日區區竊有意
於古人之學與夫宗慕依歸之意以贊于下執事叅
政或收而教之方且求其放心條理舊學以丐薰沐
於函丈者將繼此以進不然其將與趨走之賤士跪
起降升旅進旅退以希一顧之寵此亦士之貧賤者
之常分而無可憾者伊尹曰予天民之先覺者也予

將以此道覺此民也非予覺之而誰也古之君子於
後學如此其汲汲也豈獨誘掖成就一時之材蓋其
祇畏天命不違寧居如此明公其得辭乎干冒皇恐
某頓首再拜

上趙樞密書

會有言事者論臣僚
獻文字干進不果後

某未聞有一日掃灑之勞於門下然聽於下風閣下
論天下之士可以與於斯文者無聞之名氏必在數
中以此久欲磨接平昔翫敵之文因介紹以贄見于
下執事復念自勝冠以來妄嘗有意於古人為己之
學而視少作之可愧者雖無楊雄篆刻之工而有其

悔誠不願以此自見於當世而况君相憂勞於廟堂
之上方總攬群策率勵衆志以圖恢復尤不當器人
於篇什語言之間是以區區所欲効於執事之前者
又無因見焉日者天子權閣下本兵柄又以四路之
地東抵河華西包巴蜀外連隴阪南盡荆漢延袤數
千里使閣下以一節護諸將節度其進退自太守部
刺史有所黜陟遂行不請權任憂責可謂重矣或謂
閣下負四海之望當在廟堂調護根本某獨以為不
然頃者宥密之臣襲其家學進誤國之計謂秦蜀襄
沔之得失不足為吾輕重是以漠然真於度外以至


今賴宗廟社稷發寤聖心絀其說不用夫虜人保三秦而分兵亟肆以疲我其意未嘗一日而不在東南使不幸而秦蜀之郊有蟻漏可乘之際則東南將無錯足之地尚何中原之可議也哉使閤下救寧反側綏輯畔換拊循士大夫東向以揚祖宗之盛德遺烈則中興之功猶可以歲月冀此其所以雖有受知門下之幸方以天下之勢為憂而不敢致私怨於遠其所依歸也區區管見懷不能已敢不以告于下執事夫身去朝廷而任事于外外有垂涎側目之虜危機交急間不容息內則率勵士大夫各率其職以奔命

于邊鄙是以其勢不可以不專其權不可以不重權重而勢專者人主之所甚惡而間言易入人惟無所欲也人皆求得其所欲而勢有所不獲則失職者衆而讒慝宏多積衆口之讒以投易入之間此天下之危機仁人志士之所深患也君子於此必求同心一德之助使在人主之側啓迪聰明以善其心而無妨功害能之意是以功成而國家可保詩曰侯誰在矣張仲孝友吉甫征伐四方而在王所者如張仲以調護於其中夫是以能展四體以徇國而無後患裴度以太原之師討鎮人元稹之徒沮梗於其中是以巨

猶遭誅終不能有所立方鋒鏑交於原野而以事機
之會有望於朝廷在人主之左右者小有不合於其
心則顰笑俯仰顧盼唯阿之間亦足以敗吾事固不
在於堅持力爭然後足以快其私也為閣下計凡今
拜臣有如張仲可為同心一德之助者顯言於上而
厚結其意必求有利於國家而無忌乎吾之成功然
後吾無內顧之憂而得以悉意於疆場之事今日之
慮孰急於此其次莫若宏德義殖忠信以折窮詐極
凶之虜世常患儒者之言迂緩而不切於事至觀羊
祜陸抗處傾側擾攘之勢而雍容拱揖乃有三代王

佐之餘風然後知先王所以得志於天下者必可行
於後世而無難古之君子處敵國相傾之間覆人之
軍不足以為武夷人之城不足以為強唯能秉天下
之大義以優柔浸漬乎斯民之心使其欲釋我而不
可夫誰與吾敵降及後世以苟為道凡可以譎敵而
得志者雖屠百萬之衆而獲須臾之安亦泰然安為
之秦以區區虎狼之強號為無敵於天下續息未定
而子孫為戮由此故也是以後之君子於羊陸之事
竊有取焉虜人自覆京師橫行中原飲馬於江海之
溼猶徜徉四方歉然有所不滿之意雖拓跋邪律之

暴不極於此矣善觀天下之勢者必因吾之所短以求出於敵人之所不能為今日計謂宜按羊陸之規務宏綏御之畧毋必屑屑於功首俘獲之間要使淪陷之民知吾所以從事於兵革者凡以欲拔吾於塗炭而非以為利使其咆哮吞噬之勢不得逞而索然以儼將不折而自亡是謂日計之不足歲計之有餘有不可忽也抑又聞之矯枉者必過於直君子之於道求中焉而已矣苟有意於矯是亦未免乎私也往者西帥之失正坐自詭大功之必成是以自今觀之不能無夸大之過今若懲既往之失過自貶損恐精彩銷伏而士氣不振君子之向慕於是人也唯恐其無成功是以不勝過計之憂閣下幸留聽或有取一二焉某頓首再拜



國家圖書館, NATIONAL CENTRAL LIBRARY, TAIWAN, R.O.C.



常齋集卷之十

序記 題跋

錄曾祖父作詩後序

唐人陶雅為歙州初克婺川天祐中吾祖以雅之命
主婺川輸賦搃卒三千人戍之邑屋賴以安因家焉
是為婺川吳郡朱氏之始祖邑有朱氏蓋初來於歙
之黃墩今歙民有朱氏秋祭或用魚鱉者皆族也家
婺源者貲產甚富有三子事南唐補承旨常侍之號
其後多有散居他郡者家父歛溪府君即其曾孫也

新安朱松喬



即欽溪府君諱甫字全美者曾祖之父也繼其居第二百年不徙今普濟寺前

府君有從兄陵貫少孤力學有時名咸平中以鄉薦

試南宮不利還家隱於卜肆不求聞達天聖中老死

無嗣府君為治後事今未知其墓欽溪府君少儻事繼

母甚謹嘗從兄學詩知其大要大中祥符甲寅歲宮

贊杜公為婺源使居吏籍二十年明於法律而鄉里

無怨言景祐甲戌辭吏事歸治生業雖煩劇中賦詩

自如也嘗自集其詩得三百餘篇諸族中往往有自

為一序効王元之為潘閔詩序體其詩立意教化而

不苟作識者以為自成一家享年七十有六三男二

女松行曾祖盧村府君其季子也惜其無以自發於世因序其後以

貽子孫有起家者為光揚之嘉祐五年庚午仲春既

望男從手序此蘆村府君所作序也丁酉政和八月十二日重錄

送程復亨序

廣平程某復亨謂予外兄從予遊於閩者二年予語

以安逸憂患知之詳矣將歸省其母及其祖母其可

以無言司徒文子問於子思曰親喪三年未葬則何

服子思曰三年而未葬則服不除也故告之一曰葬

吾舅而後加吉服夫子失魯司寇將之荆先之以子

夏申之以冉有曰喪不欲其速貧古之君子以失位

於諸侯曰喪喪不欲其速貧若是其急也故告之二
曰葺爾居以寧爾親蓬生麻中不扶自直植之榛莽
則與之靡然故告之三曰非爾父之類者勿親也江
出岷山自荆之楚汪洋千里而至于海者大川三百
小川三千以為之助也故告之四曰廣學問以資見
聞傳曰宴安鴆毒不可懷也君子非獨惡懷安之敗
名惡其敗姓也故告之五曰勿懷安禮曰男子生則
以桑弧蓬矢射天地四方示志也夫不貲之軀豈其
浮沈鄉里而名不稱故告之六曰無忘四方之志夫
齊之善味者淄澠之合能辨之淄澠之合均是水也

子歸矣他日執經而來問予能入於常流而不變其
味乎尚能為君辨之宣和辛丑八月某日常齋朱某
序

送日者蘇君序

小雅之詩天之生我我辰安在說者謂所值歲時月
日星辰六物之吉凶然則推步人生時之所值以占
其貴賤壽夭自周以來有之矣後世卜筮訾相地理
之學多著於世而六物之語時或見於簡冊自賈誼
王克皆有祿命之語詳其旨殆與說詩者之意合呂
才雖著論痛詆其誣可以揀一時湛溺之弊而天人

之精微才不及也然以其學焯然名世者蓋鮮至唐
殿中侍御史李虛中始以造詣精奧之思盡發其秘
其說見於韓退之之墓誌曰以人之始生年月日所
直日辰支干斟酌其人壽夭貴賤百不失一二今之
詳世邀利之徒皆祖述其書而未聞有窺其關節機
牙者蓋其為技兼五行星曆家之學既以日時推其
分至氣節之淺深以步日月五星之所次又以其五
行之生死王相清濁愛惡參稽錯徵銖稱寸較以處
其所賦之賢否厚薄是以其言汪洋虛無而不可執
持間有不合則曰是時豈植表下漏之所定乎此所

以視諸家之技尤難見其工也近世士大夫束書不
學而汲汲趣合於世唯恐不及故此技多售而其言
亦徃徃而合吾常悼其然而不能救太息而已福唐
蘇生以技來見因以所識十餘人之歲時評之蓋十
得八九吾意挾他術也而窮其說則皆有理與吾所
聞於古者不甚相遠也豈偶然邪不然韓退之所稱
何以過然吾方將營百畝之田躬耕於深山長谷之
中共為子職以求其志視一世富貴何啻浮雲之過
目而生廼謂我且進為於世吾既歎其有學而多中
念斯言之將不驗也故識以遺之生名黻病目視不

踰尺以故不能馳騁其技於四方云靖康丁未四月望日新安朱某序

富沙驛記

紹興十年今右朝請大夫郭侯璋兼守建安不為苛
皦之政郡以無事則曰建為州南控兩越北走江淞
士大夫取道于我者日至而無所於館則問舍於逆
旅昔晉平公為諸侯盟主銅鞮之宮數里而隸人之
垣以羸諸侯君子譏之今吾於居處遊觀不敢有增
而館舍無所其若四方之賓何如是營表故行牙廢
址子城西南而屬役於其屬葉顥趙伯暉以九月甲

子經始訖役於十一年三月丁巳土木之工以日計
者凡六千二百而民莫之知也庭戶嚴顯堂室靚深
昏明寒燠皆適人意又東南列四舍於門外食息之
所頗不問館人畢有無關則雖車馬奔湊而輟至者
皆免與市人役夫肩隨踵躡於囂塵塗潦之間附驛
之南列屋三十楹積其僦以僦木朽墜剝墉缺而甍
毀丹漆黝堊之憤閤圯落者以時繕之余方食崇道
之祿來客於建郭侯曰願有紀也三代之有司治其
廬舍委積以待賓客者備矣蓋秉禮立制而受之官
師細大具舉而豐省有度此所以為先王之法非後

世所能及也去古浸遠士之甘嗜進趣者羸拙之不
知而困弊所恃以稱賓客之為故又不及是則或視
事之荒堙廢墜于前者不肯一舉手媮得避嫌之便
以誘後人均之二者其處心之私一然則為今之吏
能舉事以便人非役志以干譽而求益也而民不以
為病則既難矣於先王之法又廢幾不失其遺意雖
欲不書其可乎新安朱某記

建安縣教書樓記

建炎初詔州縣官寺趣無之事他不急之役悉禁毋
得以勤民建安縣辭自火于戊申之盜仍寓於民居

湫隘單露於令所以賦政百里者甚不足以稱中又
更盜賊廢亂至煩王師群盜始次第伏誅是以凡五
六年猶不克以詔書從事而復於其舊紹興四年今
左朝請大夫長樂石君廉來為令汙萊浸闢閭里昭
蘇始營表縣治故址度材致用百役皆興未幾而堂
廡庫獄與凡令所以聽訟宴客者不侈於舊而皆備
獨門未及作而石君受代以去後三年今令左承事
郎括蒼葉君蔣至曰閉閣卑痺而風氣虧疏前令所
不暇非以吾諉也吾又趣過目前而曰待後之人竊
不共事不已甚乎且異時遵用建隆詔書即門為重

屋取凡制敕皮而蔽之其上今無所於蔽而寘之他所甚非有司尊嚴象魏謹守章程之意乃作新門而因建所謂敕書樓者十年正月某甲子始作訖於三月之某甲子以工數之蓋三千而羸嚴正高明父老來觀莫不豫然動色而相謂縣有大役乃無一吏持符詔謹吾里中者蓋令隱吾民脫命九死之餘日入於困窶而將無以生也恕思而勤撫之斯役也猶不吾及况於奉已厭私之為乎於是相率來請文以為記夫置吏以為民也吏遍於天下而柔良介特之民不獲其所者尚多則材者少也吏材矣私志未泯而

惻怛之誠不至則願指頰笑之間有能棄之以齟齬吾赤子者而况於官有大役乎君子之觀政也得其素孚於民者而於舉事焉驗之則庶幾矣然則茲樓之役其亦足以觀夫

尊勝院佛殿記

始予客政和往來建安必舍於城東所謂尊勝禪院者厦屋百楹清邃纓濁常灑然忘其漂泊之勞去之十年而再至則盜火之餘草出垣端庭穢屋庫而不可入其徒出沒於蓬藿荆棘之間皆慘慘無人色是時主者非其人土物之出入不可知恬瘖其衆而自

封也已而執事者案見其罪斥去而以今淨悟大師
祖源易之源數主聞寺輒棄去廬於南山之巔澹然
蓋將老焉歲在庚申予罷官行朝寓居建溪之上而
源來見曰吾將首為殿以居佛度費錢三百萬當勸
吾州之人有志於善者使之樂捐所餘以助我是役
也成君必為我記之予曰記易事耳建土瘠而人生
理薄文數經盜自朝廷常閔閔焉赤子視之非常賦
也不忍有所斂將安所取三百萬以佐子乎雖然子
必勉之子能勸子之人施錢以為殿而我不能施文
以為記乎源曰建人自變亂以來行伍田廬之姦媮

快一時福不盈皆族夷鬼飢不見蹤跡吾儕方在水
火鋒鏑之間不自意全今乃復得甘食美衣虞樂仁
聖之澤非宿植善本則何以至此皆將率德蹈義以
道迎善祥鄙爭吝嗇之俗視昔者則既瘳矣庶幾可
以廣吾師勸道群生之意而幸有所立此吾所自詭
而不刻也明年既成土木之工若干偉麗工巧不損
其舊蓋州之善士某人為之倡而佛菩薩像之費則
助教吳公與獨任之嗟乎人之可與為善雖蕩析困
苦萬折而不變此天賦之秉彝未有知其所由始者
也仁人君子不絕於當世其勢可以鼓舞一世而納

之於善宜不足為難然所謂移風易俗使天下回心而向道者或曠世而未之見此又何說歟予既樂道建人之易與為善因附之以所疑以風曉在位者又嘉源之不愆其志也為之記其年月豈獨以少壯所遊而不忍忘也哉

清軒記

余少時未更憂患視天下之物警然不以屑意而尤少所合建陽劉文伯獨繾綣從余遊唯恐後已而余以貧隨牒四方僕邀衆人之後厄窮卑辱無所不嘗亦聞文伯以鄉舉試禮部時時書來相勞苦意不少

衰余既稔於世故寓居建水之上蓋將老焉見文伯試於鄉有司場屋條對之文條愈精密無中年衰憊之氣既又無所合以歸書來曰比即居之東闢屋若干楹花藥在列藝竹以為陰榜曰清軒間於疾疢取書史誦於其間客至淪茗論文悠然不知日之夕也子為我記之余方汨當世之垢汙恨無饘粥之田可以歸耕庶幾跌蕩萬物之表文伯之歲事雖靳靳僅足顧方汲汲求決得失於匹夫之手而不能無介然於胷次此殆於余所謂厄窮卑辱者未之嘗尔文伯有田廬以為歸異時倦游而反方徜徉此軒誦壁間

之記曰有是哉可以油然而一笑也新安朱某記

跋山谷食時五觀

右魯直食時五觀語予受而行之猶有愧於藜藿而况於玉食乎今錄以示諸弟而贊之以三語曰知恥可以養德知分可以養福知節可以養氣孔子曰我欲仁斯仁至矣豈欺我哉宣和壬寅五月二十八日建州龍居院上方書

戒殺子文

政和七年秋予方寓學雲溪之上聞溪上王氏婦死一日夜而復蘇亟往問之具言所見云死之日方入

室有二吏候於戶間趣之行沙莽中不知日之早晚也忽至一城通衢列肆如大都市凡其祖先與其親戚之死者皆驚怪相問勞吏引至官府西廊吏舍舍中簿書盈屋一吏按簿問婦汝非歙州婺源縣俞氏女乎曰然具問其祖父名與鄉里皆非也舍中吏愕然相顧曰是郡縣姓氏之同者呵二吏復往須臾一婦身血淋漓四五嬰兒攀緣牽挽而至兒狀甚忿切吏審以州縣姓名祖諱皆是指語王氏婦曰此婦凡殺五子冥司以其子訴寃甚不待筭盡呼之吏誤呼汝歸語汝鄉里親戚慎毋殺嬰兒人間容以幸免此

不汝赦也二吏復送婦及河推墮水中乃蘇尋問於
所見追婦家死以其日矣余聞之曰冥漠之事不可
得而知也吾鄉之人多止育兩子過是不閩男女生
輒投水盆中殺之父母容有不忍者兄弟懼其分已
貲輒亦從旁取殺之冥追之悞果然乎則不可知不
然其亦託以竦寤斯人也耶嗟夫人倫之愛孰如父
母之於子者始生之嬰未及咿嚶而忍寘於死父母
兄弟幾何不相率而相殘先王之時未成人而死者
以殤禮葬之未成為人而無辜以死猶云可傷况夫
出腹而殺之無辜而可傷豈不甚哉自予來閩中聞

閩人不喜多子以殺為常未嘗不惻然也無故殺子
孫官有法甚明顧率於習俗之昏則雖有法而不能
勝夫法有所不能勝則亦何事於吾言然吾聞吳道
子畫鄴都之變都人不敢屠宰者累月夫人固不可
以法勝而可以理動者虐宰且可罷况其天性之愛
乎是未可以厚誣斯人而懸斷其必不可告也故取
王氏婦所見次第之雖然予文之不工豈能使人讀
之聳然如見道子之畫哉其亦區區之意有所不能
已也他日將有語其子孫者曰活汝者新安人朱喬
年也或由此也夫

帝齋集卷之十

五十二



國家圖書館, NATIONAL CENTRAL LIBRARY, TAIWAN, R.O.C.

帝齋集卷之十一

表 疏 啓

代謝獎諭表

仰申華祝實間謠頌之言方恐堯辭丞拜都俞之詔
俯從人欲曲荷天慈中謝切以為天下君既擁三靈
之祐使聖人壽實繫四海之心矧冒寄于承宣久叨
承于扈從敢期日月之照不遺臣子之誠伏遇皇帝
陛下克享天心永作民主接昌期于千歲已幸親逢
讀細札之十行更勤寵賁臣無任

新安朱松喬年



代賀冬表

化日初長方謹羲和之日潛陽來復灼知天地之心
恭惟皇帝陛下蓄德粹剛撫時嘉謚靈承天紀孚祐
含生茂對時行道迎叶氣肆鴻儀之亞歲敘諸福以
錫民臣久荷寵光誤叨眷寄佩竹符于江海遙効嵩
呼瞻黼坐于雲天亦同星拱

潛陽獨復至日舒長推神筴以驗時降年有永得天
正而紀曆卜世其昌恭惟皇帝陛下道邁古初仁均
普率于帝其訓方斂福以錫民與時皆行自履長而
納祐明庭星拱誕舉鴻儀列辟嵩呼茂膺殊祉臣久

膺郡寄阻奉朝紳宣化海隅幸同于率舞傳觴玉座
但想于登歌

代賀道君皇帝表

斷自宸心進陟元后神器有托成功不居雖天寶啓
其衷唯聖不失其正華 慶抃今古罕聞恭惟道君
陛下運撫昌期心凝至道躬後天之曆數以丕冒于
下民得率土之歡心方永成于景命遽傳元聖退適
希夷下陋周唐初非盛德之舉遠追堯舜不以大物
自私一德享天藩釐有繼重明在御垂祐無彊臣方
守郡符阻陪庭列褰裳高蹈神馳汾水之游向日微

誠願効華封之祝

代賀天申節表

謳歌歸啓本曆數之在躬壽考祝堯信天人之合契
祥開載夙慶浹含生中謝恭惟皇帝陛下德紹文謨
功承武烈穰穰大福既膺億萬之年翼翼小心自銷
九六之會行宅中而居正永躋壽以宜民臣方荷朝
恩外將使指逖瞻天仗方馳魏闕之心下酌民言願
獻周詩之祝

代進銀狀

膺圖霄極集鴻祐于三靈受計殊庭効多儀于萬國

前件物祥標瑞牒品列貢書瞻遡堯天虔效奉觴之
祝阻陪禹會心馳執玉之朝

柔祗出寶彰一人有慶之符方物克庭罄萬國多儀
之享稽貢書之列品亞上幣以稱珍川委嘉祥申祝
乾坤之壽天臨正宁莫陪玉帛之朝

代謝賜對衣金帶表

齊官出笥躬膺三服之珍漢詔錫金腰適萬釘之麗
寵光曲逮衰朽增榮伏念臣頃自布韋浸塵紳組凝
嚴列侍曾微華國之稱艱棘周旋茂効捐軀之志驟
從外服擢寘二鄉分符亟畀于江藩隸職愈親于宸

極重忝便蕃之錫曷酬衣被之私此蓋伏遇皇帝陛下圖回中興總攬黎獻不希身章之寵式昭闡寄之隆恩實重于解衣未知報稱悖雖深于垂帶曷副憂代進哲宗皇帝實錄表

若稽先王昭示來世追述功德蓋賴聖神之繼承蒐輯見聞具存文武之方冊垂光無極奕世所同恭惟哲宗皇帝臨朝尊嚴初政淵默內承太母已刑孝治之風外倚宗臣遂啓升平之運延登衆正賓服四屬邦誣力肆于紛更故國事遂歸于紹述追攷一時之異議皆非當日之本心仰惟皇帝陛下撫時多艱

躬德甚盛始初踐祚已明崇慶擁右之功推本承祧又述先朝孝友之志廼因閒燕時御遺編念疑信之異傳典型未泯察詆誣之無據邪正自分博延諸儒探纂前記臣方尸宰事夙被德音初乏整齊舊事之能仰倍褒廣烈之意至于芟夷猥釀補綴闕遺雖叨典領之榮名實藉編靡于多士龍興御曆欣正論之顯行麟趾卒篇懼前修之難繼

天寧節功德疏

九清垂祐爰開兆聖之辰一德承休永撫出寧之運人神胥賴夏交歡矧冒寄于承宣敢虔伸于頌祝

當渚虹之慶節尊蓋簡之真科仰祈不宰之尊必致
無彊之壽伏願皇帝陛下永作民主克享天心膺德
日新福祿川至推仁溥率躋壽域以康寧儲思穆清
配道樞而長久

月旅辰移節復臨于盈數天旋日轉民久跂于清塵
輒緣愛戴之誠虔致禱祈之懇仰惟大覺洞鑒微衷
伏願宗祐垂休龍天薦趾旄頭墮地坐知 運之窮
綠耳籥雲即見皇輿之復益宗睿算永燕宸思

跡環天下雖夙慕于真遊恩浹人心自難忘于善祝
驟及言名之日具輸僕后之誠仰冀覺慈必從衆欲

伏願上天眷顧諸佛護持平國成功歸饗九州之養
華封效祝永膺萬壽之期興運有開遺民胥賴

天申節功德疏

執衡司序實開申命之祥膺錄御圖自享後天之曆
敢資善祝仰叩覺慈少伸螻蟻之誠曷報乾坤之施
伏願皇帝陛下無彊介壽有截歸仁大輅天旋行執
望賢之轡靈旗星煥亟班琢庶之師丕冒神州同躋
壽域

謝福州祈雨疏

常暘為災南畝告病民瀕溝壑諒軫佛慈政戾陰陽

實由吏責僧伽大士法身常住願力無邊降升人天
運用悲智伏願洞昭精悃深憫疲羸並告山川之靈
大敷雷雨之師一蘇焦稿式副歸依

代清水白馬鱣溪廟疏

靈區峙勝大庇一方神物效祥普滋萬彙睽茲南畝
適告亢陽用竭蠲誠具嚴法供恭叩九淵之邃就分
一勺之清仰祈願依即告霑足訖成豐歲永賴神休

謝林郎中啓

學政師門方幸解顏之進刻章天陛忽披荐墨之光
盛德曷酬溢言難稱仰衡知獎但積愧懷伏念某衆

謂迂愚自知凡陋徒以弱歲知慕古人才不逮而志
強空仰聖門之高遠親方強而養闕苟脫名場之險
熾恐為小人而折腰盖規斗粟以糊口既素志之不
立媿先民其已竦碩流俗孰能知其心惟聖賢必有
處于此頃陪下邑之屬獲事大夫之賢羽翼未成將
仰勤于伏鷁鎔錡自獻敢效于躍金雖祿薄以不克
幸職卑而易稱奉承懈緩已遣遣訶送逆差池又叨
庇護俯憐衰拙何敢望于君子之門曲恃仁明有以
安其不肖之分茲為幸會更被荐論黼黻華章聳觀
衆目蒯菅陋質假重一言愧溢心涯恩超望表茲蓋

伏遇某官德業久大材猷偉明望臨一時學貫千載
久隆眷注方此踐揚念報恩之孰先急援能之為務
諮起自棄曾微根柢之先容特達深知蓋出權衡之
公舉惟致身之文學懼不克堪若飾吏之廉勤或能
自勉某敢不益進其學求稱所蒙苟不辱于門闈願
永煩于陶冶私門修謝愧免俗而未能直道方興知
復古之有漸過此以往未知所裁

賀中書胡舍人啓

伏審光奉制恩典司書命伏惟慶慰伏以元聖御歷
中興撫期方秉武節之嚴芟夷亂畧允資文德之助

叶濟艱難惟太微裁成于化元而內史贊襄于基命
道王德意咨訓誥之丁寧宣國威靈法雷雨之鼓動
素推鴻筆果簡清衷恭惟某官邦家典刑人物冠冕
謀三斷國素蘊蓄于經綸騰實蜚聲久周旋于駁厯
凜霜臺之風采靡聞背闕以誼諱竦玉斧之威靈孰
敢按兵而碩望亟自三長之選進班六押之崇入侍
凝嚴具輸忠讜奉英華于淳古救勦馘于斯文衆正
既興並增廊廟之重丕平可冀頓釋畎畝之憂豈徒
畢協于師言即見進陪于國論某久于宗慕特荷獎
憐試吏馳驅厭魚鹽之瑣碎受知感激覺肝膽之輪

困默自揣于衰蹤期永煩于元造未由趨拜徒切傾
瞻

賀福州張叅政啓

伏審肅奉制恩出臨侯屏奉丹書而造膝方渴于嘉
猷擁玉節以偃藩暫煩于舊德凡依庇幃居切惟忻
恭惟某官學富經綸望隆諧弼凝嚴列侍素高華國
之文艱棘周旋益勵匪躬之操方聖神之踐運躡俊
乂以奮庸席雋望以九遷人無異論奏膚公于兩社
帝所仰成惟長樂之名藩占全閩之奧壤笑談樽俎
從容雖異于平時襟帶山川鎮撫允資于重望惟國

勢之安危繫輔相而廟謀之本根在朝廷諒膺放卜
之求即有追封之召某尚貪升斗久辱沉塗識太白
于天津敢論疇昔見茂宏于江左幸託微生自憐冗
瑣之蹤阻拜熒煌之座邈瞻旌祭方聯少吏之下陳
仰累陶鎔願借大鈞之餘力歸依之悃敷述奚周

賀程待制知温州啓

伏審甫趨台節亟拜綸恩延對西清雖渴嘉猷之告
偃藩東道重違榮養之求諒惟物望之僉諧豈獨私
悰之欣屬恭惟某官材高國棟望重耆英踐履純明
凜奉身之一節風猷強濟厯盡瘁之百為越從寄注

之嚴出總委輸之寄被恩言于三錫素簡清衷席峻
望以九遷待周華貫馬便親輿之養就合帥閫之符
俘狂寇之鱣鯢出遺民于塗炭果膺號召益見推明
降陟殊庭副仄席輟食之歎藩宣外服有擊鮮戲綵
之歡度少愒于名邦即進櫻于密務某門闌下列鄉
鄙晚生鑿枘不謀了無心于經世斗升自役方苟祿
以逮親誤蒙收錄之恩因有攀緣之意陰虬自躍儻
密會于風雲朽木難雕或蒸成于芝菌永言欣懌莫
罄敷宣

謝謝叅政啓

温言曲薦逮筦庫之下陳窳質何堪被鈞陶之餘力
靖惟淺陋曷稱褒揚伏念某早守孤經亟鑿未任一
行作吏久困于抱關三釜逮親愈勞于負米晡晚坐
嗟于急景低徊益愧于初心友黨機訶何異土牛之
留戀天涯流客真成木偶之漂浮念方力學于古人
深耻自同于流俗蹈立身之矩矱非以于師問行道
之權輿付之造物勉從吏役算來商緡義命所存敢
懷不屑之意會計雖當實有易汙之憂仰藉庇存稍
寬督過冀少稽于歲月求歸即于田園絕希峻乂之
游自審竒屯之分何期誤舉驟激濡衷而况抱繫石

渠羽儀上國橫經文席領袖諸儒永惟盛德之所加
終懼溢言之難副此蓋伏遇某官斯民先覺吾道主
盟綜九學之淵源作三朝之心膺入陪國論濟川瀆
而得舟航出布藩條醞江河而灌尋尺搜揚群彥翊
贊中興俯睠衰遲特垂獎引某敢不追尋舊學勉企
前修登李膺之門既塵品日游薛公之閣妄意攀緣
儻坯冶之無遺或桑榆之可冀此以往未知所裁

賀謝叅政除萬壽侍讀啓

伏審介圭入覲前席延登西學貪賢方渴謀猷之告
殊庭庀職聿新體貌之隆明命誕敷輿情胥慶伏以

事師古而有獲傳說稽首以復王義勝欲而必昌太
公奉書而端冕惟君正而國定蓋源澈則流清仰陪
資訪之勤允屬典刑之克緝熙聖學纂前哲之永圖
眷倚宗臣修本朝之故事恭惟某官學臻聖奧望冠
耆英經國高文遠追大訓亮天賢業簡在淵衷道德
被于布韋旣廣成均之化精忠貫于金石又高社稷
之功亟協師虞進聞大政謀王斷國士多誦于格言
尊主庇民世已蒙于高澤方雷陽之備重遽請外以
均勞詔甫趨于暑行恩復延于晝接西清入侍聳觀
列辟之儀刑東閣荐開行正台階之符采某久于宗

慕特荷眷知聞道師門常預解顏之進飛章天陛誤
沾荐墨之餘竊自附于下風期永依于元造閱卑棲
于筦庫已藉褒揚跋滯迹于泥塗尚繫簡記依歸之
素敷述奚周

上綦翰林啓

卑棲冗屑絕跂崇高久掃跡于英纏粗安愚守竊馳
心于德宇貪附下風雖稽履舄之瞻尤結藩牆之想
恭惟論思密勿陪侍穆清躬令德以考祥固靈襟而
擁福伏惟某官當世師表斯文典型忠精自結于主
知風采縱聞于輿誦豫挾衰之大義奮經世之遠猷

陞四禁之華典冊造于大訓陟貳卿之峻德名冠于
中臺力祈勞逸之均暫佩藩宣之寄蕭生補外甫慰
遠民陸贄居中久懸睿想亟膺號召入副詳延忘前
席之勤日親帷被解衣之寵望絕臣鄰惟文章闕
世道之盛衰而詔令宣朝廷之德意反醇釀于慶曆
益知皇運之隆體深切于正元彌識人心之固側聽
吉星之獻遂符獨對之言式厭具瞻豈惟孤願伏念
某陟道殊淺賦材踈卑強顏升斗之營悵流光其將
晚冥心尺寸之進信適俗而已踈碩方縻冗役之勞
何敢援同年之契寅緣過聽簡記衰蹤仰惟鑒裁明

教之宗方以長育人材為樂曾未遑于擁篲輒妄意
于攀鱗拳曲無庸將前求于隳括悍堅不棄異仰累
于坯鎔永惟宗慕之深尤劇歸依之素願言玆畱前
對寵光

謝館職啓

拜嘉明命叨給札于禁林試可中宸驟策名于藏室
脫冥煩之冗役廁清切之英游祇可平收良深震愧
竊以上聖御曆中興撫期方秉武節之嚴芟夷僭亂
允資文德之助叶濟艱難纂逸典以宣猷闢英躔而
儲止庶幾封殖以俟選掄惟先王大訓之所藏靡厯

世彌文之咸在圖書襞積黃墨紛綸本原四目之神
靈聿稽于詁訓儲正六書之變草精覈于聲形異因
點勘之勤益廣見聞之富向非多識天祿之奇字深
探酉陽之秘文搜薤葉于名山釘金根于徃牒則何
以刊收四庫綜產九流如某者名實不揚人門俱下
抱孤經而干澤堅脫名場遵三尺以在公亟靡吏役
皇皇從食冉冉趨塵僅成旋勅以不堪雖復傭耕而
何憾值潢池之方熾伏鑰里以深藏被檄行臺算商
瀨海為親而喜忘冗瑣之卑棲援上何階固崇高之
絕跂已分甘于遠屏誤垂簡于旁招貝齒長飢空羨

公車之力塵蹤易隔阻趨宣室之庭姑自信于竒屯
方日湏于嚴遣將改轅于下澤遂掃軌于修門俄被
恩言俾承薄技追煖姝之舊學取笑大方緝翫敲之
蕪辭深漸少作寧酬發策甫就著篇大手旁觀駭群
公之堵立皇明俯燭備清燕之衡程仰惟聖學之高
明內省寡聞而隕越敢期睿獎加錫俞音追飛群玉
之峯獲肩于衆彥討譯曲奎于畫博攷于前言望不
素然恩誠有自此蓋伏遇某官材高經濟望重弼諧
推志公之心整領人物收群策之助圖回事功施及
妄庸濫塵棟拔咸池在御不遺曹鄴之詩華袞所褒

遂畧春秋之責某敢不益堅難進之節盡讀先見之
書潛心聖門尚友先哲辨魯魚之謬何足報于生成
澤霧豹之文尚少勤于長育過此以往未知所裁

代魏侍御謝提刑啓

承流千里方窈于誤恩託庇二天更塵于華荐辱言
已重引分非宜伏念某受材迂踈遭世休顯玷華塗
之下列昔何補于涓埃得支郡之左符今已愆于膺
力民有豐登之樂心無撫字之勞苟幸庇存敢蘄褒
荐溫言曲被實踰黼黻之華陋質何堪但增營蒯之
重此蓋伏遇某官立中道以待物慕上臣以事君方

營路之峻躋眷衰蹤而俯錄碩竭其智力雖無以儒
飾吏之材然老于詩書粗有學道愛人之志稍寬訶
詰加惠初終儻無愧于成言其敢忘于厚德過此以
徃未知所裁

代陳參政回李丞相謝轉官啓

伏審上流作屏方賴于折衝當宁念功亟聞于遷秩
牢辭屢却成命莫回未遑慶牘之修先拜溫言之寵
恭惟某官德業久大謀謨忠嘉方初政之清明首陪
興運既遠民之安集允藉壯猷已紓西顧之憂彌重
仰成之體餘威所憺式訛姦宄之心序爵更崇益注

聖神之意而乃久持謙柄愈厲高風豈惟務式于一
時固已紹隆于前哲某方嬰重責竊企下風股肱惟
人大懼天工之曠京師蒙福尚沾河潤之餘感佩之
悰敷宣罔況

謝宮觀啓

食而聽事久勤覆露之私嘖有煩言重荷陶鎔之賜
得郡自試蒙恩不貲乃猶瀝懇而有言亟獲奉詞而
自屏捫心知幸銜施不忘伏念某卷曲之材分甘捐
棄亨嘉之會理絕覬覦志氣凋零但恬然于義命神
明憤耗既蕭颯于顛毛偶給札于玉堂遽飛纓于蓬

渚叨塵卽選託備史官自抵譴訶卒煩調護矜其趨
走之舊假以息偃之安甯游統之多方蒙裂地禳其
支離之臂獨勉受功然方當宁焦思而憂勞衆賢致
身于馳騫積縻廩稍苟逭馳驅旣永負于食功復何
殊于罔利恧縮畏事覺精銳之坐銷懷安敗名碩豢
養而自歎素飡之刺流汗以慙此蓋伏遇某官功高
宗臣德婉元哲謀合天意方宣厭難之威身為國基
實佩扶衰之寄整領人物計圖事功將濟四海于丕
平猶軫一夫之不獲有如庸器亦託下風將絕企于
修門未知報稱尚激昂于末路不至惰媮

問候張丞相啓

去違門墻積有歲月託身埏埴分苦窳之無庸遠跡
泥塗固高明之絕跂欲布瞻依之懇懼干恩瀆之誅
方竊伏于海濱敢徹聲于從史恭惟整辭論道均逸
撫封翕受玉和具膺多祉伏以某官道契天則身為
國基當軸處中則多士豫附而功日起假鉞居外則
大敵震動而人不憂方廟算之少勞尚天誅之未決
卽承晝接無憚暑行下副具瞻仰寬焦思某久深宗
慕昔荷甄收誤蒙方底之書俾趨交戟之陞甫正中
都之秩荐陪葢室之游而憤眊寡聞樸愚自信思金

躍之戒每佞而厚顏亡類出之奇但摧藏而卒歲
莫知報効自抵譴訶職是負薪之憂猶曠沒階之禮
曆日其吉趨風匪遙班作礪之篇行見進揚于休命
賦衰裳之什尚無使至于他人

謝人書啓

海市征商偶繼西溪之躅士車稅鞅幸瞻東魯之風
更辱高文以為先贄褒同華袞既假寵于衰蹤報乏
南金徒深銘于厚德

謝人詩啓

久厭斗升欲乘桴而浮海幸瞻冠履殆忘肉以聞韶

更塵黼黻之文坐增管蒯之重念雜佩相酬之未暇
徒有報章雖賦詩見屬之過宜敢忘拜賜

定婚啓 為甥丘肖

竊伏閭閻久心傾于德義幸同土壤敢自附于婚媾
伏承某人婉媿多儀柔嘉有則某兄孫某藐是弱質
拙知義方惟節春秋莫忤相其饋祀肆求伉儷使撫
有其室家茲拜成言賜之內主既襲祥于吉卜用委
幣于高閣軒冕照人雖大族非吾偶也蘋藻有奉抑
先君寔寵嘉之

韋齋集卷之十一

國家圖書館, NATIONAL CENTRAL LIBRARY, TAIWAN, R.O.C



常齋集卷之十二

行狀

墓誌銘

祭文

先君行狀

公諱森字良材姓朱氏世家歙州之黃墩七世祖天
 祐中以陶雅之命總率三千戍婺源邑屋賴以安因
 家焉曾祖甫祖振父恂皆不仕公少務學科舉既廢
 不復事進取既冠而孤他日歲時子姓為壽舉先訓
 戒飭諸子諄諄以忠孝和友為本且曰吾家業儒積
 德五世後當有顯者當勉勵謹飭以無墜先世之業

新安朱

松齋

行狀



已而嗚咽流涕以奉養日短為終身之憂胷中沖澹
視世之榮利泊然若不足以干其心者家人生產未
嘗掛齒子松遊鄉校時時少得失無所欣戚家既素
單久而益急或勸事生業曰外物浮雲爾無庸有為
也使子賢雖不榮於我足不然適重為後日驕縱之
資爾獨見松從賢師友遊則喜見言色其篤於道義
而鄙外浮榮蓋天資云晚讀內典深解義諦時時為
歌詩恍然有超世之志與人交無賢否皆得其懽心
然胷中白黑了然人莫能名其為通與介也以年月
日卒於建州政和之官舍享年若干娶程氏三男松

楊遵道墓誌銘

舉進士迪功郎初尉政和也次擢次樺二女未適人
將以某年月日寓葬于政和護國院之側謹狀

公姓楊氏諱迪字遵道南劍州將樂人今徽猷閣待
制提點西京嵩山崇福宮某之長子也曾祖某不仕
祖某累贈朝議大夫公為髫髻已能力學指物卽賦
樂然如成人既冠益貫穿古今孝友和易中外無間
言平居無喜愠色至急人乏困而樂其為善則矯然
敢為必極其意而後已與人辨論綱振條析發微詣
極冰解的破聞者歛聳退而察其私言若不能出諸

口故無賢不肖愛敬之蓋度不身踐不苟言也里有
貨訟不決者連年公一言而兩家為之平其誠信於
人如此崇寧三年侍徽猷官荆南歸展先塋八月甲
子次于邵武之傳舍以疾卒年若干初熙寧中河南
二程先生紹絕學於孟氏不傳之餘四方學者顧俗
學而自悼遊其門者惟恐後獨徽猷與二三公號入
室公方遊大學聲出等夷一旦棄不顧抱經遊于伊
川之門以邈然少年周旋群公之間同門之士咸歛
手以推先伊川少然可雅器許公公於易春秋尤為
精詣嘗曰人之不可無學猶飢渴之於飲食苟不知

其方則常患乎異端之溺人人孰不知此而卒蹈之
者習俗昏之也又嘗謂世論莊周怪誕喜訛聖人此
正自淺陋何足以議周也大要周於聖人之道畧見
圭角遽欲廣已造大而不能自持至分遊方之內外
以為二豈知夫聖人精義入神者乃所以致用利用
安身者乃所以崇德乎凡著其所得及商畧古今為
文數百篇今有十一二藏于家二程先生既没天下
師尊其道者推楊氏謂徽猷公龜山先生不敢名而
公負超詣絕人之資克世其學雖世之望公也則亦
然乃不幸而蚤世豈非命也耶公没孤尚幼後若干

年始克葬公于某州某縣某鄉某山之原娶葉氏朝
議大夫致仕祖武之女配公無遺德以喪母致疾先
公三年卒子男三人雲舉進士二早夭雲與予相好
學業志操能世其家者以舅氏撫州司馬曹事僖年
之狀來請銘予不及識公自來閩中多從龜山門下
士游間論近世學者至公皆曰吾不及也謹為之銘
銘曰斯文盛衰天實命之有嗜其徑異端乘之道堙
不治以與聖違有志於得俗學惜之以見自私乖戾
莫施孰為毅然莫乘莫惜天蓋祐之使與斯文屹屹
龜山淵源伊洛如星之斗以表後學公為之子妙質

夙成自濡心淳食息訓經不躡不陵師訓是程軌道
以趨不畔墨繩行滿鄉黨世孰知之遺文蔚然不可
瑕疵胡不百年以究其業齋志莫陳方壯而折天其
或者尚相公于我銘幽竈以告來世

承務郎致仕卓公墓誌銘

去建陽而南十里泉竹深靜岸豁而廬者有宋隱君
子承務郎致仕卓公之所築也公既孤置家事不問
奉母夫人居焉養葬盡禮不跡城邑者三十年某視
公季子特立為同年兄幸獲升堂拜公退而語世之
士大夫以謂古之常德君子俯仰不作者如公蓋望

之山陰丞飭書別之已乃坐逝蓋公所建立非易以
死生動而況於義利之際然猶不及於疑且謗真為
善之難哉生平忠信勤約務要以身先子孫故諸子
暨孫皆兢兢佩先訓端飭自立而其季遂以學行卓
然為聞人其奉身信道有無愧古人者非特見公訓
子之方厚施而必報深蓄而徐發其在茲耶公享年
若干重和改元霈然以年及格而子籍吏部得今官
初娶張氏男五人其四曰某某某女二人長適王亮
次適王舜孫皆舉進士孫男女合十人公猶子宣教
郎知南康縣雄實狀公行某視公丈人行也顧文字

之不能工何以震耀潛德而燕賢子之心謹誌而銘
之曰以媮自愚世顧曰智我求有常久不克值有隱
卓公抱一陸沉德義為佩而闕其音居然環堵鄉鄰
是劾不貴以驕曰公師保夜旦死生泊無戚欣相彼
儻來何直浮雲匪躬之羸肆惠于後以學發身公實
有子洞源之樊公樞所宅有來承休質此幽刻

謁廟文

涖官云始蠲日告虔祗板靈祠恭陳薄薦仰祈聰直
昭鑒潔誠冀我寵綬沆無災害

代福州禱雨諸祠文

其表而知之宣和五年夏六月過門則公以四月乙未捐館舍矣入哭公柩而退慰其孤且稱遺命將以九月十日窆厝于洞源之塋屬予銘之予視諸孤蕭然不勝哀不忍以荒拙辭謹按卓氏本福唐今為建州建陽人者自公七世祖徙也曾祖某祖某考某皆不仕公諱某自元舉少力學無不通已而語人曰吾家子其可以腰纏不共為親憂去治俯仰之養友誨二弟經紀其孤無可憾皇考厲疾有異僧過門察公憂甚授丹篆符誥朝告僧所在自是尊信內典晚益精詣訓釋其書發明為多既丁皇考憂不御葷酒終

制燕居寢食有常蕭然一室晏如也心平氣和未嘗面短人然無賢不肖尊畏之鄉黨至無訟云季子學問浸有聞時時小得失若弗聞者至試不利禮部始手書古人詩開勉之平生折券不勝計繼室魏氏之亡公方主家事寔不能斂猶有誣其自私者未幾誣者嘔血疾首陪死于庭識者異之嘗有巨商告公有家難將亟歸從者偶語有見圖意以精金一篋寄公去不索劑約踰年復來出篋示之封識宛然先是營壽藏一日遣人芟闢其道頃之得疾謝醫祝書四句偈示諸子超然非世間語也時季子以迪功郎為越

之山陰丞飭書別之已乃坐逝蓋公所建立非易以死生動而況於義利之際然猶不及於疑且謗真為善之難哉生平忠信勤約務要以身先子孫故諸子暨孫皆兢兢佩先訓端飭自立而其季遂以學行卓然為聞人其奉身信道有無愧古人者非特見公訓子之方厚施而必報深蓄而徐發其在茲耶公享年若干重和改元霈然以年及格而子籍吏部得今官初娶張氏男五人其四曰某某某女二人長適王亮次適王舜孫皆舉進士孫男女合十人公猶子宣教郎知南康縣雄實狀公行某視公丈人行也顧文字

之不能工何以震耀潛德而燕賢子之心謹誌而銘之曰以媮自愚世顧曰智我求有常久不克值有隱卓公抱一陸沉德義為佩而閔其音居然環堵鄉鄰是効不貴以驕曰公師保夜旦死生泊無戚欣相彼儻來何直浮雲匪躬之羸肆惠于後以學發身公實有子洞源之樊公柩所宅有來承休質此幽刻

謁廟文

涖官云始蠲日告虔祗板靈祠恭陳薄薦仰蘄聰直昭鑒潔誠冀我寵綏汔無災害

代福州禱雨諸祠文

七閩之農鑿山隄海以為田雨暘之節小失其常則有旱沴之憂今茲春夏以來陽亢而雨愷高者源泉涸枯而不可耕下者又為海鹵之所浸蝕溝壑在前民今其慄慄敢佈腹心于我明神惟神秩于明庭廟食茲土斯民歲時奔走饋祀世世而無敢怠者凡以神能佐佑陰陽易凶為豐以免於饑饉流殍之故也惟神奮張威靈誕布甘澤以答斯民之望吏亦預受其賜

又

春秋書不雨傳曰書不雨閔雨也嗟乎為今之吏雖

未能無愧於民以干陰陽之沴而豈敢忘閔雨之意哉屬者雨濇暘驕種不入土三農告病懼不免於溝壑是用齋祓精虔引咎瀝懇控告於我有神惟神孚佑一方克享饋祀尚哀斯民搏手之急密會山川之靈誕敷雷雨之澤庶幾今秋猶得中熟民既得以餘力奉公上之征賦長民之吏受職之神皆無愧於斯人者歲時潔醴豐牲以承事神世世其有斁乎

代謁先聖祝文

某聞先王所以治天下國家之道無不在於學而生民以來未有如夫子者某肅將使指愬計閔部服官

之初齋被進見於學悉延諸生與之瞻望跪起于素王之庭豈獨昭示斯民興其蒙被道德之澤之意抑今干戈甫息公私困竭蓋將詢事選言求庶幾於君民兩足之訓仰正墻仞其敢不虔

代謁諸廟文

惟神受職明庭實司民命孚祐此土以無災害茲摠委輸奉將使指涖司云始敢薦微誠

告贈官文

某罪逆不天未及伸區區烏烏之養而奄罹酷罰大息未報永懷身之憂一念及此心肺摧裂恭承餘訓

備官于朝乃紹興七年歲在丁巳天子有事于明堂祇見天地以祖宗配發號赦天下追榮百執事有列位于外朝之親而某方備數館閣於是贈先考承事郎先妣太孺人今既三年矣方繫官于茲若朝夕未以曠敗卽罪而得去朝廷當躬持封冢詔書及命服以告于壟下南望楸梓長號雨泣謹因禋之政和以告

焚黃文

紹興七年天子有事于明堂天地報况祉福盈衍遂推恩大夫士之有列位于朝者而及其親非獨廣孝

治之風亦所以慰人子欲報罔極之意某於是時雖
未有朝位而備數館閣有司案故事以考妣承事郎
孺人之命告于第某不肖不足以荷先訓蒙被封冢
之寵而久官行朝又不即奔告以無失時迺淹留至
于今慙懼感咽不知所言恭惟 神靈不昧尚膺
天子丕顯休命

祭丘君文

猗嗟丘公市隱之倫紛攫金而爭先炯懷璧以自珍
超獨懷於德義外不亂其光塵樂怡怡兮自適坦蕩
蕩兮無垠躋承家之子弟服義方以資身吾來閩歲

八周悵識公其何因惟先君之婢女婦予舍而通姻
方言還而在道篚覲幣而未陳忽奉訃以來告奄捐
俗而返真嗟乎天之不淑胡獨折此善人念此徃哭
其何及為喪七而廢飧傾聞公之晚歲頗玩志於竺
文了一世之泡幻盱生死如夕曩曾其躬之不羸天
以燕其後昆方世胄之有奕矧先德之未泯嗟惟公
復何憾悼生者之號寃馳斯文以侑奠庶冥漠之或
聞

代鄭德與祭龜山先生文

道喪千載聖遠言堙矧曰國家莫善其身三川之郊

篤生至人公甫筮仕樞衣其門聖有遺訓俗學所靈
手摩層雲日星昭回六十餘年學者有師斯文所寄
天亦者之靖康初元天子側席擢從史氏來長諫列
國勢危安廷議中式有懷必獻曰此子責帝王在淮
海始初清明日御詩書渴見老成白髮蒼顏歸侍通
英如周武王丹書是承得謝言旋田里燕息有言有
行四海是式謂當期願難老永錫執餽乞言福我王
國云何一卧遽告易簣邦人涕洟朝野大息嗟哉冥
頑多難所嬰避影趨風久愧未能越自世父執經師
履德義之契施及晚生惟先君子謀謨密勿天畀之

年勲著王室公昇銘章黼黻金石幽寤是箴以詔無
極盛德之賜曷酬萬一祖祭有期來從執紼帝懷元
老天不憖遺奠觴一哀宣獨吾私

祭鄭龍巖文

我尉尤溪必未聞道不安厥官跌宕物表維賢宰君
不我瑕疵美疾潛去砭之藥之比稍有聞追悔何及
見容則多賢哉師德九仙之別俯仰六年公官龍巖
手書見存知我倦游日困羈窶督以赴銓舊家來寓
來官公鄉日訪代期阻關十舍跂予望之重九之書
粲然累紙旣再涉旬與訃俱至嗚呼哀哉公與人交

通介之間外同光塵涇渭了然達於民政心為衡石
清畏人知不求赫赫勝日婆娑萬事一尊考評書詩
有流有源展笑吉人宜壽宜貴豈期微痾一卧遂蛻
位高疾顛基薄崇墉播惡遺臭形渥而凶公齋令名
全歸墉下位雖不克不克無憾纒纒諸孤甫以喪歸
身有吏責往弔不時德義之隆追懷永慨孰知予悲
寄此一酌

書齋集卷之十二終

玉瀾集

次韻梅花

新安朱棣逢年撰

陰陰雪意雲垂地曳策微行傍清泚眼明橫路出江
梅烟曠沙寒迷表裏當年一夢山月明依約瑤臺見
仙子俗緣掣肘意未了弄出飛瓊亂紛委摩娑銅狄
豈須話滄海揚塵固其理花神縱步來閨苑羞怕唐
昌偷玉蓋回風自作粧半面泣露真成愁齟齬相看
一笑豈易得分與天香更清美那知脫屣塵寰去頃
刻蓬萊三萬里黃昏誰伴醉鄉歸天色無情淡如洗

次韻寄求道人

天工憤憤春無力桃李顰心少顏色夢中矯首望三
山我是東南未歸客岩壑交游人姓支相思江月半
成規遙知草木代說法豈是畫餅隨兒嬉此身分不
過朝市何日相從拂衣袂豈容陶令載白蓮會作鄭
虔書落柿

二詩寄德粲并簡內觀諸友

春風本自掣肘去那更病留過一旬滿眼山川雖不
改連天桃李已成塵銀河誰與洗兵馬寶唾安能泣
鬼神悵望故人分雪此飛雲落日在綸中

九淵亭上二三子見說年來事事新隔水不容招手
喚曲窓已有畫眉人醑醑香好急携酒鷓鴣聲繁催
送春笑我江南未歸客飄然天地一閑身

寄人

一牛鳴地兩禪林霧雨初晴翠靄深熟路綠溪穿窈
窕踈鐘喚客出崑嶽未求黃卷成功處且辦青山避
世心悵望不來還獨返秋風聊作暮雲吟

十月上休日示求道人

老禪獨卧千岩表枯木寒雲伴此身只倚藜根作詩
本肯分秋色與騷人心源落落故難合筆勢翩翩想

絕倫記取濠梁斷金語三山好處要傳真

因蹈元看竹了軒因用去年方字韻作此

淇澳渭川那復夢而今天遣出南方要觀大節須霜
雪莫說此君無肺腸照水形容殊不惡臨風言語一
何長山僧豈識留連意千里故人逢異鄉

和德粹三絕

平生樂事在三餘不管梧陰過玉除絕尾忽參斐
句風塵今日正愁予
心賞南樓一味涼波光山影上藜牀莫言体國非吾
事好夢不能千里長

未坐他年百尺樓浮雲身上且悠悠眼高四海騎鯨
客不見長安亦解愁

三山次潘靜之并書記韻

客路那知歲月長掀眉一笑必芻房且傾徐邈聖賢
酒不問陳登上下林雲影翻空迷海嶠秋聲隨夢到
江鄉明朝各聽船窓雨猶憶枯碁戰四郎

邈書寄出與李知哲唱和詩次韻

邂逅招提頓客輶十年塵土且休休三人月下從渠
瘦二老風流到我不南北只今無好語山川如許更
悲秋故應贖作鏘金句莫羨群兒萬戶侯

老兵種菊以詩謝之

疏畦雨徑策勳時徒種隣墻菊兩枝九日無人過未
放十分舉酒酌王尼花栽梨玉秋風健香近龍涎曉
夢知負口不應還負眼長鑱煩尔鎮相隨

鄭德予同遊桃花山次韻

江村卜築路斜斜模寫癯仙四壁家聞道讀書忘肉
味不緣避世宿桃花青山自作千年調白眼空鷲一
望餘欲買雞豚投近社烟蓑雨笠寄生涯

春紅萬樹抱山斜落落真源自一家雲起坐中疑有
雨酒行杯面恐飛花塵緣未斷心雖勝他日重來約
尚賒畧情淵明記遺事武陵今不在天涯

九日與客語慨然有廬山之興

九日黃花笑白頭分將半落付林丘半川暝色聊償
夢別領秋聲旋寄愁江國經年成浪語匡廬入手是
真休未能免俗須登陟耽視元龍百尺樓

草堂諸陳同遊崧山精舍晁仲携琴先歸用
壁間韻

來伴秋風十日閑筆端久已識波瀾煩君一醉雙風
月乞與兎曹白眼看

破塵妙語慰畸人鶴緣深衣雨笠巾獨自抱琴山下

去石橋月色為誰新

三山次鄭德子韻

日脚微明雨脚踈誰將雲夢賦相如西南山好君知
不一見全勝讀異書

何日歸舟片葉輕白鷗相伴鱸微鳴只應潮打蓬窓
處已作離騷一半清

次韻梅花兩絕句

一月尤溪烟雨濃玉梅渾作玉人逢江南他日摘香
處莫忘雲間雙髻峯

清淺彎環遶故墻一身將影理殘妝西施俗處無人

見冷落吳宮溪水香

徐彥猷以仇池詩句為韻作詩十四章見示
答之

徐侯筆下波濤寬新詩示我清且閑誰能辛苦學飯
顆格轍已到元和間春寒十日不出戶坐想江柳分
烟鬢東坡老仙有奇句析韻琢句光爛斑疾雷一洗
牛蟻鬧羯鼓畧驚桃李頑周郎知音亦已久仲車着
語誰當刪大柘六鈞古稱重汝自力弱無由彎胡為
坎坎事唾點今古可笑兒童孱鄉關春物入意匠水
光花氣相回環莫嫌衆口亂如沸當見三耳生其顏

嗟吾和詩雖已晚識君妙意存高山告君詩妙須飲
酒社甕一醉寧當慳彦猷戒酒常云人言吾詩好即飲酒

寓居南軒

雲氣披猖月意孤冬青倒影上庭隅燈橫老薺蛾方
去書掩新芸蠹已無一世盡知關魯酒十年不擬歎
齊竽支頤坐覺踈星沒獨扣龍頭瀉酪奴

答戲昭文梅花

臘到方留此日寒雨多未覺過雲殘共驚臺柳惹惹
去獨抱園花細細看洗面不勞千點雪薰衣剩破一
分檀詩人窮苦誰料理只倚東風酒量寬

乙丑臘月十七日立春

自數今年臘天饒半月春酒船欺白首桃壓笑青唇
避地踈同隊一作黨逢人試問津傷心穿豺虎未肯盡
奔秦南山收宿雨鱗甲一番新

延平道中

一溪春漲午晴初日透波光綠浸裾却憶孤山山下
路石橋清澈看叉魚
雲間三十六峯高北望思歸夢亦勞來客雙峯莫相
笑少低吾眼為兕曹

舟次龜湖阻水因由董山

山雨踈踈心又驚起瞻天色斗微明他年一枕江關
夢知憶蓬窻此夜聲

一川黃濁寫崐崙苦恨南溪不盡吞三老亦知行意
速時時挿竹記沙痕

拂拂朝霞到客舟苦疑雨意在鳴鳩好峯天半元相
識且作僧牀挾策遊

夢好山晴曉不知船邊今日見鬚眉向來快寫崐崙
地元有薰風綠盡時

向年舟自三山上延平和人韻兩絕

春江一月困楊柳醉夢無人與喚醒欲識故交金石

處相逢詩裏眼猶青

春風一夢收桃李變燕不知愁絕時卧向蓬窻飽聽
雨無人識此是新詩

元英折惠袖花

白玉繁花五葉芳春風吹盡洞庭霜河西道眼分明
處識破此中知見香

乙丑除夜寓永興寄五二姪一首

殘臘避新正疾馳不可輕梅花相行色更以風雨送
傷哉綠林豪支派出章貢荐食今幾年金帛既克棟
王旅走山澤魄散失飢凍空聞米粟廉不救干戈痛

冥冥紙錢底千室羅蓋甕祀先不暇嘗一夜驚入夢
書生口擊賊自愧脫嘲弄經營華陽馬想像丹穴鳳
融融聲教中焉得餘此衆由基執弧矢鼯鼠何足中
浮烟起南舍春事行倥傯桃寒強破葢烏靜獨成吟
詩情寫物色心匠與折衷童草簡阿戎溪頭試微諷
僕自以四月十四日自延平歸所寓芝南軒
積雨陰濕體中不佳二十五日夜夢至一處
流水被道色清絕若有欄檻而無屋宇有筆
硯皆浸水中予驚問何地旁有應者曰此玉
瀾堂也夢中欲取水中筆硯作詩詩未成而

覺意緒蕭爽殆不類人世雞已一再鳴矣因

賦此

濛濛飛夢過雲鄉物色清輝眼界長閭闔未招金馬
士蓬萊先立玉瀾堂千尋濯足衣裘冷六字哦詩筆
硯香當與瑤池作同社紅巾青鳥兩相忘

贈周功崇

閩嶺浮沈二十年歸心日夜夢江天謾題甲乙煩君
看若說功名只自憐造物小兒知薄相箇中老子已
忘筌一筇聞作東南去豈欲求人左海邊

悼鄭彥繼書墓亭

蒼梧翠栢泣西風尺冢巍然宿草中寶劍何心求季
子隻雞今日過橋公麟經有味人誰識鶴陣論功氣
自雄欲拂蒼厓寫竒節陳琳檄手語言工

竹醉日懷故山

一室真容膝彌一作不何人客子猷土浮迎竹醉雲淨
對山羞無地青歸幌他年翠繞樓且從隣寺去烟雨
一作看沙鷗

繁暑

繁暑不可度病餘少見招投鄰借軒卧信手得書饒
壽我藥雙笈驚人詩一瓢醒心憑雪鷺只恐日薰銷

大食瓶

窳質謝天巧風輪出鬼謀入窰奔闕伯隨舶震陽侯
獨鳥藏身穩雙虹繞腹流可克王會賦漆簡寫成周

春寒

人道春寒早繫舟楚山一夜雨瀏瀏此生削跡江邊
路嫩綠紛紅只自愁

夏夜極涼

素簡爰舜夜清風先戒秋稻深群蛤吠草暗一螢流
舌在殊無計心空尚有求按圖尋分野楚尾見吾州

六月二十日

二十一日立秋

天涯明月見秋風錯莫誰驚碧樹空豈意楚山招隱
處盡歸蜀客廣騷中釣魚聊爾針方直乞米茫然帖
自工獨卧南軒聽南澗蠻花猶作杜鵑紅

尤溪縣之南李花千樹無一雜木春時嘗飲
其中酒家小軒可愛不知何故不曾作詩追
賦二首明年修故事當書之壁間

橋外茅茨好相過問酒錢李花今若此白髮自茫然
落日雲千步春風雪一川明朝記來處石澗響濺濺

又

見說小軒久無人喚我來直如春力快故遣客懷開

玉立花千樹霞翻酒一盃江陵二月尾襟韻信難陪

春間小詩書趙園壁追錄之

柳態隨時秀花容近酒輕綠牕京洛語蓋抹早鶯聲

又

小語不知夕幽香無盡時影寒人欲醉明月照醪醑

又

自得春風信開懷待此花餘寒固艱棘今夕雪斜斜

又

夜月闌杯淺春風楚製輕故鄉空費夢來此聽谿聲

夜坐池上用簡齋韻

落日解衣無一事移牀臨水已三回斗沉北嶺魚方
樂月過秋河鴈不來踈翠庭前供答話淺紅木末勸
持盃明明獨對蒼華影莫上睢陽萬死臺

平津

西風扶病上江樓老眼淒迷一色秋帆影戛雲追斷
鴈角聲吹月舞潛蚪栽培白葉初無路點檢青山始
欲愁左海此中纜咫尺何年烟雨解扁舟

九日與數客登善福院之絕頂晚飲茗飲闌
予以病先歸賦十二韻

風日迫佳節一川秋意昏臨高分石磴却立數煙村

楚製隨雲物蠻花照酒痕龍山嗟未久藍水想空存
鴻鴈頻收唳茱萸幾斷菟拍肩尋熟路登閣換餘樽
鍾梵規繩闊親朋笑語溫加邊携海嶠聞笛憶鄉園
夢記南柯守兵看左角奔詩凡羞晉宋髮短任乾坤
汝輩禪心起今生道眼渾不知東嶂外灑灑湧金盆

秋日

鳴鷗初歇樹猶陰黃菊紅榴色轉深管領秋風有今
日留仙群稱辟寒金

簸弄天風髮彩涼西河一笑問吳剛借君玉斧煩輕
手留取箇中秋影香

山靜溪回樹綠晴鷺群點點雪分明影沉寒水初無
意只是魚兒獨自驚

葵道人之三山

君家雙峯下祝髮事香火豈無遠遊志因此萬山裹
坐閱腰包中未接話已墮翩然問知津九仙入風柁
冥冥荔枝浦華屋紛破礮邂逅儻逢渠周旋寧作我
閉門造車語雖陋佛所可他年笑相視此計無乃左

次嶺上壁間韻

雲卧雙峯祇對亭黃塵縈拂玉梅驚春風一棹歸來
早誰作窓間擁鼻聲

春風

一舉造物手萬生和氣中酒邊排雪意詩裏要春風
了了誰孤起滔滔我即空試詢三世事猶有讀書功

折山道中六言寄湧翠道人

折山有路可上他日雲藏萬家用處何曾觸石一禪
指頂天涯

雲暖網橫危磴日沉舟泊平沙款乃一聲歸去炊烟
遙起蘆花

牛卧黃茅岡底鷺歸紅葉村邊可是太平無象溪橋
醉舞華顛

玉梅無意相惱，嗾人烟雨踈踈。擬寫箇中妙處，語煩不到西湖。

草枯蟲躍，驚響溪靜。魚行閃光，只麼時時管帶。可煩細細商量。

既有女名靈照，何妨自作維摩。要見諸天辦供，問他風月山河。

寄龔十三

支頤獨揖北窓風，怪事從今吐吐空。簡策不知春色晚，山川渾落戰塵中。花飄茵席三生淨，草入池塘一句工。想見楚龔懷我處，扁舟邀蕩夕陽紅。

穀雨

大點紛林際，虛簷寫夢中。明朝知穀雨，無策禁花風。石渚收機巧，烟蓑建事功。越禽牢閉口，吾道寄天公。

璠叟書云牡丹餘醪已盡胡不歸

客次驚衰白，歸期先牡丹。空枝兼病力，啼鳥問愁端。平日長相憶，東風忍不看。冰容亦零落，唯是有春寒。

姚大本以李義山詩韻作詩題息軒繼作

隱凡心疑水，携盃影照山。六窓開畔岸，一榻掃中間。相子方饒舌，花枝忽解顏。定餘牛自牧，夢起蝶相關。閭闔初無路，蓬萊別有班。歲舟知夜失，面壁竟西還。

老矣從他笑公乎伴我閑在坤詩更好分寸許躋攀
書報國壁向年寓學於此嘗見虹下飲溪中

復聞子規

昔與春風來此時携書齷齪伴兒嬉山晴欄楯投雌
霓身病林巒號子規短髮蕭蕭吹易盡長江滾滾去
何之欲追舊事無言說更作三生石上期

蓋竹與陳和仲昆季

玉樹成群不可攀謾將牢落待蒼山五年分手河梁
外一夕連牀風雨間梅蕊凌寒春欲動酒杯無力病
相關朱陳自古同鄉社更約青雲作往還

寄夢聲

滄海橫流無處安只合且作夢中看豈須遊戲兩蝸
角收此微茫一彈丸老境懷人山宛轉春風着物髮
摧殘窮愁似與詩增氣嚼雪敲冰字字寒

辛酉五月望簡陳和仲

秀出雪峯一千衆挽回廬阜三十年赤烏白馬吐傑
句黃花翠竹通幽禪竺師不假報文度鑿齒本自知
彌天可憐烏石嶺下路榕葉炯炯凝雲烟

用東坡武昌寒溪韻三篇同揚良翰

漫郎古邑埋蒿萊五柳合抱何人栽浯溪未作天寶

頌爽氣已壓南昌梅蘇公鄧公先後到一時玉立高
鬼鬼扁舟載酒渡江水千山軟翠昏樓臺窪尊抔飲
追太古雲荒石老無紛埃歸來玉署念赤壁側身西
望銀濤堆英辭傑句相震發尚記野鳥窺空壘只今
却數未百載蟲篆想見留巖隈中原臙腥雜夷夏淮
北城壘生莓苔公乎天與濟世具曷不手引梟鸞開
空遺筆力配元祐頓覺紙上千軍摧禁中頗牧知在
卽號令前日頌風雷丹青元向大羽出貂蟬要自兜
鍪來數公文字雖勝絕莫使變作離騷哀

東坡謫官未放回桃花不繫玄都栽機牙愛觸造物

手五見江雨肥江梅扁舟一笑凌浩渺瘦筇結伴登

崔嵬窪尊故事逢浪容鳥篆真迹追浯臺

次山有浯臺銘見六

集漂流長有北關夢邂逅果踏東華埃玉堂夜直對

同舍金燭照座花成堆帝觴雨露澆舌本忽憶樊口

傾山壘聯詩共刻醉眠處至今寶氣蟠巖隈關西夫

子獨好事掖垣行卽吟蒼苔斯文突過元祐上已覺

萬丈光芒開臨風弔客感赤壁公瑾孟德俱彫摧英

雄割據亦兒戲安用七筋驚蛟雷東坡羽化不復返

浪麥何日成歸來鸚鵡洲前舊時路寒波荒葦令人

哀

故園山水真奇哉三徑蘭菊當年栽自嗟流浪不知
返江城曉角愁吹梅詩書邀我忽半世車轍前却連
崔嵬試尋夷路到聖處馬力已竭煩興臺去天尺五
吐傑句孔丘盜跖俱塵埃坐疑蓬島尋文尔扁舟徑
入浮雲堆肩摩嵇向挽焦賀欲倒瀛海為尊壘夢中
失脚在何許千里閩越天南隈隻身形影自相弔俯
仰馬鬣迷青苔蘭階彫謝知葉落荆樹慘淡無花開
向來愚公不自度一手欲以太華摧那知天目山頂
露兕啼下眎雲間雷華亭黃耳竟安在遼東白鶴還
飛來終尋三十六峯去安假霸許平餘哀

感事

大弓竊陽氏神鼎淪泗淵何須識微士周魯必不全
武庫一朝火斬蛇逐飛烟傷心睨前事虜定紛然

又

山川非晉土悲泣効楚囚一語強自慰淒迷望神州
刺史下荆水司農耒石頭土園管夷吾過計非私憂

又

元規負康濟徒手嬰群雄兵後歷陽耒無地逃姦鋒
誰平死社稷千載一卞公英風與義氣建立成江東

雪梅各一首

去年雪欺客平地一尺深謝遣東閣花那顧西牀琴
故人初不知屋側乃見尋悠然振永起誰復明此心

又

寒梅卧烟雨山澤有奇氣六龍扶翼之月袂攬雲纒
先生九疑仙心識真筌秘裁詩作花骨瘦淨乃可貴

道中

疾憂勸征行金火方抵梧宵分餉群僕乘月問前路
小兒何自至楫我陳洲渡暗浪擊層崖平沙起驚鷺
莽蒼川花開莫蒙山氣聚物情豈不嘉悶滯非所遇
鈴語出林表風期呼我往尋幽本素志觸熱詠嘉句

午枕得高深復覺清景駐誰云適所願永乏濟世具
以茲一夢頃可况百年遇咄哉郭氏子破甑尚欲顧

自作挽歌辭

憂幽坐南軒萬壑取我囚疾雷且不聞焉知草蟲愁
強顏理編簡閱世如東流滔滔竟不返誰復操戈矛
天涯念孤姪携母依諸劉書來話悲辛心往形輒留
先塋託仙峯山僧掃梧楸二女隨母住外翁今白頭
伯氏尚書郎名字騰九州仲兄中武舉氣欲無羗酋
棣華一朝集荆樹三枝稠堂堂相繼去遺我歸山丘
漆園夢方覺白衣雲正浮憑陵若蹈空何處停華輜

故鄉豈不懷戀一作屋食良亦一作易謀自我識廢興於
天無怨尤平生喜聞詩此詩當挽謳不須生芻蕘君
從二兄游漆園一作蓬蓬白衣一作初浮

王淵集終

英偉豪傑之士生必有所自來故
其亡也決不滅與草木俱腐觀
王淵先生之集顧不異哉夫得則
喜失則悲有所不平則怨刺此詩
人之情也惟深於道者不然無入
而不自得先生近之先生少有軼
才自負其長不肯隨俗俯仰厄窮

蹇躑有人所難堪而其節愈厲其
氣益高其詩間暇畧不見悲傷憔悴
之態其視富貴利達真糝糠土
苴爾春風一篇雍容廣大有聖門
舞雩氣象感事三篇慨然見經世
之志自作挽歌詞齊得喪一死生
直欲友淵明於千載至所謂自我

識興廢於天無怨尤非深於道者
能如是乎嗚呼以先生之才使其
作於聲詩薦之郊廟發其所蘊措
諸事業何愧古人百不一售使後
世所以知公者獨此數十詩而已
悲夫先生有兄曰韋齋白首郎潛
不窳大用人以為恨其詩凌厲高

古有建安七子之風
韋齋之子南康史君
今又以道學倡其詩
源遠而流長信矣哉
淳熙辛丑仲春望日
梁谿尤袤敬跋

予承乏吳邑嘗手錄韋方先生善詩卷而識題焉所考以仲夏書之
公于學惟出於蔡搢年志舊遊地也同聲其故道守雖始祿惟性之
乃出是書占其第至洞惟此一卷也嗚呼是書之傳久矣矣其始於
三仕於其地故微之歎曰不亦宜乎故題者亦曰不亦宜乎其始於
顧曼卿不亦宜乎則其書信不亦宜乎也若夫先生之子以家學傳之
於世此其書之傳也



國家圖書館, NATIONAL CENTRAL LIBRARY, TAIWAN, R.O.C.